

明日重九亦以病不赴述古會再用前韻

月入秋幃病枕涼。霜飛夜簟故衾香。可憐吹帽狂司馬。空對親春老孟光。  
不作雍容傾坐上。繡成骯髒倚門傍。人閒此會論今古。細看茱萸感歎長。

九日尋臻閣黎遂泛小舟至勤師院二首

白髮長嫌歲月侵。病眸兼怕酒杯深。南屏老宿閒相過。東閣郎君懶重尋。  
試碾露芽烹白雪。休拈霜葉嚼黃金。扁舟又截平湖去。欲訪孤山支道林。

【二】

湖上青山翠作堆。葱葱鬱鬱氣佳哉。笙歌叢裏抽身出。雲水光中洗眼來。  
白足赤髭迎我笑。拒霜黃菊爲誰開。明年桑苧煎茶處。憶著衰翁首重回。

九日舟中望見有美堂上魯少卿飲以詩戲之二首

指點雲閒數點紅。笙歌正擁紫髯翁。誰知愛酒龍山客。卻在漁舟一葉中。

【三】

西閣珠簾卷落暉。水沈煙斷佩聲微。遙知通德淒涼甚。擁髻無言怨未歸。

元翰少卿寵惠谷簾水一哭龍團二枚仍以新詩爲貺歎味不已次韻奉和

巖垂匹練千絲落。雷起雙龍萬物春。此水此茶俱第一。共成三絕景中人。

遊諸佛舍一日飲醞茶七盞戲書勤師壁

示病維摩元不病。在家靈運已忘家。何須魏帝一丸藥。且盡盧仝七碗茶。

九日湖上尋周李二君不見君亦見尋於湖上以詩見寄明日乃次其韻

湖上野芙蓉。含思愁脈脈。娟然如靜女。不肯傍阡陌。詩人杳未來。霜豔冷難宅。  
君行逐鷗鷺。出處浩莫測。葦閒聞擘音。雲表已飛屐。使我終日尋。逢花不忍摘。  
人生如朝露。要作百年客。喟彼終歲勞。幸茲一日澤。願言竟不遂。人事多乖隔。  
悟此知有命。沈憂傷魂魄。

送杭州杜戚陳三掾罷官歸鄉

秋風撼撼鳴枯蓼。船閣荒村夜悄悄。正當逐客斷腸時。君獨歌呼醉連曉。  
老夫平生齊得喪。尙戀微官失輕矯。君今憔悴歸無食。五斗未可秋毫小。  
君言失意能幾時。月啖蝦蟇行復皎。殺人無驗中不快。此恨終身恐難了。  
徇時所得無幾何。隨手已遭憂患繞。期君正似種宿麥。忍飢待食明年粃。

次韻周長官壽星院同餞魯少卿

琉璃百頃水仙家。風靜湖平響釣車。寂歷疎松敲晚照。伶俜寒蝶抱秋花。  
困眠不覺依蒲褐。歸路相將踏桂華。更著綸巾披鶴氅。他年應作畫圖誇。



次韻述古過周長官夜飲

二更鑿鼓動諸鄰。百首新詩開八珍。已遣亂蛙成兩部。更邀明月作三人。  
雲煙湖寺家家境。燈火沙河夜夜春。曷不勸公勤秉燭。老來光景似奔輪。

述古以詩見責屢不赴會復次前韻

我生孤僻本無鄰。老病年來益自珍。肯對紅裙辭白酒。但愁新進笑陳人。  
北山怨鶴休驚夜。南畝巾車欲及春。多謝清時屢推轂。豨膏那解轉方輪。

金門寺中見李西臺與二錢唱和四絕句戲用其韻跋之

帝城春日帽簷斜。二陸初來尚憶家。未肯將鹽下蓴菜。已應知雪似楊花。

【二】

平生賀老慣乘舟。騎馬風前怕打頭。欲問君王乞符竹。伯憂無懈有監州。

【三】

西臺妙跡繼楊風。無限龍蛇洛寺中。一紙清詩弔興廢。塵埃零落梵王宮。

【四】

五季文章墮劫灰。升平格力未全回。故知前輩宗徐庾。數百風流似玉臺。

胡穆秀才遺古銅器似鼎而小。上有兩柱。可以覆而不蹶。以為鼎則不足。疑

其飲器也。胡有詩答之

雙耳獸齧環。長脣鶻擘喙。三趾下銳春蒲短。兩柱高張秋菌細。  
君看翻覆俯仰間。覆成三角翻兩鬢。古書雖滿腹。苟有用我亦隨世。  
嗟君一見呼作鼎。纔注升合已漂逝。不如學鴟夷。盡日盛酒真良計。

### 蘇東坡詩集卷十一

#### 古今體詩

七十首

賀陳述古弟章生子

鬱蔥佳氣夜充闔。始見徐卿第二雛。甚欲去為湯餅客。惟愁錯寫弄墨書。  
參軍新婦賢相敵。阿大中郎喜有餘。我亦從來識英物。試教啼看定何如。

贈治易僧智周

寒窗孤坐凍生瓶。尙把遺編照露螢。閣束九師新得妙。夢吞三畫舊通靈。  
斷弦挂壁知音喪。揮麈空山亂石聽。齋罷何須更臨水。胸中自有洗心經。

張子野年八十五尙聞買妾述古令作詩



錦里先生自笑狂。莫欺九尺鬢眉蒼。詩人老去鶯鶯在。公子歸來燕燕忙。  
柱下相君猶有齒。江南刺史已無腸。平生謬作安昌客。略遣彭宣到後堂。

書雙竹湛師房二首

我本西湖一釣舟。意嫌高屋冷飈飈。羨師此室纔方丈。一炷清香盡日甌。

【二】

暮鼓朝鐘自擊撞。閉門孤枕對殘缸。白灰旋撥通紅火。臥聽蕭蕭雨打窗。

寶山新開徑

藤梢橘刺元無路。竹杖屨鞋不用扶。風自遠來聞笑語。水分流處見江湖。

回觀佛國青螺髻。踏遍仙人碧玉壺。野客歸時山月上。棠梨葉戰暝禽呼。

和述古冬日牡丹四首

一朵妖紅翠欲流。春光回照雪霜羞。化工只欲呈新巧。不放閒花得少休。

【三】

花開時節雨連風。卻向霜餘染爛紅。漏洩春先私一物。此心未信出天工。

【三】

當時只道鶴林仙。解遣秋光發杜鵑。誰信詩能回造化。直教霜榭放春妍。

【四】

不分清霜入小園。故將詩律變寒暄。使君欲見藍關詠。更倩韓郎爲染根。

劉貢父見余歌詞數首以詩見戲聊次其韻

十載飄然未可期。那堪重作看花詩。門前惡語誰傳去。醉後狂歌自不知。

刺舌君今猶未戒。炙眉吾亦更何辭。相從痛飲無餘事。正是春容最好時。

和柳子玉喜雪次韻仍呈述古

詩翁愛酒常如渴。瓶盡欲沽囊已竭。燈青火冷不成眠。一夜撚鬚吟喜雪。

詩成就我覓歡處。我窮正與君彷彿。曷不走投陳孟公。有酒醉君仍飽德。

瓊瑤欲盡天應惜。更遣清光續殘月。安得佳人擢素手。笑捧玉盃兩奇絕。

豔歌一曲回陽春。坐使高堂生暖熱。

觀子玉郎中草聖

柳侯運筆如電閃。子雲寒悴羊欣儉。百斛明珠便可扛。此書非我誰能雙。

雪後至臨平與柳子玉同至僧舍見陳尉烈

落帆古戍下。積雪高如邱。強邀詩老出。疎髻散鸛鵲。僧房有宿火。手足漸和柔。

靜士素寡言。相對自忘憂。銅爐擢煙穗。石鼎浮霜漚。征夫念前路。急鼓催行舟。



我行雖有程。坐穩且復甞。大哉天地間。此生得浮遊。

李頎秀才善畫山。以兩軸見寄。仍有詩次韻答之。

平生自是箇中人。欲向漁舟便寫真。詩句對君難出手。

年來白髮驚秋速。長恐青山與世新。從此北歸休悵望。

夜至永樂文長老院。文時臥病退院。

夜聞巴叟臥荒邨。來打三更月下門。往事過年如昨日。

老非懷土情相得。病不開堂道益尊。惟有孤棲舊時鶴。

柳氏二外甥求筆跡二首

退筆如山未足珍。讀書萬卷始通神。君家自有元和脚。

【二】

紙行書兩絕詩。遂良鬚鬢已成絲。何當火急傳家法。

和錢安道寄惠建茶

我官于南今幾時。嘗盡谿茶與山茗。胸中似記故人面。

爲君細說我未暇。試評其略差可聽。建谿所產雖不同。

森然可愛不可慢。骨清肉膩和且正。雪花雨脚何足道。

縱復苦硬終可錄。

體輕雖復強浮沈。

葵花玉斝不易致。

嗅香嚼味本非別。

收藏愛惜待佳客。

錢安道席上令歌者道服

烏府先生鐵作肝。

他日卜鄰先有約。

惠山謁錢道人烹小龍團。登絕頂望太湖。

踏遍江南南岸山。

石路縈回九龍脊。

錢道人有詩云。直須認取主人翁。作兩絕戲之。

首斷故應無斷者。

【二】

有主還須更有賓。

蘇東坡詩集卷十一

不如無鏡自無塵。

只從半夜安心後。

失卻當年覺痛人。

二五五七

草茶無賴空有名。

其閒絕品豈不佳。

誰知使者來自西。

此詩有味君勿傳。

猶嫌白髮年前少。

如今且作華陽服。

霜風卷地不知寒。

待君投劾我休官。

逢山未免更流連。

獨攜天上小團月。

水光翻動五湖天。

孫登無語空歸去。

冰銷那復有冰知。

主人若苦令儂認。

認主人人竟是誰。

往事過年如昨日。

惟有孤棲舊時鶴。

君家自有元和脚。

何當火急傳家法。

胸中似記故人面。

建谿所產雖不同。

雪花雨脚何足道。

高者妖邪次頑憤。

張禹縱賢非骨硬。

開緘磊落收百餅。

奴隸日注臣雙井。

空使時人怒生瘕。

故點紅燈雪裏看。

醉唱儂家七返丹。

來試人間第二泉。

半嶺松聲萬壑傳。



除夜野宿常州城外二首

行歌野哭兩堪悲。遠火低星漸向微。病眼不眠非守歲。鄉音無伴苦思歸。  
重衾脚冷知霜重。新沐頭輕感髮稀。多謝殘燈不嫌客。孤舟一夜許相依。

【一】

南來三見歲云徂。直恐終身走道塗。老去怕看新曆日。退歸擬學舊桃符。  
煙花已作青春意。霜雪偏尋病客鬚。但把窮愁博長健。不辭最後飲屠蘇。

元日過丹陽明日立春寄魯元翰

堆盤紅縷細茵陳。巧與椒花兩鬪新。竹馬異時寧信老。土牛明日莫辭春。  
西湖弄水猶應早。北寺觀燈欲及辰。白髮蒼顏誰肯記。曉來頻嚏爲何人。

古纏頭曲

鸚絃鐵撥世無有。樂府舊工惟尙叟。一生喙硬眼無人。坐此困窮今白首。  
翠鬢女子年十七。指法已似呼韓婦。輕帆渡海風掣回。滿面塵沙和淚垢。  
青衫不逢溢浦客。紅袖漫插曹綱手。爾來一見哀駘佗。便著臂鞴躬并臼。  
我慚貧病百不足。強對黃花飲白酒。轉關濩索動有神。雷輶空堂戰窗牖。  
四絃一抹擁袂立。再拜十分爲我壽。世人只解錦纏頭。與汝作詩傳不朽。

刁同年草堂

不用長竿矯繡衣。南園北第兩參差。青山有約長當戶。流水無情自入池。  
歲久醱醑渾欲合。春來楊柳不勝垂。主人不用怱怱去。正是紅梅著子時。

刁景純賞瑞香花憶先朝侍宴次韻

上苑天桃自作行。劉郎去後幾回芳。厭從年少追新賞。閒對宮花識舊香。  
欲贈佳人非泛洩。好紉幽佩弔沈湘。鶴林神女無消息。爲問何年返帝鄉。

同柳子玉遊鶴林招隱醉歸呈景純

花時臘酒照人光。歸路春風灑面涼。劉氏宅邊霜竹老。戴公山下野桃香。  
巖頭匹練兼天淨。泉底眞珠濺客忙。安得道人攜笛去。一聲吹裂翠崖岡。

景純見和復次韻贈之二首

解組歸來道益光。坐看百物自炎涼。捲簾堂上檀槽鬧。送客林間樺燭香。  
淺量已愁當酒怯。非才猶覺和詩忙。何人貪佩黃金印。千柱耽耽瑣北岡。

【二】

人閒膏火正爭光。每到藏春得暫涼。多事始知田舍好。凶年偏覺野蔬香。  
谿山勝畫徒能說。來往如梭爲底忙。老去此身無處著。爲翁栽插萬松岡。



柳子玉亦見和。因以送之。兼寄其兄子璋道人。

不羨腰金照地光。暫時假面弄西涼。晴窗曠日肝腸煖。古殿朝眞屨袖香。

說靜故知猶有動。無閒底處更求忙。先生官罷乘風去。何用區區賦陟岡。

子玉家宴用前韻見寄復答之

自酌金樽勸孟光。更教長笛奏伊涼。牽衣男女遶太白。扇枕郎君煩阿香。

詩病逢春轉深痼。愁魔得酒暫奔忙。醒時情味吾能說。日在西南白草岡。

景純復以二篇。一言其亡兄與伯父同年之契。一言今者唱酬之意。仍次其韻。

靈壽扶來似孔光。感時懷舊一悲涼。蟾枝不獨同攀桂。雞舌還應共賜香。

等是浮休無得喪。麤分憂樂有閒忙。年來世事如波浪。鬱鬱誰知柏在岡。

【二】

屢把鉛刀齒步光。更遭華袞照厖涼。蘇門山上莫長嘯。蒼筤林中無別香。

燭燼已殘終夜刻。槐花還似昔年忙。背城借一吾何敢。慎莫樽前替戾岡。

子玉以詩見邀同刁丈遊金山

君年甲子未相逢。難向入前說老翁。更有方瞳八十一。奮衣矍鑠走山中。

金山寺與柳子玉飲大醉臥寶覺禪榻夜分方醒書其壁

惡酒如惡人。相攻劇刀箭。頽然一榻上。勝之以不戰。詩翁氣雄拔。禪老語清輒。

我醉都不知。但覺紅綠眩。醒時江月墮。撼撼風響變。惟有一龕燈。二豪俱不見。

送柳子玉赴靈仙

世事方艱便猛迴。此心未老已先灰。何時夢入眞君殿。也學傳呼觀主來。

監洞霄宮俞康直郎中所居四詠

退圃

百丈休牽上瀨船。一鉤歸釣縮頭鱗。園中草木春無數。只有黃楊厄閏年。

逸堂

新第誰來作竝隣。舊官寧復憶星辰。請君置酒吾當賀。知向江湖拜散人。

遜軒

冠蓋相望起隱淪。先生那得老江邨。古來眞遜何曾遜。笑殺踰垣與閉門。

遠樓

西山煙雨捲疎簾。北戶星河落短簷。不獨江天解空濶。地偏心遠似陶潛。

游鶴林招隱二首

郊原雨初霽。春物有餘妍。古寺滿修竹。深林聞杜鵑。睡餘柳花墮。目眩山櫻然。



西窗有病客。危坐看香煙。

【二】

行歌白雲嶺。坐詠修竹林。風輕花自落。日薄山半陰。湖草誰復識。聞香杳難尋。時見城市人。幽居惜未深。

書普慈長老壁

普慈寺後千竿竹。醉裏曾看碧玉椽。倦客再遊行老矣。高僧一笑故依然。久參白足知禪味。苦厭黃公聒晝眠。惟有兩株紅百葉。晚來猶得向人妍。

書焦山綸長老壁

法師住焦山。而實未嘗住。我來輒問法。法師了無語。法師非無語。不知所答故。君看頭與足。本自安冠屨。譬如長鬣人。不以長爲苦。一旦或人問。每睡安所措。歸來被上下。一夜無著處。展轉遂達晨。意欲盡鐻去。此言雖鄙淺。故自有深趣。持此問法師。法師一笑許。

刁景純席上和謝生二首

誤入仙人碧玉壺。一歡那復問親疎。杯盤狼藉吾何敢。車騎雍容子甚都。此夜新聲聞北里。他年故事記南徐。欲窮風月三千界。願化天人百億軀。

【二】

縱飲誰能問挈壺。不知門外曉星疎。綺羅勝事齊三閣。賓主談鋒敵兩都。楊畔煙花嘗嘆杜。海中童卯尙追徐。無多酌我君須聽。醉後麤狂膽滿軀。

留別金山寶覺圓通二長老

沐罷巾冠快晚涼。睡餘齒頰帶茶香。艤舟北岸何時渡。晞髮東軒未肯忙。康濟此身殊有道。醫治外物本無方。風流二老長還往。顧我歸期尙渺茫。

和蘇州太守王規父侍太夫人觀燈之什。余時以劉道原見訪滯留京口。

不及赴此會二首

不覺朱幡輾後塵。爭看繡幃錦纏輪。洛濱侍從三人貴。京兆平反一笑春。但逐東山攜妓女。那知後閣走窮賓。滯留不見榮華事。空作賡詩第七人。

【二】

翻翻緹綺走香塵。激激飛濤射火輪。美酒雷連三夜月。豐年傾倒五州春。安排詩律追強對。蹭蹬歸期爲惡賓。墮珥遺簪想無限。華胥猶見夢回人。

常潤道中有懷錢塘寄述古五首

從來直道不辜身。得向西湖兩過春。沂上已成曾點服。泮宮初采魯侯芹。



休驚歲歲年年貌。且對朝朝暮暮人。

細雨晴時一百六。

畫船鼉鼓莫違民。

【二】

草長江南鶯亂飛。

年來事事與心違。

花開後院還空落。

燕入華堂怪未歸。

世上功名何日是。

樽前點檢幾人非。

去年柳絮飛時節。

記得金籠放雪衣。

【三】

浮玉山頭日日風。

湧金門外已春融。

二年魚鳥渾相識。

三月鶯花付與公。

剩看新翻眉倒暈。

未應泣別臉消紅。

何人織得相思字。

寄與江邊北向鴻。

【四】

國豔天燒酒半酣。

去年同賞寄僧簷。

但知撲撲晴香軟。

誰見森森曉態嚴。

穀雨共驚無幾日。

蜜蜂未許輒先甜。

應須火急回征棹。

一片辭枝可得黏。

【五】

惠泉山下土如濡。

陽羨溪頭米勝珠。

賣劍買牛吾欲老。

殺鷄爲黍子來無。

地偏不容容高蓋。

俗儉真堪著腐儒。

莫怪江南苦畱滯。

經營身計一生迂。

杭州牡丹開時。僕猶在常潤。周令作詩見寄。次其韻。復次一首。送赴闕。

羞歸應爲負花期。

已見成陰結子時。

與物寡情憐我老。

遣春無恨賴君詩。

玉臺不見朝酣酒。

金縷猶歌空折枝。

從此年年定相見。

欲師老圃問樊遲。

【一】

莫負黃花九日期。

人生窮達可無時。

十年且就三都賦。

萬戶終輕千首詩。

天靜傷鴻猶戢翼。

月明驚鵲未安枝。

君看六月河無水。

萬斛龍驤到自遲。

常州太平寺觀牡丹

武林千葉照觀空。

別後湖山幾信風。

自笑眼花紅綠眩。

還將白首對鞞紅。

遊太平寺淨土院觀牡丹。中有淡黃一朵。特奇。爲作小詩。

醉中眼纈自爛斑。

天雨曼陀照玉盤。

一朵淡黃微拂掠。

鞞紅魏紫不須看。

無錫道中賦水車

翻翻聯聯銜尾鴉。

犖犖确确蛻骨蛇。

分疇翠浪走雲陣。

刺水綠鍼抽稻芽。

洞庭五月欲飛沙。

鼃鳴窟中如打衙。

天工不見老翁泣。

喚取阿香推雷車。

成都進士杜暹伯升。出家名法通。往來吳中。

欲識當年杜伯升。

飄然雲水一孤僧。

若教俛首隨羶鎖。

料得如今似我能。

虎邱寺

入門無平田。

石路細穿嶺。

陰風生澗壑。

古木翳潭井。



鐵花秀巖壁。殺氣噤蛙黷。幽幽生公堂。左右立頑礦。當年或未信。異類服精猛。胡爲百歲後。仙鬼互馳騁。窈然雷清詩。讀者爲悲哽。東軒有佳致。雲水麗千頃。熙熙覽生物。春意研淒冷。我來屬無事。暖日相與永。喜鵲翻初旦。愁鴛蹲落景。坐見漁樵還。新月溪上影。悟彼良自哈。歸田行可請。

蘇州閭邱江君二家雨中飲酒二首

小圃陰陰徧灑塵。方塘潏潏欲生紋。已煩仙袂來行雨。莫遣歌聲便駐雲。肯對綺羅辭白酒。試將文字惱紅裙。今宵記取醒時節。點滴空階獨自聞。

【二】

五紀歸來鬢未霜。十眉環列坐生光。喚船渡口迎秋女。駐馬橋邊問泰娘。曾把四絃娛白傅。敢將百草鬪吳王。從今卻笑風流守。畫戟空凝宴寢香。

蘇州姚氏三瑞堂

君不見董召南。隱居行義孝且慈。天公亦恐無人知。故令雞狗相哺兒。又令韓老爲作詩。爾來三百年。名與淮水東南馳。此人世不乏。此事亦時有。楓橋三瑞皆目見。天意宛在虞鱓後。惟有此詩非昔人。

君更往求無價手。

次韻沈長官三首

家山何在兩忘歸。杯酒相逢慎勿違。不獨飯山嘲我瘦。也應糠覈怪君肥。

【二】

男婚已畢女將歸。累盡身輕志莫違。聞道山中食無肉。玉池清水自生肥。

【三】

造物知吾久念歸。似憐衰病不相違。風來震澤帆初飽。雨入松江水漸肥。

戲書吳江三賢畫像三首

誰將射御教吳兒。長笑申公爲夏姬。卻遣姑蘇有麋鹿。更憐夫子得西施。

【二】

浮世功勞食與眠。季鷹真得水中仙。不須更說知幾早。直爲鱸魚也自賢。

【三】

千首文章二頃田。囊中有未一錢看。卻因養得能言鴨。驚破王孫金彈丸。

劉孝叔會虎邱時王規父齋素祈雨不至二首



白簡威猶凜。青山與已濃。鶴閒雲作警。駝臥草埋峰。跪履若可教。卜隣應見容。因公問回老。何處定相逢。

【二】

太常齋未解。不肯對纖穠。只遣三千履。來遊十二峰。林空答清唱。潭淨寫衰容。歸去瑤臺路。還應月下逢。

過永樂文長老已卒

初驚鶴瘦不可識。旋覺雲歸無處尋。三過門閒老病死。一彈指頃去來今。存亡慣見渾無淚。鄉井難忘尚有心。欲向錢塘訪圓澤。葛洪川畔待秋深。

贈張刁二老

兩邦山水未淒涼。二老風流總健強。共成一百七十歲。各飲三萬六千觴。藏春塢裏鶯花鬧。仁壽橋邊日月長。惟有詩人被磨折。金釵零落不成行。

蘇東坡詩集卷十二

古今體詩

八首

去年秋。偶遊寶山上方。入一小院。闐然無人。有一僧。隱几低頭讀書。與之語。漠然不甚對。問其隣之僧。曰。此雲閣黎也。不出十五年矣。今年六月。自常潤還。復至其室。則死葬數月矣。作詩題其壁。

雲師來寶山。一住十五秋。讀書嘗閉戶。客至不舉頭。去年造其室。清坐忘百憂。我初無言說。師亦無對酬。今來復扣門。空房但颯颯。云已滅無餘。薪盡火不甯。卻疑此室中。常有斯人不。所遇孰非夢。事過吾何求。

聽僧昭素琴

至和無擾醒。至平無按抑。不知微妙聲。究竟從何出。散我不平氣。洗我不和心。此心知有在。尙復此微吟。

僧惠勤初罷僧職

軒軒青田鶴。鬱鬱在樊籠。既爲物所縻。遂與吾輩同。今來始謝去。萬事一笑空。



新詩如洗出。不受外垢蒙。清風入齒牙。出語如風松。霜髭茁病骨。飢坐聽午鐘。非詩能窮人。窮者詩乃工。此語信不妄。吾聞諸醉翁。

遊靈隱高峰塔

言遊高峰塔。葶食治野裝。火雲秋未衰。及此初旦涼。霧霏巖谷暗。日出草木香。嘉我同來人。久便雲水鄉。相勸小舉足。前路高且長。古松攀龍蛇。怪石坐牛羊。漸聞鐘磬音。飛鳥皆下翔。入門空有無。雲海浩茫茫。惟見聾道人。老病時絕糧。問年笑不答。但指穴藜牀。心知不復來。欲歸更徬徨。贈別畱匹布。今歲天早霜。

八月十七日天竺山送桂花分贈元素

月缺霜濃細藥乾。此花元屬玉堂仙。鷺峰子落驚前夜。蟾窟枝空記昔年。破械山僧憐耿介。練裙溪女鬪清妍。願公採擷紉幽佩。莫遣抓芳老澗邊。

捕蝗至浮雲嶺山行疲茶有懷子由弟二首

西來煙障塞空虛。灑徧秋田雨不如。新法清平那有此。老身窮苦自招渠。無人可訴烏銜肉。憶弟難憑犬附書。自笑迂疎皆此類。區區猶欲理蝗餘。

【二】

霜風漸欲作重陽。

熠熠溪邊野菊黃。

久廢山行疲犖确。

尙能村醉舞淋浪。

獨眠林下夢魂好。

回首人閒憂患長。

殺馬毀車從此逝。

子來何處問行藏。

青牛嶺高絕處有小寺人迹罕到

暮歸走馬沙河塘。爐煙裊裊十里香。朝行曳杖青牛嶺。寒泉咽咽千山靜。君勿笑老僧耳聾喚不聞。百年俱是可憐人。明朝且復城中去。白雲卻在題詩處。

新城陳氏園次晁補之韻

荒涼廢圃秋。寂歷幽花晚。山城已窮僻。況與城相遠。我來亦何事。徒倚望雲巘。不見苦吟人。清樽爲誰滿。

梅聖俞詩中有毛長官者今於潛令國華也聖俞歿十五年而君猶爲令

捕蝗至其邑作詩戲之

詩翁憔悴老一官。厭見苜蓿堆青盤。歸來羞澀對妻子。自比鮎魚緣竹竿。今君滯畱生二毛。飽聽衙鼓眠黃紬。更將嘲笑調朋友。人道獼猴騎土牛。願君恰似高常侍。暫爲小邑仍刺史。不願君爲孟浩然。卻遭明主放還山。宦遊逢此歲年惡。飛蝗來時半天黑。羨君封境稻如雲。蝗自識人人不識。

與毛令方尉遊西菩提寺二首

推擠不去已三年。魚鳥依然笑我頑。人未放歸江北路。天教看盡浙西山。



尚書清節衣冠後。

處士風流水石閒。

一笑相逢那易得。

數詩狂語不須刪。

【一】

路轉山腰足未移。

水清石瘦便能奇。

白雲自占東西嶺。

明月誰分上下池。

黑黍黃粱初熟候。

朱柑綠橘半甜時。

人生此樂須天賦。

莫遣兒郎取次知。

聽賢師琴

大絃春溫和且平。

小絃廉折亮以清。

平生未識宮與角。但聞牛鳴盎中雉登木。

門前剝啄誰叩門。

山僧未閑君勿嘖。

歸家且覓千斛水。

淨洗從前箏笛耳。

贈寫真何充秀才

君不見潞州別駕眼如電。

左手挂弓橫撚箭。又不見雪中騎驢孟浩然。皺眉吟詩肩

聳山。飢寒富貴兩安在。

空有遺像畱人閒。此身常擬同外物。浮雲變化無蹤跡。

問君何苦寫我真。君言好之聊自適。黃冠野服山家容。意欲置我山巖中。勳名將

相今何限。往寫襄公與鄂公。

同先生過湖州東林沈氏飲。醉以石榴皮書其家東老菴之壁云。西隣已富憂

不足。東老雖貧樂有餘。白酒釀來因好客。黃金散盡爲收書。西蜀和仲聞而次

其韻三首。東老沈氏之老自謂也。湖人因以名之。其子偕作詩。有可觀者。

世俗何知貧是病。

神仙可學道之餘。

但知白酒畱佳客。

不問黃公覓素書。

【二】

符籙道士晨興際。

華岳先生尸解餘。

忽見黃庭丹篆句。

猶傳青紙小朱書。

【三】

淒涼雨露三年後。

髣髴塵埃數字餘。

至用榴皮緣底事。

中書君豈不中書。

李行中醉眠亭三首

已向閒中作地仙。

更於酒裏得天全。

從教世路風波惡。

賀監偏工水底眠。

【一】

君且歸休我欲眠。

人言此語出天然。

醉中對客眠何害。

須信陶潛未若賢。

【二】

孝先風味也堪憐。

肯爲周公晝日眠。

枕麴先生猶笑汝。

枉將空腹貯遺編。

潤州甘露寺彈箏

多景樓上彈神曲。

欲斷哀絃再三促。

江妃出聽霧雨愁。

白浪翻空動浮玉。

喚取吾家雙鳳槽。

遣作三峽孤猿號。

與君合奏芳春調。

啄木飛來霜樹杪。

單同年求德興俞氏聚遠樓詩三首



雲山煙水苦難親。

野草幽花各自春。

賴有高樓能聚遠。

一時收拾與閒人。

【二】

無限青山散不收。

雲奔浪卷入簾鉤。

直將眼力爲疆界。

何啻人閒萬戶侯。

【三】

聞說樓居似地仙。

不知門外有塵寰。

幽人隱几寂無語。

心在飛鴻滅沒閒。

平山堂次王居卿祠部韻

高會日陪山簡醉。

狂言屢發次公醒。

酒如人面天然白。

山向吾曹分外青。

江上飛雲來北固。

檻前修竹憶南屏。

六朝興廢餘邱壘。

空使奸雄笑寧馨。

次韻陳海州書懷

鬱鬱蒼梧海上山。

蓬萊方丈有無閒。

舊聞草木皆仙藥。

欲棄妻孥守市闌。

雅志未成空自嘆。

故人相對若爲顏。

酒醒卻憶兒童事。

長恨雙鳧去莫攀。

次韻陳海州乘槎亭

人事無涯生有涯。

逝將歸釣漢江槎。

乘桴我欲從安石。

遁世誰能識子嗟。

日上紅波浮翠巘。

潮來白浪卷青沙。

清談美景雙奇絕。

不覺歸鞍帶月華。

次韻孫職方蒼梧山

蒼梧奇事豈虛傳。

荒怪還須問子年。

遠託鼇頭轉滄海。

來依鵬背負青天。

或云靈境歸賢者。

又恐神功亦偶然。

聞道新春恣遊覽。

羨君平地作飛仙。

次韻孫巨源寄漣水李盛二著作并以見寄五絕

南嶽諸劉豈易逢。

相望無復馬牛風。

山公雖見無多子。

社燕何由戀塞鴻。

【二】

高才晚歲終難進。

勇退當年正急流。

不獨二疏爲可慕。

他時當有景孫樓。

【三】

漱石先生難可意。

齧齏校尉久無朋。

應知客路愁無奈。

故遣吟詩調李陵。

【四】

雲雨休排神女車。

忠州老病畏人誇。

詩豪正值安仁在。

空看河陽滿縣花。

【五】

膠西未到吾能說。

桑柘禾麻不見春。

不羨京城騎馬客。

羨他淮月弄舟人。

王莽

漢家殊未識經綸。

入手功名事事新。

百尺穿成連夜井。

千金購得解飛人。

董卓



公業平時勸用儒。諸公何時起相圖。

只言天下無健者。

豈信車中有布乎。

虎兒

舊聞老蚌生明珠。未省老兔生於菟。

老兔自謂月中物。

不騎快馬騎蟾蜍。

蟾蜍爬沙不肯行。坐令青衫垂白鬚。

於菟駿猛不類渠。

指揮黃熊駕黑羆。

丹砂紫麝不用塗。眼光百步走妖狐。

妖狐莫誇智有餘。

不勞搖牙咀爾徒。

除夜病中贈段屯田

龍鍾三十九。勞生已強半。歲暮日斜時。還爲昔人歎。今年一線在。那復堪把玩。

欲起強持酒。故交雲雨散。惟有病相尋。空齋爲老伴。蕭條燈火冷。寒夜何時旦。

倦僕觸屏風。飢鼯嗅空案。數朝閉閣臥。霜髮秋蓬亂。傳聞使者來。策杖就梳盥。

書來苦安慰。不怪造請緩。大夫忠烈後。高義金石貫。要當擊權豪。未肯覩衰懦。

此生何所似。暗盡灰中炭。歸田計已決。此邦聊假館。三徑蠹成資。一枝有餘暖。

願君更信宿。庶奉一笑粲。

喬太博見和復次韻答之

百年三萬日。老病常居半。其閒互憂樂。歌笑雜悲歎。顛倒不自知。直爲神所玩。

須臾便堪笑。萬事風雨散。自從識此理。久謝少年伴。逝將遊無何。豈暇讀城旦。

非才更多病。二事可并案。愧煩賢使者。弭節整紛亂。喬侯瑚璉質。清廟嘗薦盥。

奮髯百吏走。坐變齊俗緩。未遭甘鷓退。竝進恥魚貫。每聞議論餘。凜凜激貪懦。

莫邪當自躍。豈復煩爐炭。便應朝秣越。未暮刷燕館。胡爲守故邱。眷戀桑榆暖。

爲君叩牛角。一詠南山粲。

二公再和亦再答之

寒雞知將晨。飢鶴知夜半。亦如老病客。遇節嘗感歎。光陰等敲石。過眼不容玩。

親友如搏沙。放手還復散。羈孤每自笑。寂寞誰肯伴。元達號神君。高論森月旦。

紀明本賢將。汨沒事堆案。欣然肯相顧。夜閣燈火亂。盤空愧不飽。酒薄僅堪盥。

雍容許著帽。不怪安石緩。雖無窈窕人。清唱弄珠貫。幸有縱橫舌。說劍起慵儒。

二豪沈下位。暗火埋濕炭。豈似草玄人。默默老儒館。行看富貴逼。炙手借餘暖。

應念苦思歸。登樓賦王粲。

雪後書北臺壁二首

黃昏猶作雨纖纖。夜靜無風勢轉嚴。但覺衾裯如潑水。不知庭院已堆鹽。

五更曉色來書幌。半夜寒聲落畫簷。試掃北臺看馬耳。未隨埋沒沒雙尖。

【二】



城頭初日始翻鴉。陌上晴泥已沒車。凍合玉樓寒起粟。光搖銀海眩生花。  
遺蝗入地應千尺。宿麥連雲有幾家。老病自嗟詩力退。空吟冰柱憶劉叉。

謝人見和前篇二首

已分酒杯欺淺懦。敢將詩力鬪深嚴。漁蓑句好應須畫。柳絮才高不道鹹。  
敗履尚存東郭足。飛花又舞謫仙簷。書生事業真堪笑。忍凍孤吟筆退尖。

【二】

九陌淒風戰齒牙。銀杯逐馬帶隨車。也知不作堅牢玉。無奈能開頃刻花。  
得酒強歡愁底事。閉門高臥定誰家。臺前日暖君須愛。冰下寒魚漸可叉。

趙成伯家有麗人僕忝鄉人不肯開樽徒吟春雪美句次韻一笑

繡簾朱戶未曾開。誰見梅花落鏡臺。試問高吟三十韻。何如低唱兩三杯。  
莫言衰鬢聊相映。須得纖腰與共回。知道文君隔青瑣。梁園賦客肯言才。

成伯家宴造坐無由輒欲效顰而酒已盡入夜不欲煩擾戲作小詩求數酌而已

道士令嚴難繼和。僧伽帽小卻空迴。隔離不喚隣翁飲。抱甕須防吏部來。  
成伯席上贈所出妓川人楊姐

坐來真箇好相宜。深注脣兒淺畫眉。須信楊家住麗種。洛川自有浴妃池。

鐵溝行贈喬太博

城東坡隴何所似。風吹海濤低復起。城中病守無所爲。走馬何尋鐵溝水。  
鐵溝水淺不容轉。恰似當年韓與侯。有魚無魚何足道。駕言聊復寫我憂。  
孤村野店亦何有。欲發狂言須斗酒。山頭落日側金盆。倒著接離搔白首。  
忽憶從軍年少時。輕裘細馬百不知。臂弓腰箭南山下。追逐長楊射獵兒。  
老去同君兩憔悴。犯夜醉歸人不避。明年定起故將軍。未肯先誅霸陵尉。

莫笑銀杯小答喬太博

陶潛一縣令。獨飲仍獨醒。猶將公田二頃五十畝。種秫作酒不種秔。我今號爲二千石。  
歲釀百石何以醉賓客。請君莫笑銀杯小。爾來歲早東海窄。會當拂衣歸故邱。  
作書貨粟監河侯。萬斛船中著美酒。與君一生長拍浮。



蘇東坡詩集卷十三

古今體詩

四十首

送段屯田分得子字

勸農使者古大夫。不惜春衫踐泥塗。  
 東武縣令天馬駒。泮宮先生非俗儒。  
 谿邊策杖自攜壺。腰笏不煩何易子。  
 四十豈不知頭顱。畏人不出何其愚。  
 王事靡盬君甚劬。奉常客卿虬兩鬚。  
 相與野飲四子俱。樂哉此樂城中無。  
 膠西病守老且迂。空齋愁坐紛墨朱。

和段屯田荆林館

南山有佳色。無人空自奇。清詩爲題品。  
 便當勤鞭策。僕倦馬亦飢。草木變芬菲。  
 謝女得秀句。畱待中郎歸。

出城送客不及步至溪上二首

送客客已去。尋花花未開。未能城裏去。  
 今年好風雪。會見麥千堆。且復水邊來。  
 父老借問我。使君安在哉。

【一】

來春六十日。笑口幾回開。會作堂堂去。  
 東望峨眉小。廬山翠作堆。何妨得得來。  
 倦遊行老矣。舊隱賦歸哉。

游廬山次韻章傳道

塵容已似服輶駒。野性猶同縱壑魚。  
 雖無窈窕驅前馬。還有鷗夷挂後車。  
 出入巖巒千仞表。較量筋力十年初。  
 莫笑吟詩淡生活。當令阿買爲君書。

廬山五詠

盧敖洞

上界足官府。飛昇亦何益。還在此山中。  
 相逢不相識。

飲酒臺

博士雅好飲。空山誰與娛。莫向驪山去。  
 君王不喜儒。

聖燈巖

石室有金丹。山神不知祕。何必吐光芒。  
 夜半驚童稚。

三泉

皎皎巖下泉。無人還自潔。不用比三星。  
 清光同一月。



障日峰

長安自不遠。蜀客苦思歸。莫教名障日。喚作小峨眉。

次韻章傳道喜雨

去年夏旱秋不雨。	海畔居民飲鹹苦。	今年春暖欲生蠶。	地上戢戢多於土。
預憂一旦開兩翅。	口吻如風那肯吐。	前時渡江入吳越。	布陣橫空如項羽。
農夫拱手但垂泣。	人力區區固難禦。	撲緣髮尾困牛馬。	啖齧衣服穿房戶。
坐觀不救亦何心。	秉畀炎火傳自古。	荷鋤散掘誰敢後。	得米濟飢還小補。
常山山神信英烈。	搗駕雷公訶電母。	應隣郡守老且愚。	欲把瘡痍手摩撫。
山中歸時風色變。	中路已覺商羊舞。	夜窗騷騷鬧松竹。	朝畦泫泫流膏乳。
從來蝗旱必相資。	此事吾聞老農語。	庶將積潤掃遺孽。	收拾豐歲還明主。
縣前已審八千斛。	率以一升完一畝。	更看蠶婦過初眠。	未用賀客來旁午。
先生筆力吾所畏。	蹴踏鮑謝誇徐庾。	偶然談笑得佳篇。	便恐流傳成樂府。
陋邦一雨何足道。	吾君盛德九州普。	中和樂職幾時作。	試向諸生選何武。

謝郡人田賀二生獻花

城裏田員外。城西賀秀才。不愁家四壁。自有錦千堆。珍重尤奇品。艱難最後開。

芳心因落日。薄豔戰輕雷。老守尤多病。壯懷先已灰。殷勤此祭者。攀折爲誰哉。

玉腕揜紅袖。金樽瀉白醅。何當鑷霜鬢。強插滿頭回。

惜花

吉祥寺中錦千堆。	前年賞花真盛哉。	道人勸我清明來。	腰鼓百面如春雷。
打徹涼州花自開。	砂河塘上戴花回。	醉倒不覺吳兒哈。	豈知如今雙鬢摧。
城西古寺沒蒿萊。	有僧閉門手自栽。	千枝萬葉巧剪裁。	就中一叢何所似。
馬瑙盤盛金縷杯。	而我食菜方清齋。	對花不飲花應猜。	夜來雨雹如李梅。

和頓教授見寄用除夜韻

我笑陶淵明。種秫二頃半。婦言既不用。還有責子歎。無絃則無琴。何必勞撫玩。

我笑劉伯倫。醉髮蓬苒散。二豪苦不納。獨以鍾自伴。既死何用埋。此身同夜旦。

孰云二子賢。自結兩重案。笑人還自笑。出口談治亂。一生溷塵垢。晚以道自盥。

無成空得嬾。坐此百事緩。仄聞頓夫子。講道出新貫。豈無一尺書。恐不記庸懦。

陋邦貧且病。數米銖稱炭。慚愧章先生。十日坐空館。袖中出子詩。貪讀酒屢暖。

狂言各須慎。勿使輸薪粲。



和子由四首

韓太祝送遊太山

偶作郊原十日游。未應回首厭籠囚。但教塵土驅馳足。終把雲山爛漫酬。  
閒道逢春思濯錦。更須到處覓菟裘。恨君不上東封頂。夜看金輪出九幽。

送春

夢裏青春可得追。欲將詩句絆餘暉。酒闌病客惟思睡。蜜熟黃蜂亦懶飛。  
芍藥櫻桃俱掃地。鬢絲禪榻兩忘機。憑君借取法界觀。一洗人間萬事非。

首夏官舍即事

安石榴花開最遲。絳裙深樹出幽菲。吾廬想見無限好。客子倦遊胡不歸。  
坐上一樽雖得滿。古來四事巧相違。令人卻憶湖邊寺。垂柳陰陰晝掩扉。

送李供備席上和李詩

家聲赫奕蓋并涼。也解微吟錦瑟旁。擘水取魚湖起浪。引杯看劍坐生光。  
風流別後人人憶。才器歸來種種長。不用更貪窮事業。風騷分付與沈湘。

西齋

西齋深且明。中有六尺牀。病夫朝睡足。危坐覺日長。昏昏既非醉。踽踽亦非狂。

寒衣竹風下。穆然中微涼。起行西園中。草木含幽香。榴花開一枝。桑棗沃以光。  
鳴鳩得美蔭。因立忘飛翔。黃鳥亦自喜。新音變圓吭。杖藜觀物化。亦以觀我生。  
萬物各得時。我生日皇皇。

小兒

小兒不識愁。起坐牽我衣。我欲嗔小兒。老妻勸兒癡。兒癡君更甚。不樂愁何爲。  
還坐愧此言。洗盞當我前。大勝劉伶婦。區區爲酒錢。

寄劉孝叔

君王有意誅驕鹵。椎破銅山鑄銅虎。聯翩三十七將軍。走馬西來各開府。  
南山伐木作車軸。東海取鼉漫戰鼓。汗流奔走誰敢後。恐乏軍興汗質斧。  
保甲連村圍未遍。方田訟牒紛如雨。爾來手實降新書。扶別根株窮脈縷。  
詔書惻怛信深厚。吏能淺薄空勞苦。平生學問只流俗。衆裏笙竽誰比數。  
忽令獨奏鳳將雛。倉卒欲吹那得譜。況復連年苦饑饉。剝齧草木啖泥土。  
今年雨雪頗應時。又報蝗蟲生翅股。憂來洗盞欲強醉。寂寞虛齋臥空甌。  
公厨十日不生煙。更望紅裙踏筵舞。故人屢寄山中信。只有當歸無別語。  
方將雀鼠偷太倉。未肯衣冠挂神武。吳興丈人真得道。平日立朝非小補。



自從四方冠蓋開。歸作二浙湖山主。高蹤已自雜漁釣。大隱何嘗棄簪組。  
去年相從殊未足。問道已許談其粗。逝將棄官往卒業。俗緣未盡那得睹。  
公家只在雪溪上。上有白雲如白羽。應憐進退苦皇皇。更把安心教初祖。

孔長源挽詞二首

少年才氣冠當時。晚節孤風益自奇。君勝宜為夫子後。林宗不愧蔡邕碑。  
南荒尚記誅元惡。東越誰能事細兒。耆舊如今幾人在。為君無憾為時悲。  
小堰門頭柳繫船。吳山堂上月侵筵。潮聲夜半千巖響。詩句明朝萬口傳。  
豈意日斜庚子後。忽驚歲在己辰年。佳城一閉無窮事。南望題詩淚灑牋。

寄呂穆仲寺丞

孤山寺下水侵門。每到先看醉墨痕。楚相未亡談笑是。中郎不見典刑存。  
君先去踏塵埃陌。我亦來尋桑棗村。回首西湖真一夢。灰心霜鬢更休論。

余主簿母挽詞

閨庭蘭玉照鄉閭。自昔雖貧樂有餘。豈獨家人在中饋。卻因麟趾識關雎。  
雲駟忽已歸僊府。喬木依然擁舊廬。忍把還鄉千斛淚。一時灑向老萊裾。

送趙寺丞寄陳海州

景疏樓上喚蛾眉。君到應先誦此詩。若見孟公投轄飲。莫忘衝雪送君時。

答陳述古二首

漫說山東第二州。棗林桑泊負春游。城西亦有紅千葉。人老簪花卻自羞。

【一】

小桃破萼未勝春。羅綺叢中第一人。聞道使君歸去後。舞衫歌扇總成塵。

張安道樂全堂

列子御風殊不惡。猶被莊生譏數數。步兵飲酒中散琴。於此得全非至樂。  
樂全居士全於天。維摩丈室空翛然。平生痛飲今不飲。無琴不獨琴無絃。  
我公天與英雄表。龍章鳳姿照魚鳥。但令端委坐廟堂。北狄西戎談笑了。  
如今老去苦思歸。小字親書寄我詩。試問樂全全底事。無全何處更相虧。

張文裕挽詞

高才本出朝廷右。能事方推德業餘。每見便聞曹植句。至今傳寶魏華書。  
濟南名士新凋喪。劍外生祠已潔除。欲寄西風兩行淚。依然喬木鄭公廬。

懷西湖寄晁美叔同年

西湖天下景。游者無愚賢。淺深隨所得。誰能識其全。嗟我本狂直。早為世所捐。



獨專山水樂。付與寧非天。三百六十寺。幽尋遂窮年。所至得其妙。心知口難傳。至今清夜夢。耳目餘芳鮮。君持使者節。風采燦雲煙。清流與碧巘。安肯爲君妍。胡不屏騎從。暫借僧榻眠。讀我壁間詩。清涼洗煩煎。策杖無道路。直造意所便。應逢古漁父。葦閒自延緣。問道若有得。買魚勿論錢。

和梅戶曹會獵鐵溝

山西從古說三明。誰信儒冠也捍城。竿上鯨鯢猶未掩。草中狐兔不須驚。東州趙叟飲無敵。南國梅僊詩有聲。不向如臯閒射雉。歸來何以得卿卿。

祭常山回小獵

青蓋前頭點皂旗。黃茅岡下出長圍。弄風驕馬跑空立。趁兔蒼鷹掠地飛。回望白雲生翠巘。歸來紅葉滿征衣。白羽猶能效一揮。

和章七出守湖州二首

方丈僊人出淼茫。高情猶愛水雲鄉。他年相見話偏長。功名誰使連三捷。身世何緣得兩忘。早歲歸休心共在。只應未報君恩重。清夢時時到玉堂。

【二】

絳闕雲臺總有名。應須極貴又長生。鼎中龍虎黃金賤。松下龜蛇綠骨輕。

雲水未渾纓可濯。

弁峰初見眼應明。

兩卮春酒真堪羨。

獨占人間分外榮。

次韻劉貢父李公擇見寄二首

白髮相望兩故人。眼看時事幾番新。曲無和者應思郢。論少卑之且借秦。歲惡詩人無好語。夜長繅守向誰親。少思多睡無如我。鼻息雷鳴撼四隣。

【三】

何人勸我此閒來。絃管生衣甌有埃。綠蟻沾唇無百斛。蝗蟲撲面已三回。磨刀入谷追窮寇。灑涕循城拾棄孩。爲郡鮮歡君莫歎。猶勝塵土走章臺。

和張子野見寄三絕句

過舊遊。前生我已到杭州。到處長如到舊遊。更欲洞霄爲隱吏。一庵閒地且相留。

見題壁

狂吟跌宕無風雅。醉墨淋漓不整齊。應爲詩人一回顧。山僧未忍掃黃泥。

竹閣見憶

柏堂南畔竹如雲。此閣何人是主人。但遣先生披鶴氅。不須更畫樂天真。

和蔣夔寄茶



我生百事常隨緣。四方水陸無不便。扁舟渡江適吳越。三年飲食窮芳鮮。  
 金盞玉膾飯炊雪。海螯江柱初脫泉。臨風飽食甘寢罷。一甌花乳浮輕圓。  
 自從拾舟入東武。沃野便到桑麻川。大約更取酸生涎。誰記鹿角腥盤筵。  
 厨中蒸粟堆飯甕。故人猶作舊眼看。謂我好尚如當年。紫金百餅費萬錢。  
 清詩兩幅寄千里。老妻穉子不知愛。一半已入薑鹽煎。人生所遇無不可。  
 死生禍福久不擇。更論甘苦爭蚩妍。知君窮旅不自釋。因詩寄謝聊相鐫。

光祿庵二首

文章恨不見文園。禮樂方將訪石泉。何事庵中著光祿。枉教閒處筆如椽。

【二】

城中太守的何人。林下先生非我身。若向庵中覓光祿。雪中履迹鏡中真。

蘇東坡詩集卷十四

古今體詩

六十首

立春日病中邀安國仍請率禹功同來僕雖不能飲當請成伯主會某當

杖策倚几於其閒觀諸公醉笑以撥滯悶也二首

孤燈照影夜漫漫。拈得花枝不忍看。白髮敲簪羞彩勝。黃耆煮粥薦春盤。

東方烹狗陽初動。南陌爭牛臥作團。老子從來興不淺。向隅誰有滿堂歡。

【三】

齋居臥病禁煙前。辜負名花已一年。此日使君不强喜。早春風物爲誰妍。  
 青衫公子家千里。白髮先生杖百錢。曷不相將來問病。已教呼取散花天。

答李邦直

美人如春風。著物物未知。羈愁似冰雪。見子先流澌。子從徐方來。吏民舉熙熙。  
 扶病出見之。驚我一何衰。知我久慵倦。起我以新詩。詩詞如醇酒。盎然熏四支。  
 徑飲不覺醉。欲和先昏疲。西齋有蠻帳。風雨夜紛披。放懷語不擇。撫掌笑脫頤。



別來今幾何。春物已含姿。柳色日夜暗。子來竟何時。徐方雖云樂。東山禁游嬉。又無狂太守。何以解憂思。聞子有賢婦。華堂詠螽斯。曷不倒囊橐。賣劍買蛾眉。不用教絲竹。唱我新歌詞。

和文與可洋川園池三十首

湖橋

朱欄畫柱照湖明。白葛烏紗曳履行。橋下龜魚晚無數。識君拄杖過橋聲。

橫湖

貪看翠蓋擁紅粧。不覺湖邊一夜霜。卷卻天機雲錦段。從教匹練寫秋光。

書軒

雨昏石硯寒雲色。風動牙籤亂葉聲。庭下已生書帶草。使君疑是鄭康成。

冰池

不嫌冰雪繞池看。誰似詩人巧耐寒。記取羲之洗硯處。碧琉璃下黑蛟蟠。

竹塢

晚節先生道轉孤。歲寒惟有竹相娛。麤才社牧真堪笑。喚作軍中十萬夫。

荻蒲

雨折霜乾不耐秋。白花黃葉使人愁。月明小艇湖邊宿。便是江南鸚鵡洲。

蓼嶼

秋歸南浦蟪蛄鳴。霜落橫湖沙水清。臥雨幽花無限思。抱叢寒蝶不勝情。

望雲樓

陰晴朝暮幾回新。已向虛空付此身。出本無心歸亦好。白雲還似望雲人。

天漢臺

漾水東流舊見經。銀潢左界上通靈。此臺試向天文覓。閣道中間第幾星。

待月臺

月與高人本有期。挂簷低戶映蛾眉。只從昨夜十分滿。漸覺冰輪出海遲。

二樂榭

此閒真趣豈容談。二樂并君已是三。仁智更煩訶妄見。坐令魯叟作瞿曇。

灤泉亭

聞道池亭勝兩川。應須爛醉答雲煙。勸君多揀長腰米。消破亭中萬斛泉。

吏隱亭

縱橫憂患滿人閒。頗怪先生日日閒。昨夜清風眠北牖。朝來爽氣在西山。



霜筠亭

解籜新篁不自持。

嬋娟已有歲寒姿。

要看凜凜霜前意。

須待秋風粉落時。

無言亭

殷勤稽首維摩詰。

敢問如何是法門。

彈指未終千偈了。

向人還道本無言。

露香亭

亭下佳人錦繡衣。

滿身瓔珞綴明璣。

晚香消歇無尋處。

花已飄零露已晞。

涵虛亭

水軒花榭兩爭妍。

秋月春風各自偏。

惟有此亭無一物。

坐觀萬景得天全。

谿光亭

決去湖波尚有情。

卻隨初日動蒼楹。

溪光自古無人畫。

憑仗新詩與寫成。

過溪亭

身輕步穩去忘歸。

四柱亭前野竹微。

忽悟過溪還一笑。

水禽驚落翠毛衣。

披錦亭

煙紅露綠曉風香。

燕舞鶯啼春日長。

誰道使君貧且老。

繡屏錦帳咽笙簧。

褱亭

曲池流水細鱗鱗。

高會傳觴似洛濱。

紅粉翠蛾應不要。

畫船來往勝於人。

茵茗亭

日日移牀趁下風。

清香不斷思何窮。

若爲化作龜千歲。

巢向田田亂葉中。

茶蘼洞

長憶故山寒食夜。

野茶蘼發暗香來。

分無素手簪羅髻。

且折霜蕤浸玉醅。

篔簹谷

漢川修竹賤如蓬。

斤斧何曾赦籜龍。

料得清貧饒太守。

渭川千畝在胸中。

寒蘆港

溶溶晴港漾春暉。

蘆筍生時柳絮飛。

還有江南風物否。

桃花流水紫魚肥。

野人廬

少年辛苦事犁鋤。

剛厭青山遠故居。

老覺華堂無意味。

卻須時到野人廬。

此君庵

寄語庵前抱節君。

與君到處合相親。

寫真雖是文夫子。

我亦真堂作記人。

金橙徑

金橙縱復里人知。

不見鱸魚價自低。

須是松江煙雨裏。

小船燒薤擣香齏。



南園

不種天桃與綠楊。

使君應欲候農桑。

春疇雨過羅紈膩。

麥壠風來餅餌香。

北園

漢水巴山樂有餘。

一麾從此首歸塗。

北園草木憑君問。

許我他年作主無。

寄題刁景純藏春塢

白首歸來種萬松。

待看千尺舞霜風。

年拋造物陶甄外。

春在先生杖屨中。

楊柳長齊低戶暗。

櫻桃爛熟滴階紅。

何時卻與徐元直。

共訪襄陽龐德公。

玉盤盂二首并引

東武舊俗每歲四月大會于南禪資福兩寺以芍藥供佛而今歲最盛凡七千餘朵皆重跗累萼繁麗豐碩中有白花正圓如覆盂其下十餘葉稍大承之如盤姿格絕異獨出於七千朵之上云得之于城北蘇氏園中周宰相莒公之別業也而其名俚甚乃為易之雜花狼藉占春餘芍藥開時掃地無兩寺粧成寶瓔珞一枝爭看玉盤盂佳名會作新翻曲絕品難逢舊畫圖從此定知年穀熟姑山親見雪肌膚

【二】

花不能言意可知。

令君痛飲更無疑。

但持白酒勸佳客。

直待瓊舟覆玉彝。

負郭相君初擇地。

看羊屬國首吟詩。

吾家豈與花相厚。

更問殘芳有幾枝。

和潞公超然臺次韻

我公厭富貴常苦勸業尋相期赤松子永望白雲岑清風出談笑萬竅為號吟吟成超然詩洗我蓬之心嗟我本何人麋鹿強冠襟身微空志大交淺屢言深囑公如得謝呼我幸寄音但恐酒錢盡煩公揮橐金

聞喬太博換左藏知欽州以詩招飲

今年果起故將軍。

幽夢清詩信有神。

馬革裹屍真細事。

虎頭食肉更何人。

陣雲冷壓黃茅瘴。

羽扇斜揮白葛巾。

痛飲從今有幾日。

西軒月色夜來新。

喬將行烹鷺鹿出刀劔以飲客以詩戲之

破匣哀鳴出素虬。

倦看鴟鴞聽呦呦。

明朝只恐兼烹鶴。

此去還須卻佩牛。

便可先呼報恩子。

不妨仍帶醉鄉侯。

他年萬騎歸應好。

奈有移文在故邱。

奉和成伯兼戲禹功

金錢石竹道傍秋。

翠黛紅裙馬上謳。

無限小兒齊拍手。

山公又作習池遊。

寄黎眉州

膠西高處望西川。

應在孤雲落照邊。

瓦屋寒堆春後雪。

峩眉翠掃雨餘天。



治經方笑春秋學。

好士今無六一賢。

且待淵明賦歸去。

共將詩酒趁流年。

和趙郎中捕蝗見寄次韻

麥穗人許長。穀苗牛可沒。天公獨何意。忍使蝗蟲發。驅攘著令典。農事安可忽。我僕既胼胝。我馬亦款矻。飛騰漸云少。筋力亦已竭。苟無百篇詩。何以醒睡兀。初如疏畎澮。漸若決漈渤。往來供十吏。腕脫不容歇。平生輕妄庸。熟視笑魏勃。愛君有逸氣。詩壇專斬伐。民病何時休。吏職不可越。慎毋及世事。向空書咄咄。

登常山絕頂廣麗亭

西望穆陵關。東望琅邪臺。南望九僊山。北望空飛埃。相將叫虞舜。遂欲歸蓬萊。嗟我二三子。狂飲亦荒哉。紅裙欲僊去。長笛有餘哀。清歌入雲霄。妙舞纖腰回。自從有此山。白日封蒼苔。何嘗有此樂。將去復徘徊。人生如朝露。白髮日夜催。棄置當何言。萬劫終飛灰。

薄薄酒二首并引

膠西先生趙明叔家貧好飲。不擇酒而醉。常云。薄薄酒勝茶湯。醜醜婦勝空房。其言雖俚而近乎達。故推而廣之。以補東州之樂府。既又以爲未也。復自和一篇。聊以發覽者之一噱云爾。

薄薄酒勝茶湯。醜醜婦勝空房。五更待漏鞦韆霜。不如三伏日高。睡足北窗涼。珠襦玉柙。萬人相送歸北邙。不如懸鶉百結。獨坐負朝陽。生前富貴死後文章。百年瞬息萬世忙。夷齊盜跖俱亡羊。不如眼前一醉。是非憂樂兩都忘。

【一】

薄薄酒飲兩鍾。麤麤布著兩重。美惡雖異醉暖同。醜妻惡妾壽乃公。隱居求志義之從。本不計較東華塵。土北窗風。百年雖長要有終。富死未必輸生窮。但恐珠玉留君客。千載不朽遭樊崇。文章自足欺盲聾。誰使一朝富貴面發紅。達人自達酒何功。世閒是非憂樂本來空。

同年王中甫挽詞

先帝親收十五人。四方爭看擊鵬鷗。如君事業真堪用。顧我衰遲不足論。出處升沈十年後。死生契濶幾人存。他時京口尋遺跡。宿草猶應有淚痕。奉和成伯大雨中會客解嘲

樂事難并真實語。坐排用意多乖誤。興來取次或成歡。瓦鉤卻勝黃金注。我生禍患久不擇。肯爲一時風雨阻。天公變化豈有常。明月行看照歸路。



七月五日二首

避謗詩尋醫。畏病酒入務。蕭條北窗下。長日誰與度。今年苦炎熱。草木困薰煮。況我早衰人。幽居氣如縷。秋來有佳興。秫稻已含露。還復此微吟。往和糟牀注。

【二】

何處覓新秋。蕭然北臺上。秋來未云幾。風日已清亮。雲閒聳孤翠。林表浮遠漲。新棗漸堪剝。晚瓜猶可餉。西風送落日。萬竅含悽愴。念當急行樂。白髮不汝放。

趙郎中見和戲復答之

趙子吟詩如潑水。一揮三百六十字。奈何效我欲尋醫。恰似西施藏白地。趙子飲酒如淋灰。一年十萬八千杯。若不令君早入務。飲竭東海生黃埃。我衰臨政多繆錯。羨君精采如秋鶚。頗哀老子令日飲。為君坐嘯主畫諾。

次韻周邠寄鴈蕩山圖二首

指點先憑採藥翁。丹青化出大槐宮。眼明小閣浮煙翠。齒冷新詩嚼雪風。二華行看雄陝右。九仙今已壓京東。此生的有尋山分。已覺溫台落手中。

【二】

西湖三載與君同。馬入塵埃鶴入籠。東海獨來看出日。石橋先去踏長虹。

遙知別後添華髮。時向尊前說病翁。所恨蜀山君未見。他年攜手醉郵筒。

和魯人孔周翰題詩二首并引

孔周翰嘗為仙源令。中秋夜以事留於東武官舍中。時陳君宗古任君建中皆在郡。其後十七年中秋。周翰持節過郡。而二君已亡。感時懷舊。留詩於壁。又其後五年中秋。軾與客飲於超然臺上。聞周翰乞此郡。客有誦其詩者。乃次其韻二篇。以為他日一笑。

壞壁題詩已五年。故人風物兩依然。定知來歲中秋月。又照先生枕麴眠。

【二】

更邀明月說明年。記取孤吟孟浩然。此去宦遊如傳舍。揀枝驚鵲幾時眠。

送碧香酒與趙明叔教授

聞君有婦賢且廉。勸君慎勿為楚相。不羨紫駝分御食。自遣赤脚沽村釀。嗟君老狂不知愧。更吟醜婦惡嘲謗。諸生聞語定失笑。冬暖號寒臥無帳。碧香近出帝子家。鵝兒破殼酥流盎。不學劉伶獨自飲。一壺往助齊眉餉。

趙既見和復次韻答之

長安小吏天所放。日夜歌呼和丞相。豈知後世有阿瞞。北海樽前捉私釀。先生未出禁酒國。詩語孤高常近謗。幾回無酒欲沽君。卻畏有司書簿帳。



酸寒可笑分一斗。日飲無何足袁盎。更將險語壓衰翁。只恐自是臺無餉。

趙郎中往莒縣逾月而歸復以一壺遺之仍用前韻

東鄰主人游不歸。悲歌夜夜聞春相。門前人鬧馬嘶急。一家喜氣如春釀。

玉事何曾怨獨賢。室人豈忍交謫謗。大兒踉蹌越門限。小兒呶啞語繡帳。

定教舞袖掣伊涼。更想夜庖鳴甕盎。題詩送酒君勿誚。免使退之嘲一餉。

蘇潛聖挽詞

妙齡馳譽百夫雄。晚節忘懷大隱中。悃悃無華真漢吏。文章爾雅稱吾宗。

趨時肯負平生志。有子還應不死同。惟我閒思十年事。數行老淚寄西風。

和晁同年九日見寄

仰看鶯鶯刺天飛。富貴功名老不思。病馬已無千里志。騷人長負一秋悲。

古來重九皆如此。別後西湖付與誰。遣子窮愁天有意。吳中山水要清詩。

送喬施州

恨無負郭田二頃。空有載行書五車。江上青山橫絕壁。雲間細路躡飛蛇。

鷄號黑暗通蠻貨。蜂鬧黃連採蜜花。共怪河南門下士。不應萬里向長沙。

雪夜獨宿柏仙庵

晚雨纖纖變玉雲。小庵高臥有餘清。夢驚忽有穿窗片。夜靜惟聞瀉竹聲。

稍壓冬溫聊得健。未濡秋旱若為耕。天公用意真難會。又作春風爛漫晴。

和孔郎中荆林馬上見寄

秋禾不滿眼。宿麥種亦稀。永愧此邦人。芒刺在膚肌。平生五千卷。一字不救饑。

方將怨無襦。忽復歌緇衣。堂堂孔北海。直氣凜羣兒。朱輪未及郊。清風已先馳。

何以累君子。十萬貧與羸。滔滔滿四方。我行竟安之。何時劔關路。春山聞子規。

別東武流杯

莫笑官居如傳舍。故應人世等浮雲。百年父老知誰在。惟有雙松識使君。

留別零泉

舉酒屬零泉。白髮日夜新。何時泉中天。復照泉上人。二年飲泉水。魚鳥亦相親。

還將弄泉手。遮日向西秦。

留別釋迦院牡丹呈趙倅

春風小院初來時。壁閒惟見使君詩。應問使君何處去。憑花說與春風知。

年年歲歲何窮已。花似今年人老矣。去年崔護若重來。前度劉郎在千里。

董儲郎中嘗知眉州與先人遊過安邱訪其故居見其子希甫留詩屋壁



自髮郎潛舊使君。至今人道最能文。雙雞敢忘橋公語。下馬來尋董相墳。  
冬月負薪雖得免。鄰人吹笛不堪聞。死生契濶君休問。灑淚西南向白雲。

### 蘇東坡詩集卷十五

#### 今古體詩

六十首

除夜大雪留濰州。元日早晴。遂行中途雪復作。

除夜雪相留。元日晴相送。東風吹宿酒。瘦馬兀殘夢。葱曠曉光開。旋轉餘花弄。  
下馬成野酌。佳哉誰與共。須臾晚雲合。亂灑無缺空。鵝毛垂馬鬣。自怪騎白鳳。  
三年東方旱。逃戶連敲棟。老農釋耒歎。淚入饑腸痛。春雪雖云晚。春麥猶可種。  
敢怨行役勞。助爾歌飯甕。

大雪青州道上有懷東武園亭寄交代孔周翰

超然臺上雪。城郭山川兩奇絕。海風吹碎碧琉璃。時見三山白銀闕。蓋公堂前雪。  
綠窗朱戶相明滅。堂中美人雪爭妍。粲然一笑玉齒頰。就中山堂雪更奇。青松怪  
石亂瓊絲。惟有使君游不歸。五更馬上愁斂眉。君不見淮西李侍中。夜入蔡州縛

取吳元濟。又不見襄陽孟浩然。長安道上騎驢吟雪詩。何當閉門飲美酒。無人毀

譽河東守。

至濟南李公擇以詩相迎次其韻二首

敝裘羸馬古河濱。野闊天低糝玉塵。自笑餐氈典屬國。來看換酒謫仙人。  
宦遊到處身如寄。農事何時手自親。剩作新詩與君和。莫因風雨廢鳴晨。

#### 【二】

夜擁笙歌雪水濱。回頭樂事總成塵。今年送汝作太守。到處逢君是主人。  
聚散細思都是夢。身名漸覺兩非親。相從繼燭何須問。蝙蝠飛時日正晨。

和孔君亮郎中見贈

偶對先生盡一樽。醉看萬物洶崩奔。優游共我聊卒歲。骯髒如君合倚門。  
只恐掉頭難久住。應須傾蓋便深論。固知嚴勝風流在。又見長身十世孫。

顏樂亭詩并敘

顏子之故居所謂陋巷者有井存焉。而不在顏氏久矣。膠西太守孔君宗翰始得其地。浚  
治其井。作亭於其上。命之曰顏樂。昔夫子以簞食瓢飲賢顏子。而韓子乃以為哲人之細  
事。何哉。蘇子曰。古之觀人也。必於小者觀之。其大者容有僞焉。人能碎千金之璧。不能無



失聲於破釜。能搏猛虎。不能無變色。於蜂蠶。孰知簞食瓢飲之為哲人之大事乎。乃作顏樂亭詩。以遺孔君。正韓子之說。且用以自警云。

天生烝民。為之鼻口。美者可嚼。芬者可嗅。美必有惡。芬必有臭。我無天游。六鑿交鬪。驚而不返。跬步商受。偉哉先師。安此微陋。孟賁股栗。虎豹卻走。眇然其身。中亦何有。我求至樂。千載無偶。執瓢從之。忽焉在後。

送范景仁游洛中

小人真闇事。閒追豈公難。道大吾何病。言深聽者寒。憂時雖早白。駐世有還丹。得酒相逢樂。無心所遇安。去年行萬里。蜀路走千盤。投老身彌健。登山意未闌。西游為櫻筍。東道盡鸚鵡。杖屨攜兒去。園亭借客看。折花斑竹寺。弄水石樓灘。鬻馬衰憐白。驚雷怯笑韓。蘇書標洞府。松蓋偃天壇。試與劉夫子。重尋靖長官。次韻景仁留別

京師哭任道聖

公老我亦衰。相見恨不數。臨行一杯酒。此意重山嶽。歌詞白紵清。琴弄黃鍾濁。詩新眇難和。飲少僅可學。欲參兵部選。有力誰如犖。且作東諸侯。山城雄鼓角。南遊許過我。不憚千里邈。會當聞公來。倒屣髮一握。

書韓幹牧馬圖

十年不還鄉。兒女日夜長。豈惟催老大。漸復成凋喪。每聞耆舊亡。涕泣聲輒放。老任況奇逸。先子推輩行。文章得少譽。詩語尤清壯。吏能復所長。談笑萬夫上。自喜作劇縣。偏工破豪黨。奮髯走猾吏。嚼齒對姦將。哀哉命不偶。每以才得謗。竟使落窮山。青衫就黃壤。宦遊久不樂。江海永相望。退耕本就君。時節相勞餉。此懷今不遂。歸見纍纍葬。望哭國西門。落日銜千嶂。平生惟一子。抱負珠在掌。見之齟齬中。已有食牛量。他年如入洛。生死一相訪。惟有王濬沖。心知中散狀。

南山之下

汧渭之間

想見開元天寶年

八坊分屯隘秦川

四十萬匹如雲煙。雕駟駟駘驪騮。白魚赤兔駢皇輜。龍顛鳳頸瘳且妍。奇姿逸德隱駑頑。碧眼胡兒手足鮮。歲時翦刷供帝閑。柘袍臨池侍三千。紅粧照日光流淵。樓下玉螭吐清寒。往來蹙踏生飛湍。衆工舐筆和朱鉛。先生曹霸弟子韓。廐馬多肉尻圓。肉中畫骨誇尤難。金羈玉勒繡羅鞍。鞭箠刻烙傷天全。不如此圖近自然。平沙細草荒芊綿。驚鴻脫兔爭後先。王良挾策飛上天。何必俛首服短轅。

送魯元翰少卿知衛州



冗士無處著。寄身范公園。桃李忽成陰。薺麥秀已繁。閉門春晝永。惟有黃蜂喧。  
 誰人肯攜酒。共醉榆柳村。髯卿獨何者。一月三到門。我不往拜之。髯來意彌敦。  
 堂堂元老後。疊疊仁人言。憶在錢塘歲。情好均弟昆。時於冰雪中。笑語作春溫。  
 欲飲徑相覓。夜開叢竹軒。搜尋到篋笥。鮓醢無復存。每愧煙火中。玉腕親炮燔。  
 別來今幾何。相對如夢魂。告我當北渡。新詩侑清樽。坡陁太行麓。洶湧黃河翻。  
 仕宦非不遇。王畿西北垣。斯民如魚耳。見網則驚奔。皎皎千丈清。不如尺水渾。  
 刑政雖首務。念當養其源。一聞襦袴音。盜賊安足論。

次韻子由送蔣夔赴代州學官

功利爭先變法初。典型獨守老成餘。窮人未信詩能爾。倚市懸知繡不如。  
 代北諸生漸狂簡。牀頭雜說為爬梳。歸來問雁吾何敢。疾世王符解著書。

宿州次韻劉涇

我欲歸休瑟漸希。舞雩何日著春衣。多情白髮三千丈。無用蒼皮四十圍。  
 晚覺文章真小技。早知富貴有危機。為君垂涕君知否。千古華亭鶴自飛。

和李邦直沂山祈雨有應

高田生黃埃。下田生蒼耳。蒼耳亦已無。更問麥有幾。蛟龍睡足亦解慙。二麥枯

時雨如洗。不知雨從何處來。但聞呂梁百步聲如雷。試上城南望城北。際天菽粟  
 青成堆。飢火燒腸作牛吼。不知待得秋成否。半年不雨坐龍慵。共怨天公不怨龍。  
 今朝一雨聊自贖。龍神社鬼各言功。無功日盜太倉穀。嗟我與龍同此責。勸農使  
 者不汝容。因君作詩先自劾。

徐州送交代仲達少卿

此身無用且東來。賴有江山慰不才。舊尹未嫌衰廢久。清樽猶許再三開。  
 滿城遺愛知誰繼。極目扁舟挽不回。歸去青雲還記否。交遊勝絕古城隈。

和孔密州五絕

見邸家園留題

大旆傳聞載酒過。小詩未忍著磚磨。陽關三疊君順秘。除卻膠西不解歌。

春步西園見寄

歲歲開園成故事。年年行樂不辜春。今年太守尤難繼。慈愛聰明惠利人。

東欄梨花

梨花淡白柳深青。柳絮飛時花滿城。惆悵東欄二株雪。人生看得幾清明。

和流杯石上草書小詩



蜂腰鶴膝嘲希逸。

春蚓秋蛇病子雲。

醉裏自書醒自笑。

如今二絕更逢君。

堂後白牡丹

城西千葉豈不好。

笑舞春風醉臉丹。

何似後堂冰玉潔。

遊蜂非意不相干。

和趙郎中見戲二首

燕子人亡三百秋。

捲簾那復似揚州。

西行未必能勝此。

空唱崔徽上白樓。

【一】

我擊藤牀君唱歌。

明年六十奈君何。

醉顛只要裝風景。

莫向人前自洗磨。

次韻子由與顏長道同遊百步洪相地築亭種柳

平明坐衙不暖席。

歸來閉閣閉終日。

臥聞客至倒屣迎。

兩眼蒙籠餘睡色。

城東泗水步可到。

路轉河洪翻雪白。

安得青絲絡駿馬。

蹙踏飛波柳陰下。

奮身三丈兩蹄閒。

振鬣長鳴聲自乾。

少年狂興久已謝。

但憶嘉陵繞劍關。

劍關大道車方軌。

君自不去歸何難。

山中故人應大笑。

築室種柳何時還。

次韻李邦直感舊

騎騎傳呼出跨坊。

簿書填委入充堂。

誰教按部如何武。

只許清樽對孟光。

婉婉有時來入夢。

溫柔何日聽還鄉。

酸寒病守尤堪笑。

千步空餘僕射場。

與梁先舒煥泛舟得臨釀字二首

彭城古戰國。

孤客勸登臨。

汗洒交流處。

清潭百丈深。

故人輕千里。

爾足來相尋。

何以娛嘉客。

潭水洗君心。

【二】

老守厭簿書。

先生罷函丈。

風流魏晉閒。

談笑羲皇上。

河洪忽已過。

水色綠可釀。

君無輕此樂。

此樂清且放。

次韻答邦直子由五首

簿書顛倒夢魂閒。

知我疎慵肯見原。

閒作閉門僧舍冷。

臥聞吹枕海濤喧。

忘懷杯酒逢人共。

引睡文書信手翻。

欲吐狂言喙三尺。

怕君嗔我卻須吞。

【三】

城南短李好交遊。

箕踞狂歌不自由。

尊主庇民君有道。

樂天知命我無憂。

醉呼妙舞留連夜。

閒作清詩斷送秋。

瀟灑使君殊不俗。

樽前容我攬須不。

【三】

老弟東來殊寂寞。

故人留飲慰酸寒。

草荒城角開新徑。

雨入河洪失舊灘。

車馬追陪跡未掃。

唱酬往復字應漫。

此詩更欲憑君改。

待與江南子布看。



【四】

君雖爲我此遲留。別後淒涼我已憂。不見便同千里遠。退歸終作十年游。  
恨無揚子一區宅。懶臥元龍百尺樓。聞道鷓鴣滿臺閣。網羅應不到沙鷗。

【五】

五斗塵勞尙足留。閉關卻欲治幽憂。羞爲毛遂囊中穎。未許朱雲地下遊。  
無事會須成好飲。思歸時欲賦登樓。羨君幕府如僧舍。日向城南看浴鷗。

司馬君實獨樂園

青山在屋上。流水在屋下。中有五畝園。花竹秀而野。花香襲杖履。竹色侵杯斝。  
樽酒樂餘春。棋局消長夏。洛陽古多士。風俗猶爾雅。先生臥不出。冠蓋傾洛社。  
雖云與衆樂。中有獨樂者。才全德不形。所貴知我寡。先生獨何事。四海望陶冶。  
兒童誦君實。走卒知司馬。持此欲安歸。造物不我捨。名聲逐吾輩。此病天所赭。  
撫掌笑先生。年來效瘖啞。

送顏復兼寄王鞏

彭城官居冷如水。誰從我遊顏氏子。我衰且病君亦窮。衰窮相守正其理。  
胡爲一朝捨我去。輕衫觸熱行千里。問君無乃求之與。答我不然聊爾耳。

京師萬事日日新。故人如故今有幾。君知牛行相君宅。扣門但覓王居士。  
清詩草聖俱入妙。別後寄我書連紙。苦恨相思不相見。約我重陽嗅霜藥。  
君歸可喚與俱來。未應指目妨進擬。太乙老仙閒不出。踵門問道今時矣。  
因行過我路幾何。願君推挽加鞭箠。吾儕一醉豈易得。買羊釀酒從今始。

蝸 虎

黃雞啄蝸如啄黍。窗間守宮稱蝸虎。閨中繳尾伺飛蟲。巧捷功夫在腰膂。  
跂跂脈脈善緣壁。陋質從來誰比數。今年歲早號蜥蜴。狂走兒童鬧歌舞。  
能銜渠水作冰雹。便向蛟龍覓雲雨。守宮努力搏蒼蠅。明年歲早當求汝。

子由將赴南都與余會宿於逍遙堂作兩絕句讀之殆不可爲懷因和其  
詩以自解余觀子由自少曠達天資近道又得至人養生長年之訣而余  
亦竊聞其一二以爲今者宦游相別之日淺而異時退休相從之日長既  
以自解且以慰子由云

別期漸近不堪聞。風雨蕭蕭已斷魂。猶勝相逢不相識。形容變盡語音存。

【二】

但令朱雀長金花。此別還同一轉車。五百年閒誰復在。會看銅狄兩咨嗟。



留題石經院三首

葱蒨門前路。行穿翠密中。卻來堂上看。巖谷意無窮。

【一】

天矯庭中檜。枯枝鵲踏消。瘦皮纏鶴骨。高頂轉龍腰。

【二】

窈窕山題井。潛通伏澗清。欲知深幾許。聽放轆轤聲。

過雲龍山人張天驥

郊原雨初足。風日清且好。病守亦欣然。肩輿白門道。荒田咽蛩蚓。邨巷懸梨棗。下有幽人居。閉門空雀噪。西風高正厲。落葉粉可掃。孤童臥斜日。病馬放秋草。墟里通有無。垣墻任摧倒。君家本冠蓋。絲竹鬧鄰保。脫身聲利中。道德自濯澡。躬耕抱羸疾。奉養百歲老。詩書膏吻頰。菽水媚翁媪。饑寒天隨子。杞菊自擷芣。慈孝董邵南。雞狗相乳抱。吾生如寄耳。歸計失不蚤。故山豈敢忘。但恐迫華皓。從君好種秫。斗酒時自勞。

贈王仲素寺丞

養氣如養兒。棄官如棄泥。人皆笑子拙。事定竟誰迷。歸耕獨患貧。問子何所齎。

尺宅足自庇。寸田有餘畦。明珠照短褐。陋室生虹霓。雖無孔方兄。顧有法喜妻。彈琴一長嘯。不答阮與嵇。曹南劉夫子。名與子政齊。家有鴻寶書。不鑄金裹蹄。促膝問道要。遂蒙分刀圭。不忍獨不死。尺書肯見梯。我生本強鄙。少以氣自擠。孤舟倒江河。赤手攬象犀。年來稍自笑。留氣下暖臍。苦恨聞道晚。意象颯已淒。空見孫思邈。區區賦病梨。

陽關詞三首

受降城下紫髯郎。戲馬臺前古戰場。恨君不取契丹首。金甲牙旗歸故鄉。

右贈張繼愿

【一】

濟南春好雪初晴。行到龍山馬足輕。使君莫忘雪溪女。時作陽關腸斷聲。

右答李公擇

【二】

暮雲收盡溢清寒。銀燭無聲轉玉盤。此生此夜不長好。明日明年何處看。

右中秋月

和孔周翰二絕



再觀邱園留題

小園香霧曉蒙籠。醉守狂詞未必工。魯叟錄詩應有取。曲收彤管邳鄆風。

觀淨觀堂效韋蘇州詩

弱羽巢林在一枝。幽人蝸舍兩相宜。樂天長短三千首。卻愛韋郎五字詩。

答任師中家漢公

先君昔未仕。杜門皇祐初。道德無貧賤。風采照鄉閭。何嘗疎小人。小人自闕疎。出門無所詣。老史在郊墟。門前萬竿竹。堂上四庫書。高樹紅消梨。小池白芙蕖。常呼赤脚婢。雨中擷園蔬。矯矯任夫子。罷官還舊廬。是時里中兒。始識長者車。烹雞酌白酒。相對歡有餘。有如龐德公。往還葛與徐。妻子走堂下。主人竟誰歟。我時年尚幼。作賦慕相如。侍立看君談。精悍實起予。歲月曾幾何。耆老逝不居。史侯最先歿。孤墳拱桑樗。我亦涉萬里。清血滿襟袪。漂流二十年。始悟萬緣虛。獨喜任夫子。老佩刺史魚。威行烏白蠻。解辦請冠裾。方當入奏事。清廟陳璠璣。胡爲厭軒冕。歸意不少紓。上蔡有良田。黃沙走清渠。罷亞百頃稻。雍容十年儲。閒隨李丞相。搏射鹿與猪。蒼鷹十斤重。猛犬如黃驢。豈比陶淵明。窮苦自把鋤。我今四十二。衰髮不滿梳。彭城古名郡。乏人偶見除。頭顱已可知。幾何不樵漁。

會當相從去。芒鞋老菑畬。念子漳江邊。懷抱向誰據。賴我同年友。相歡出同輿。冰盤薦文鮓。玉學傾浮蛆。醉中忽思我。清詩綴瓊瑀。知我少所諧。教我時卷舒。世事日反覆。翩如風中旗。雀羅弔廷尉。秋扇悲婕妤。升沈一何速。喜怒紛衆狙。作詩謝二子。我師穉與遽。

初別子由

我少知子由。天資和而清。好學老益堅。表裏漸融明。豈獨爲吾弟。要是賢友生。不見六七年。微言誰與賡。常恐坦率性。放縱不自程。會合亦何事。無言對空枰。使入之意消。不善無由萌。森然有六女。包裹布與荆。無憂賴賢婦。藜藿等大烹。使子得行意。青衫陋公卿。明日無晨炊。倒牀作雷鳴。秋眠我東閣。夜聽風雨聲。懸知不久別。妙理難細評。昨日忽出門。孤舟轉西城。歸來北堂上。古屋空崢嶸。退食悞相從。入門中自驚。南都信繁會。人事水火爭。念當閉閣坐。頽然寄聾盲。妻子亦細事。文章固虛名。會須掃白髮。不復用黃精。

次韻呂梁仲屯田

雨葉風花日夜稀。一杯相屬竟何時。空虛豈敢酬瓊玉。枯朽猶能出菌芝。門外呂梁從迅急。胸中雲夢自逶遲。待君筆力追靈運。莫負南臺九日期。



王鞏屢約重九見訪。既而不至。以詩送將官梁交。且見寄。次韻答之。交頗文雅。不類武人。家有侍者甚惠麗。

知君月下見傾城。破恨懸知酒有兵。老守亡何惟日飲。將軍競病自詩鳴。花枝不共秋敲帽。筆陣空來夜斫營。愛惜微官將底用。他年只好寫銘旌。

臺頭寺雨中送李邦直赴史館。分韻得憶字。兼寄孫巨源二首。

霜林日夜西風急。老送君歸百憂集。清歌窈眇入行雲。雲爲不行天爲泣。紅葉黃花秋正亂。白魚紫蟹君須憶。憑君說向髯將軍。衰病相逢應不識。

【二】

珥筆西歸近紫宸。太平典冊不緣麟。付君此事寧論晉。載我當時舊過秦。門外想無千斛米。墓中知有百年人。看君兩眼明如鏡。休把春秋坐素臣。

代書答梁先

此身與世真悠悠。蒼顏華髮誰汝留。強名太守古徐州。忘歸不如楚沐猴。魯人豈獨不知丘。麟藉夫子無罪尤。異哉梁子清而修。不遠千里從我遊。瞭然正色懸雙眸。世之所馳子獨不。一經通明傳節侯。小楷精絕規摹歐。我衰廢學嬾且媮。畏見問事賈長頭。別來紅葉黃花秋。夜夢見之起坐愁。

遺我駿石盆與甌。

黑質白章聲琳球。

謂言山石生澗溝。

追琢尙可王公羞。

感子佳意能無酬。

反將木瓜報珍投。

學如富賈在博收。

仰取俯拾無遺籌。

道大如天不可求。

修其可見致其幽。

願子篤實慎勿浮。

發憤忘食樂忘憂。

九日邀仲屯田爲大水所隔。以詩見寄。次其韻。

無復龍山對孟嘉。

西來河伯意雄夸。

霜風可使吹黃帽。

樽酒那能泛浪花。

漫遣鯉魚傳尺素。

卻將燕石報瓊華。

何時得見悲秋老。

醉裏題詩字半斜。

送楊奉禮

譜牒推關右。風流出靖恭。時情任險陂。家法故雍容。南去河千頃。餘惟酒一鐘。更誰哀老子。令得放疎慵。

河復并敘

熙寧十年秋。河決澶淵。注鉅野。入淮泗。自澶魏以北。皆絕流而濟。楚大被其害。彭門城下水二丈八尺。七十餘日不退。吏民疲於守禦。十月十三日。澶州大風終日。既止。而河流一枝已復故道。聞之喜甚。庶幾可塞乎。乃作河復詩。歌之。道路以致民願。而迎神休。蓋守土者之志也。

君不見西漢元光元封閒。河決瓠子二十年。鉅野東傾淮泗滿。楚人恣食黃河鱸。



萬里沙回封禪罷。初遣越巫沈白馬。河公未許人力窮。薪芻萬計隨流下。  
 吾君盛德如唐堯。百神受職河神驕。帝遣風師下約束。北流夜起澶洲橋。  
 東風吹凍收微淥。神功不用淇園竹。楚人種麥滿河淤。仰看浮槎棲古木。

登望洪亭

河漲西來失舊磯。孤城渾在水光中。忽然歸壑無尋處。千里禾麻一半空。

韓幹馬十四匹

二馬竝驅攢八蹄。二馬宛頸駿尾齊。一馬任前雙舉後。一馬卻避長鳴嘶。  
 老髯奚官騎且顧。前身作馬通馬語。後有八匹飲且行。微流赴吻若有聲。  
 前者既濟出林鶴。後者欲涉鶴俛啄。最後一匹馬中龍。不嘶不動尾搖風。  
 韓生畫馬真是馬。蘇子作詩如見畫。世無伯樂亦無韓。此詩此畫誰當看。

有言郡東北荆山下。可以溝畎積水。因與吳正字王戶曹同往相視。以地  
 多亂石不果。還遊聖女山。山有石室如墓而無棺槨。或云宋司馬桓離墓。

二子有詩次其韻二首

側手區區豈易遮。奔流一瞬卷千家。共疑智伯初圍趙。猶有張湯欲漕斜。  
 已坐迂疎來此地。分將勞苦送生涯。使君下策真堪笑。隱隱驚雷響踏車。

【一】

茫茫清泗遶孤岑。歸路相將得暫臨。試著芒屨穿犖确。更然松炬照幽深。  
 縱令司馬能鑿石。奈有中郎解摸金。強寫蒼崖畱歲月。他年誰識此時心。

贈寫御容妙善師

憶昔射策干先皇。珠簾翠幄分兩廂。紫衣中使下傳詔。跪奉冉冉聞天香。  
 仰觀眩晃目生暈。但見曉色開扶桑。迎陽晚出步就坐。絳紗玉斧光照廊。  
 野人不識日月角。彷彿尙記重瞳光。三年歸來真一夢。橋山松檜淒風霜。  
 天容玉色誰敢畫。老師古寺晝閉房。夢中神授心有得。覺來信手筆已忘。  
 幅巾常服儼不動。孤臣入門涕自滂。元老侑坐鬚眉古。虎臣立侍冠劍長。  
 平生慣寫龍鳳質。肯顧草間猿與麀。都人踏破鐵門限。黃金白璧空堆牀。  
 爾來摹寫亦到我。謂是先帝白髮郎。不須覽鏡坐自了。明年乞身歸故鄉。

哭刁景純

讀書想前輩。每恨生不早。紛紛少年場。猶得見此老。此老如松柏。不受霜雪槁。  
 直從毫末中。自養到合抱。宏才乏近用。千歲自枯倒。文章餘正始。風節貫華皓。  
 平生爲人爾。自爲薄如縞。是非雖難齊。反覆看愈好。前年旅吳越。把酒慶壽考。



扣門無晨夜。百過迹未掃。但知從德公。未省厭邱嫂。別時公八十。後會知難保。昨日故人書。連年喪翁媪。傷心范橋水。漾漾舞寒藻。華堂不見人。瘦馬空戀阜。我欲江東去。匏樽酌行潦。鏡湖無賀監。慟哭嵇山道。忍見萬松岡。荒池沒秋草。

答呂梁仲屯田

亂山合沓圍彭門。官居獨在懸水邨。居民蕭條雜麋鹿。小市冷落無雞豚。黃河西來初不覺。但訝清泗奔流渾。夜聞沙岸鳴甕盎。曉看雪浪浮鵬鯤。呂梁自古喉吻地。萬頃一抹何由吞。坐觀入市卷閭井。吏民走盡餘王尊。計窮路斷欲安適。吟詩破屋愁鴛鴦。歲寒霜重水歸壑。但見屋瓦留沙痕。入城相對如夢寐。我亦僅免為魚鼈。旋呼歌舞雜談笑。不惜飲酬空瓶盆。念君官舍冰雪冷。新詩美酒聊相溫。人生如寄何不樂。任使絳蠟燒黃昏。宣房未築淮泗滿。故道堙滅瘡痍存。明年勞苦應更甚。我當舂鍤先黥髡。付君萬指伐頑石。千鎚雷動蒼山根。高城如鐵洪口快。談笑卻掃看崩奔。農夫掉臂免狼顧。秋穀布野如雲屯。還須更置軟脚酒。為君擊鼓行金樽。

答孔周翰求書與詩

身閒曷不長閉口。天寒正好深藏手。吟詩寫字有底忙。未脫多生宿塵垢。

不蒙譏訶子厚疾。反更刻畫無鹽醜。太白應驚飯山瘦。與君相從知幾日。東風待得花開否。撥棄萬事勿復談。百觚之後那辭酒。

蘇東坡詩集卷十六

古今體詩 六十首

送李公恕赴闕

君才有如切玉刀。見之凜凜寒生毛。願隨壯士斬蛟蜃。不願腰閒纏錦綵。用違其才志不展。坐與胥吏同疲勞。忽然眉上有黃氣。吾君漸欲收英髦。立談左右皆動色。一語徑破千言牢。我頃分符在東武。脫略萬事惟嬉遨。盡壞屏障通內外。仍呼騎曹為馬曹。君為使者見不問。反更對飲持雙螯。酒酣箕坐語驚衆。雜以嘲諷窮詩騷。世上小兒多忌諱。獨能容我真賢豪。為我買田臨汝水。逝將歷去誅蓬蒿。安能終老塵土下。俯仰隨人如桔槔。

張寺丞益齋

張子作齋舍。而以益為名。吾聞諸夫子。求益非速成。譬如遠遊客。日夜事征行。



今年適燕薊。明年走蠻荆。東觀盡滄海。西涉渭與涇。歸來閉戶坐。八方在軒庭。又如學醫人。識病由飽更。風雨晦明淫。跛蹙瘖聾盲。虛實在其脈。靜躁在其情。榮枯在其色。壽夭在其形。苟能閱千人。望見知死生。為學務日益。此言當日程。為道貴日損。此理在既盈。願言書此詩。以為益齋銘。

春菜

蔓菁宿根已生葉。韭芽戴土拳如蕨。爛蒸香薺白魚肥。碎點青蒿涼餅滑。宿酒初消春睡起。細履幽畦掇芳辣。茵陳甘菊不負渠。繪縷堆盤纖手抹。北方苦寒今未已。雪底波稜如鐵甲。豈如吾蜀富冬蔬。霜葉露芽寒更茁。久拋松菊猶細事。苦筍江豚那忍說。明年投劾徑須歸。莫待齒搖并髮脫。

送鄭戶曹

遊遍錢塘湖上山。歸來文字帶芳鮮。羸童瘦馬從吾飲。陋巷何人似子賢。公業有田常乏食。廣文好客竟無氈。東歸不趁花時節。開盡春風誰與妍。

虔州八境圖八首并引

南康八境圖者。太守孔君之所作也。君既作石城。即其城上樓觀臺榭之所見。而作是圖也。東望七閩。南望五嶺。覽羣山之參差。俛章貢之奔流。雲煙出沒。草木蕃麗。邑屋相望。雞

犬之聲相聞。觀此圖也。可以茫然而思。粲然而笑。慨然而嘆矣。蘇子曰。此南康之一境也。何從而八乎。所自觀之者異也。且子不見夫日乎。其旦如槃。其中如珠。其夕如破璧。此豈三日也哉。苟知夫境之為八也。則凡寒暑朝夕。雨暘晦冥之異。坐作行立。哀樂喜怒之接。於吾目。而感於吾心者。有不可勝數者矣。豈特八乎。如知夫八之出乎一也。則夫四海之外。談詭譎怪。禹貢之所書。鄒衍之所談。相如之所賦。雖至千萬。未有不一者也。後之君子。必將有感於斯焉。迺作詩八章。題之圖上。

坐看奔湍遶石樓。使君高會百無憂。三犀竊鄙秦太守。八詠聊同沈隱侯。

【二】

濤頭寂寞打城還。章貢臺前暮靄寒。倦客登臨無限思。孤雲落日長安。

【三】

白鵲樓前翠作堆。縈雲嶺路若為開。故人應在千山外。不寄梅花遠信來。

【四】

朱樓深處日微明。卓蓋歸時酒半醒。薄暮漁樵人去盡。碧溪青嶂遶螺亭。

【五】

使君那暇日參禪。一望叢林一悵然。成佛莫教靈運後。著鞭從使祖生先。



【六】 卻從塵外望塵中。無限樓臺煙雨濛。山水照人迷向背。只尋孤塔認西東。

【七】 雲煙縹緲鬱孤臺。積翠浮空雨半開。想見之罘觀海市。絳宮明滅是蓬萊。

【八】 回峰亂嶂鬱參差。雲外高人世得知。誰向空山弄明月。山中木客解吟詩。

南康江水歲歲壞城。孔君宗翰爲守始作石城。至今賴之。軾爲膠西守。孔君實見代臨行者。則前詩未能道其萬一也。南康士大夫相與請於軾曰。詩文昔嘗刻石。或持以去。今亡矣。願復書而刻之。時孔君既沒。不忍違其請。紹聖元年八月十九日。眉山蘇軾書。

讀孟郊詩二首

夜讀孟郊詩。細字如牛毛。寒燈照昏花。佳處時一遭。孤芳擢荒穢。苦語餘詩騷。水清石鑿鑿。湍激不受篙。初如食小魚。所得不償勞。又似煮彭蠡。竟日持空螯。要當鬪僧清。未足當韓豪。人生如朝露。日夜火消膏。何苦將兩耳。聽此寒蟲號。不如且置之。飲我玉色膠。

【一】

我憎孟郊詩。復作孟郊語。飢腸自鳴喚。空壁轉飢鼠。詩從肺腑出。出輒愁肺腑。有如黃河魚。出膏以自煮。尙愛銅斗歌。鄙俚頗近古。桃弓射鵝罷。獨速短蓑舞。不憂踏船翻。踏浪不踏土。吳姬霜雪白。赤脚洗白紵。嫁與踏浪兒。不識離別苦。歌君江湖曲。感我長羈旅。

訪張山人得山中字二首

魚龍隨水落。猿鶴喜君還。舊隱邱墟外。新堂紫翠間。野麋馴杖履。幽桂出榛菅。洒掃門前路。山公亦愛山。

【二】

萬木鎖雲龍。天厓與戴公。路迷山向背。人在灑西東。薺麥餘春雪。櫻桃落晚風。入城都不記。歸路醉眠中。

送孔郎中赴陝郊

驚風擊面黃沙走。西出崤函脫塵垢。使君來自古徐州。聲震河潼殷關右。十里長亭聞鼓角。一川秀色明花柳。北臨飛檻卷黃流。南望青山如覲首。東風吹開錦繡谷。淥水翻動葡萄酒。詎庭生草數開尊。過客如雲牢閉口。



與梁左藏會飲傅國博家

將軍破賊自草檄。論詩說劍俱第一。  
 風流別駕貴公子。欲把笙歌暖鋒鏑。  
 東堂醉臥呼不起。啼鳥落花春寂寂。  
 寒食日。答李公擇三絕次韻  
 從來蘇李得名雙。只恐全齊笑陋邦。  
 詩似懸河供不辦。故欺張籍隴頭瀧。

【二】

簿書籌鼓不知春。佳句相呼賴故人。  
 寒食德公方上冢。歸來誰主復誰賓。

【三】

巡城已困塵埃眯。執扑仍遭蟣蝨緣。  
 欲脫布衫攜素手。試開病眼點黃連。  
 約公擇飲。是日大風  
 先生生長匡廬山。山中讀書三十年。  
 偷兒夜探黑白丸。奮髯忽逢朱子元。  
 春風無事秋月閒。紅妝執樂豪且妍。  
 客來畱飲不計錢。齊人愛公如子產。  
 兒啼臥路呼不還。我慙山郡空畱連。

牙兵部吏笑我寒。邀公飲酒公無難。  
 曉來顛風塵暗天。我思其由豈坐慳。  
 要當啖公八百里。豪氣一洗儒生酸。

坐上賦戴花得天字

清明初過酒闌珊。折得奇葩晚更妍。  
 醉吟不耐敲紗帽。起舞從教落酒船。  
 春色豈關吾輩事。老狂聊作坐中先。  
 結習漸消畱不住。卻須還與散花天。

夜飲次韻畢推官

簿書叢裏過春風。酒聖時時且復中。  
 老來漸減金釵興。醉後空驚玉筍工。  
 紅燭照庭嘶驪裏。黃雞催曉唱玲瓏。  
 月未上時應蚤散。免教壑谷問吾公。

芙蓉城并敘

世傳王迥子高與仙人周瑤英遊芙蓉城元豐元年三月余始識子高問之信然乃作此詩極其情而歸之正亦變風止乎禮義之意也

芙蓉城中花冥冥。誰其主者石與丁。  
 中有一人長眉青。炯如微雲淡疎星。  
 天門夜開飛爽靈。無復白日乘雲輶。  
 珠簾玉案翡翠屏。霞舒雲卷千娉婷。  
 往來三世空鍊形。竟坐誤讀黃庭經。  
 俗緣千劫磨不盡。翠被冷落淒餘馨。



因過緱山朝帝廷。夜聞笙簫弭節聽。飄然而來誰使令。皎如明月入窗牖。  
 忽然而去不可執。寒衾虛幌風泠泠。仙宮洞房本不扃。夢中同躡鳳凰翎。  
 徑度萬里如奔霆。玉樓浮空聳亭亭。天書雲篆誰所銘。遠樓飛步高矜嶸。  
 仙風鏘然韻流鈴。蘼蘼形開始酒醒。芳卿寄謝空丁寧。一朝覆水不返瓶。  
 羅巾別淚空熒熒。春風花開秋葉零。世閒羅綺紛臙腥。此身流浪隨滄溟。  
 偶然相值兩浮萍。願君收視觀三庭。勿與嘉穀生蝗螟。從渠一念三千齡。  
 下作人閒尹與邢。

續麗人行并引

李仲謀家有周昉畫背面欠伸內人極精戲作此詩。

深宮無人春日長。沈香亭北百花香。美人睡起薄梳洗。燕舞鶯啼空斷腸。  
 畫工欲畫無窮意。背立東風初破睡。若教回首卻嫣然。陽城下蔡俱風靡。  
 杜陵飢客眼長寒。寒驢破帽隨金鞍。隔花臨水時一見。只許腰肢背後看。  
 心醉歸來茅屋底。方信人閒有西子。君不見孟光舉案與眉齊。何曾背面傷春啼。  
 聞李公擇飲傅國博家大醉二首  
 兒童拍手鬧黃昏。應笑山公醉習園。縱使先生能一石。主人未肯獨留髡。

【二】

不肯惺惺騎馬迴。玉山知爲玉人頹。紫雲有語君知否。莫喚分司御史來。  
 傅子美召公擇飲。偶以病不及往。公擇有詩。次韻  
 樊素阿蠻皆已出。使君應作玉箏歌。可憐痛士西窗下。一夜丹田手自摩。  
 觀子美病中作嗟歎不足。因次韻  
 百尺長松澗下摧。知君此意爲誰來。霜枝半折孤根出。尙有狂風急雨催。

起伏龍行并敘

徐州城東二十里。有石潭。父老云。與泗水通。增損清濁。相應不差。時有河魚出焉。元豐元  
 元年春旱。或云置虎頭潭中。可以致雷雨。用其說。作起伏龍行。  
 何年白竹千鈞弩。射殺南山雪毛虎。至今顛骨帶霜牙。尙作四海毛蟲祖。  
 東方久旱千里赤。三月行人口生土。碧潭近在古城東。神物所蟠誰敢侮。  
 上敲蒼石擁巖竇。下應清河通水府。眼光作電走金蛇。鼻息爲雲擢煙縷。  
 當年負圖傳帝命。左右羲軒詔神禹。爾來懷寶但貪眠。滿腹雷霆瘖不吐。  
 赤龍白虎戰明日。倒卷黃河作飛雨。嗟我豈樂鬪兩雄。有事徑須煩一怒。

聞公擇過雲龍張山人。輒往從之。公擇有詩。戲用其韻。



我生固多憂。肉食嘗苦墨。軒然就一笑。猶得好飲力。聞君過雲龍。對酒兩靜默。急攜清歌女。出郭及未昃。一歡難力致。邂逅有勝特。喧蜂集晚花。亂雀啣叢棘。山人樂此耳。寂寞誰侍側。何當求好人。聊使治要襪。使君自孤憤。此理誰相值。不如學養生。一氣服千息。

送李公擇

嗟予寡兄弟。四海一子由。故人雖云多。出處不我謀。弓車無停招。逝去勢莫留。僅存今幾人。各在天一陬。有如長庚月。到曉爛不收。宜我與夫子。相好手足侔。比年兩見之。賓主更獻酬。樂哉十日飲。衍衍和不流。論事到深夜。僵仆鈴與騶。頗嘗見使君。有客如此不。欲別不忍言。慘慘集百憂。念我野夫兄。知名三十秋。已得其為人。不待風馬牛。他年林下見。傾蓋如白頭。

送筍芍藥與公擇二首

久客厭鹵饌。枵然思南烹。故人知我意。千里寄竹萌。駢頭玉嬰兒。一一脫錦棚。庖人應未識。旅人眼先明。我家拙廚膳。彘肉芼燕菁。送與江南客。燒煮配香粳。

【二】

今日忽不樂。折盡園中花。園中亦何有。芍藥裊殘葩。久旱復遭雨。紛披亂泥沙。

不折亦安用。折去還可嗟。棄擲亮未能。送與謫仙家。還將一枝春。插向兩髻丫。

和孫莘老次韻

去國光陰春雪消。還家蹤跡野雲飄。功名正自妨行樂。迎送纔堪博早朝。雖去友朋親吏卒。卻辭讒謗得風謠。明年我亦江南去。不問雄繁與寂寥。

遊張山人園

壁閒一軸煙蘿子。盆裏千枝錦被堆。慣與先生為酒伴。不嫌刺史亦顏開。織織入麥黃花亂。颯颯催詩白雨來。聞道君家好井水。歸軒乞得滿瓶回。

杜介熙熙堂

崎嶇世路最先回。窈窕華堂手自開。咄咄何曾書怪事。熙熙長覺似春臺。白砂碧玉味方永。黃紙紅旂心已灰。遙想閉門投轄飲。鷓鴣絃鐵撥響如雷。

次韻答劉涇

吟詩莫作秋蟲聲。天公怪汝鉤物情。使汝未老華髮生。芝蘭得雨蔚青青。何用自燔以出馨。細書千紙雜真行。新音百變口如鶯。異義蜂起弟子爭。舌翻濤瀾卷齊城。萬卷堆胸兀相撐。以病為樂子未驚。我有至味非煎烹。是中之樂吁難名。綠槐如山闔廣庭。飛蟲繞耳細而清。敗席展轉臥見驚。



亦自不嫌翠織成。意行信足無溝坑。不識五郎呼作卿。吏民哀我老不明。  
相戒無復煩鞭刑。時臨泗水照星星。微風不起鏡面平。安得一舟如葉輕。  
臥聞郵籤報水程。葦羹羊酪不須評。一飽且救飢腸鳴。

攜妓樂游張山人園

大杏金黃小麥熟。墜巢乳鵲拳新竹。故將俗物惱幽人。細馬紅粧滿山谷。  
提壺勸酒意雖重。杜鵑催歸聲更速。酒闌人散卻關門。寂歷斜陽挂疎木。

種德亭并敘

處士王復家於錢塘。爲人多技能。而醫尤精。期於活人而已。不志於利。築室候潮門外。治園圃作亭榭。以與賢士大夫游。唯恐不及。然終無所求。人徒知其接花蓀果之勤。而不知其所種者德也。乃以名其亭。而作詩以遺之。

小圃傍城郭。閉門芝朮香。名隨市人隱。德與佳木長。元化善養性。倉公多禁方。  
所活不可數。相逢旋相忘。但喜賓客來。置酒花滿堂。我欲東南去。再觀雙檜蒼。  
山茶想出屋。湖橋應過牆。木老德亦熟。吾言豈荒唐。

次韻僧潛見贈

道人胸中水鏡清。萬象起滅無逃形。獨依古寺種秋菊。要伴騷人餐落英。

人閒底處有南北。

紛紛鴻鴈何曾冥。

閉門坐穴一禪榻。

頭上歲月空崢嶸。

今年偶出爲求法。

欲與慧劍加礪礪。

雲衲新磨山水出。

霜髭不翦兒童驚。

公侯欲識不可得。

故知倚市無傾城。

秋風吹夢過淮水。

想見橘柚垂空庭。

故人各在天一角。

相望落落如晨星。

彭城老守何足顧。

棗林桑野相邀迎。

千山不憚荒店遠。

兩脚欲趁飛猱輕。

多生綺語磨不盡。

尙有宛轉詩人情。

猿吟鶴唳本無意。

不知下有行人行。

空階夜雨自清絕。

誰使掩抑啼孤惺。

我欲仙山掇瑤草。

傾筐坐歎何時盈。

簿書鞭扑畫填委。

煮茗燒栗宜宵征。

乞取摩尼照濁水。

共看落月金盆傾。

次韻潛師放魚

法師說法臨泗水。

無數天花隨麈尾。

勸將淨業種西方。

莫待夢中呼起起。

哀哉若魚竟坐口。

遠媿知幾穆生醴。

況逢孟簡對盧仝。

不怕校人欺子美。

疲民尙作魚尾赤。

數罟未除吾額泚。

法師自有衣中珠。

不用辛苦泥沙底。

文與可有詩見寄云。待將一段鵝溪絹。掃取寒梢萬尺長。次韻答之。

爲愛鵝溪白繭光。

掃殘雞距紫毫芒。

世閒那有千尋竹。

月落庭空影許長。

聞辯才法師復歸上天竺。問詩戲問。



道人出山去。山色如死灰。白雲不解笑。青松有餘哀。忽聞道人歸。鳥語山容開。神光出寶髻。法雨洗浮埃。想見南北山。花發前後臺。寄聲問道人。借禪以為談。何所聞而去。何所見而回。道人笑不答。此意安在哉。昔年本不住。今者亦無來。此語竟非是。且食白楊梅。

和子由送將官梁左藏仲通

雨足誰言春麥短。城堅不怕秋濤卷。日長惟有睡相宜。半脫紗巾落紈扇。芳草不鋤當戶長。珍禽獨下無人見。覺來身世都是夢。坐久枕痕猶著面。城西忽報故人來。急掃風軒炊麥飲。伏波論兵初嬰鑠。中散談仙更清遠。南都從事亦學道。不惜腸空誇腦滿。問羊他日到金華。應許相將遊閬苑。

次韻秦觀秀才見贈。秦與孫莘老李公擇甚熟。將入京應舉。

夜光明月非所投。逢年遇合百無憂。將軍百戰竟不侯。伯郎一斗得涼州。翹關負重君無力。十年不入紛華域。故人坐上見君文。謂是古人吁莫測。新詩說盡萬物情。硬黃小字臨黃庭。故人已去君未到。空吟河畔草青青。誰謂他鄉各異縣。天遣君來破吾願。一聞君語識君心。短李髯孫眼中見。江湖放浪久全真。忽然一鳴驚倒人。縱橫所值無不可。知君不怕新書新。

千金敝帚那堪換

我亦淹留豈長算。

山中既未決同歸。

我聊爾耳君其漫。

僕曩於長安陳漢卿家。見吳道子畫佛。碎爛可惜。其後十餘年。復見之於鮮于子駿家。則已裝背完好。子駿以見遺。作詩謝之。

貴人金多身復閒。爭買書畫不計錢。已將鐵石充逸少。更補朱繇為道元。煙薰屋漏裝玉軸。鹿皮蒼壁知誰賢。吳生畫佛本神授。夢中化作飛空仙。覺來落筆不經意。神妙獨到秋毫顛。昔我長安見此畫。歎息至寶空潸然。體質散落嗟神全。素絲斷續不忍看。已作蝴蝶飛聯翩。君能收拾為補綴。脫字欲補知無緣。誌公彷彿見刀尺。修羅天女猶雄妍。如觀老杜飛鳥句。脫字欲補知無緣。問君乞得良有意。欲將俗眼為洗滌。貴人一見定羞忤。錦囊千紙何足捐。不須更用博麻縷。付與一炬隨飛煙。

雨中過舒教授

疎疎簾外竹。瀏瀏竹間雨。窗扉靜無塵。几硯寒生霧。美人樂幽獨。有得緣無慕。坐依蒲褐禪。起聽風甌語。客來淡無有。灑掃涼冠履。濃茗洗積昏。妙香淨浮慮。歸來北堂闈。一一微螢度。此生憂患中。一餉安閒處。飛鷺悔前笑。黃犬悲晚悟。自非陶靖節。誰識此閒趣。



次韻舒教授寄李公擇

草書妙絕吾所見。眞書小低猶抗行。  
 去年逾月方出畫。爲君劇飲幾濡首。  
 別時流涕攬君鬚。懸知此懼墮空虛。  
 怪君一身都是德。近之清潤淪肌骨。  
 論文作詩俱不敵。今年過我雖少畱。  
 看君談笑收降旌。寂寞陶潛方止酒。  
 松下縱橫餘屐齒。門前輾轉想君車。  
 細思還有可恨時。不許藍橋見傾國。

又送鄭戶曹

水繞彭城樓。山圍戲馬臺。古來豪傑地。  
 白門下呂布。大星隕臨淮。尙想劉德輿。  
 河從百步響。山到九里回。山水自相激。  
 秋月墮城角。春風搖酒杯。遲君爲座客。  
 他年君倦游。白首賦歸來。登樓一長嘯。  
 使君安在哉。

次韻黃魯直見贈古風二首

嘉穀臥風雨。稂莠登我場。陳前漫方丈。  
 君看五六月。飛蚊殷回廊。茲時不少假。  
 願我如苦李。全生依路旁。紛紛不足道。  
 俯仰霜葉黃。期君蟠桃枝。千歲終一嘗。  
 玉食慘無光。大哉天宇閒。美惡更臭香。  
 悄悄徒自傷。

【一】

空山學仙子。妄意笙簫聲。千金得奇藥。  
 今君已度世。坐閱霜中蒂。摩挲古銅人。  
 開視皆豨苓。不知市人中。自有安期生。  
 歲月不可計。聞風安在哉。要君相指似。

次韻答舒教授觀余所藏墨

異時長笑王會稽。野鷺膾腥汗刀几。  
 二子風流冠當代。顧與兒童爭愠喜。  
 我生百事不掛眼。時人謬說云工此。  
 人生當著幾兩屐。定心肯爲微物起。  
 非人磨墨墨磨人。餅應未罄鼻先恥。  
 作書寄君君莫笑。但覓來禽與青李。  
 君不見永寧第中擣龍麝。列屋閒居清且美。  
 時聞五斛賜蛾綠。不惜千金求獼髓。  
 送鄭戶曹賦席上果得榧子  
 聞君此詩當大笑。寒窗冷硯冰生水。

彼美玉山果。粲爲金槃實。瘴霧脫蠻溪。  
 祝君如此果。德膏以自澤。驅攘三彭仇。  
 清樽奉佳客。客行何以贈。一語當加璧。  
 已我心腹疾。願君如此木。凜凜傲霜雪。



斷爲君倚几。滑淨不容削。物微興不淺。此贈毋輕擲。

送胡掾

亂葉和淒雨。投空如散絲。流年一如此。遊子去何之。節義古所重。艱危方自茲。他年著清德。仍復畏人知。

答仲屯田次韻

秋來不見漢陂岑。千里詩盟忽重尋。大木百圍生遠籟。朱絃三歎有遺音。清風卷地收殘暑。素月流天掃積陰。欲遣何人賡絕唱。滿階桐葉候蟲吟。

密州宋國博以詩見紀在郡雜詠次韻答之

吾觀二宋文。字字照縑素。淵源皆有考。奇險或難句。後來邈無繼。嗣子其殆庶。胡爲尙流落。用舍真有數。當時苟悅可。慎勿笑秋杜。斷窗誰赴球。袖手良優裕。山城辱吾繼。缺短煩遮護。昔年繆陳詩。無人聊瓦注。於今賡絕唱。外重中已懼。何當附家集。擊壤追咸漢。

答范淳甫

吾州下邑生劉季。誰數區區張與李。重瞳遺跡已塵埃。惟有黃樓臨泗水。而今太守老且寒。俠氣不洗儒生寒。猶勝白門窮呂布。欲將鞍馬事曹瞞。

次韻答王定國

每得君詩如得書。宣心寫妙書不如。眼前百種無不有。知君一以詩驅除。傳聞都下十日雨。青泥沒馬街生魚。舊雨來人今不來。悠然獨酌臥清虛。我雖作郡古云樂。山川信美非吾廬。願君不廢重九約。念此衰冷勤呵噓。

和鮮于子駿鄆州新堂月夜二首

去歲遊新堂。春風雪消後。池中半篙水。池上千尺柳。佳人如桃李。胡蝶入衫袖。山川今何許。疆野已分宿。歲月不可思。駛若船放溜。繁華真一夢。寂寞兩榮朽。惟有當時月。依然照杯酒。應憐船上人。坐穩不知漏。

【一】

明月入華池。反照池上堂。堂中隱凡人。心與水月涼。風螢已無迹。露草時有光。起觀河漢流。步履響長廊。名都信繁會。千指調笙簧。先生病不飲。童子爲燒香。獨作五字詩。清絕如韋郎。詩成月漸側。皎皎兩相望。

送將官梁左藏赴莫州

燕南垂趙北際。其閒不合大如礪。至今父老哀公孫。蒸土爲城鐵作門。城中積穀三百萬。猛士如雲驕不戰。一旦鼓角鳴地中。帳下美人空掩面。



豈如千騎平時來。笑談警效生風雷。葛巾羽扇紅塵靜。投壺雅歌清燕開。  
東方健兒虓虎樣。泣涕懷思廉恥將。彭城老守亦凄然。不見君家雪兒唱。

### 蘇東坡詩集卷十七

#### 古今體詩

一五十

次韻子由送趙帆歸觀錢塘遂赴永嘉

歸舟轉河曲。稍見楚山蒼。候吏來迎客。吳音已帶鄉。言從謝康樂。先獻魯靈光。  
已擊三千里。何須四十強。風流半刺史。清絕校書郎。到郡詩成集。尋溪水濺裳。  
芒鞋隨采藥。繭紙記流觴。海靜蛟鼉出。山空草木長。宦游無遠近。民事要更嘗。  
願子傳家法。他年請尚方。

#### 中秋月三首

殷勤去年月。澌灩古城東。憔悴去年人。臥病破窗中。徘徊巧相覓。窈窕穿房櫳。  
月豈知我病。但見歌樓空。撫枕三嘆息。扶杖起相從。天風不相哀。吹我落瓊宮。

白露入肺肝。夜吟如秋蟲。坐令太白豪。化爲東野窮。餘年知幾何。佳月豈屢逢。  
寒魚亦不睡。竟夕相噉喙。

#### 【二】

六年逢此月。五年照離別。歌君別時曲。滿座爲淒咽。畱都信繁麗。此會豈輕擲。  
鎔銀百頃湖。挂鏡千尋闕。三更歌吹罷。人影亂清樾。歸來北堂下。寒光翻露葉。  
喚酒與婦飲。念我向兒說。豈知衰病後。空盞對梨栗。但見古河東。菽麥花鋪雪。  
欲和去年曲。復恐心斷絕。

#### 【三】

舒子在汶上。閉門相對清。鄭子向河朔。孤舟連夜行。頓子雖咫尺。兀如在牢局。  
趙子寄書來。水調有餘聲。悠哉四子心。共此千里明。明月不解老。良辰難合并。  
回頭坐上人。聚散如流萍。嘗聞此宵月。萬里同陰晴。天公自著意。此會那可輕。  
明年各相望。俯仰今古情。

#### 中秋見月和子由

明月未出羣山高。瑞光萬丈生白毫。一杯未盡銀闕涌。亂雲脫壞如崩濤。  
誰爲天公洗眸子。應費明河千斛水。遂令冷看世間人。照我湛然心不起。



西南火星如彈丸。角尾奕奕蒼龍蟠。今宵注眼看，不見更許螢火爭清寒。  
 何人艤舟臨古汴。千燈夜作魚龍變。曲折無心逐浪花。低昂赴節隨歌板。  
 青燐滅沒轉山前。浪颭風迴豈復堅。明月易低人易散。歸來呼酒更重看。  
 堂前月色愈清好。咽咽寒螿鳴露草。卷簾推戶寂無人。窗下咿啞惟楚老。  
 南都從事莫羞貧。對月題詩有幾人。明朝人事隨日出。恍然一夢瑤臺客。

答王鞏

汗泗遶吾城。城堅如削鐵。中有李臨淮。號令肝膽裂。古來彭城守。未省怕惡客。  
 惡客云是誰。祥符相公孫。是家豪逸生有種。千金一擲頗黎盆。連車載酒來。不  
 飲外酒嫌其村。子有千瓶酒。我有萬株菊。任子滿頭插。團團見花不見目。醉中  
 插花歸。花重壓折軸。問客何所須。客言我愛山。青山自遶郭。不要買山錢。此  
 外有黃樓。樓下一河水。美哉洋洋乎。可以療飢并洗耳。彭城之游樂復樂。客惡  
 何如主人惡。

次韻王定國馬上見寄

昨夜霜風入袂衣。曉來病骨更支離。疎狂似我人誰顧。坎坷憐君志未移。  
 但恨不攜桃葉女。尙能來趁菊花時。南臺二謝人無繼。直恐君詩勝義熙。

與頓起孫勉泛舟探韻得未字

窗前堆梧桐。牀下鳴絡緯。佳人尺書到。客子中夜喟。朝來一樽酒。晤語聊自慰。  
 秋蠅已無聲。霜蟹初有味。當爲壯士飲。皆裂須磔蝟。勿作兒女懷。坐念蠅蝟畏。  
 山城亦何有。一笑瀉肝胃。泛舟以娛君。魚鼈多可餽。縱爲十日飲。未遽主人費。  
 吾儕俱老矣。耿耿知自貴。寧能傍門戶。啼笑雜猩猩。要將百篇詩。一吐千丈氣。  
 蕭條歲行暮。迨此霜雪未。明朝出城南。遺跡觀楚魏。西風迫吹帽。金菊亂如沸。  
 願君勿言歸。輕別吾所諱。

次韻答頓起二首

挽袖推腰踏破紳。舊聞攜手上天門。相逢應覺聲容似。欲話先驚歲月奔。  
 新學已皆從許子。諸生猶自畏何蕃。殿廡直宿真如夢。猶記憂時策萬言。

【二】

十二東秦比漢京。去年古寺共題名。早衰怪我遽如許。苦學憐君太瘦生。  
 茅屋擬歸田二頃。金丹終掃雪千莖。何人更似蘇司業。和遍新詩滿洛城。  
 九日黃樓作



去年重陽不可說。南城夜半千漚發。水穿城下作雷鳴。泥滿城頭飛雨滑。  
 黃花白酒無人問。日暮歸來洗鞵襪。豈知還復有今年。把盞對花容一呷。  
 莫嫌酒薄紅粉陋。終勝泥中千柄鍤。黃樓新成壁未乾。清河已落霜初殺。  
 朝來白霧如細雨。南山不見千尋刹。樓前便作海茫茫。樓下空聞櫓鴉軋。  
 薄寒中人老可畏。熱酒澆腸氣先壓。煙消日出見漁邨。遠水鱗鱗山鑿鑿。  
 詩人猛士雜龍虎。楚舞吳歌亂鵝鴨。一杯相屬君勿辭。此景何殊泛清雪。

太虛以黃樓賦見寄作詩為謝

我在黃樓上。欲作黃樓詩。忽得故人書。中有黃樓詞。黃樓高十丈。下建五丈旂。  
 楚山以為城。泗水以為池。我詩無傑句。萬景驕莫隨。夫子獨何妙。雨雹散雷椎。  
 雄辭雜今古。中有屈宋姿。南山多磬石。清滑如流脂。朱蠟為摹刻。細妙分毫釐。  
 佳處未易識。當有來者知。

九日次韻王鞏

我醉欲眠君罷休。已教從事到青州。鬢霜饒我三千丈。詩律輸君一百籌。  
 聞道郎君閉東閣。且容老子上南樓。相逢不用忙歸去。明日黃花蝶也愁。

送頓起

客路相逢難。為樂常不足。臨行挽衫袖。更賞折殘菊。佳人亦何念。悽斷陽關曲。  
 酒闌不忍去。共接一寸燭。畱君終無窮。歸駕不免促。岱宗已在眼。一往繼前躅。  
 天門四十里。夜看扶桑浴。回頭望彭城。大海浮一粟。故人在其下。塵土相逐蹴。  
 惟有黃樓詩。千古配淇澳。

送孫勉

昔年罷東武。曾過北海縣。白河翻雪浪。黃土如蒸麪。桑麻冠東方。一熟天下賤。  
 是時累饑饉。嘗苦盜賊變。每憐追胥官。野宿風裂面。君為淮南秀。文采照金殿。  
 胡為事奔走。投筆腰羽箭。更被髯將軍。豪篇來督戰。親程三郡士。玉石不能銜。  
 欲知君得人。失者亦稱善。君才無不可。要使經百鍊。吾詩堪咀嚼。聊送別酒盞。

李思訓畫長江絕島圖

山蒼蒼。水茫茫。大孤小孤江中央。崖崩路絕猿鳥去。惟有喬木攬天長。客舟何  
 處來。棹歌中流聲抑揚。沙平風軟望不到。孤山久與船低昂。峩峩兩煙鬢。曉鏡  
 開新妝。舟中賈客莫漫狂。小姑前年嫁彭郎。

張安道見示近詩



人物一衰謝。微言難重尋。殷勤永嘉末。復聞正始音。清談未足多。感時意殊深。少年有奇志。欲和南風琴。荒林蝸蚘亂。廢沼蛙蝈淫。遂欲掩兩耳。臨文但噫喑。蕭然王郎子。來自緱山陰。云見浮邱伯。吹簫明月岑。遺聲落淮泗。蛟鼉爲悲吟。願公正王度。祈招繼惜情。

次韻王鞏顏復同泛舟

沈郎清瘦不勝衣。邊老便便帶十圍。躑躅身輕山上走。懽呼船重醉中歸。舞腰似雪金釵落。談辯如雲玉麈揮。憶在錢塘正如此。回頭四十二年非。

次韻張十七九日贈子由

千戈萬槩擁笳籬。九日清樽豈復持。官事無窮何日了。菊花有信不吾欺。逍遙瓊館真堪羨。取次塵纓未可縻。迨此暇時須痛飲。他年長劍挂君頤。

次韻王鞏獨眠

居士身心如槁木。旅館孤眠體生粟。誰能相思琢白玉。服藥千朝償一宿。天寒日短銀燈續。欲往從之車脫軸。何人吹斷參差竹。泗水茫茫鴨頭綠。

次韻王鞏留別

去國已八年。故人今有誰。當時交遊內。未數蔡充兒。豈無知我者。好爵半已糜。

爭爲東閣吏。不顧北山移。公子表獨立。與世頗異馳。不辭千里遠。成此一段奇。蛾眉亦可憐。無奈思餅師。無人伴客寢。惟有支牀龜。君歸與何人。文字相娛嬉。持此調張子。一笑當脫頤。

登雲龍山

醉中走上黃茆岡。滿岡亂石如羣羊。岡頭醉倒石作牀。仰看白雲天茫茫。歌聲落谷秋風長。路人舉首東南望。拍手大笑使君狂。

題雲龍草堂石磬

折爲督郵腰。懸作山人室。殊非濶上音。信是泗濱石。

與舒教授張山人參寥師同遊戲馬臺書西軒壁兼簡顏長道二首

古寺長廊院院行。此軒偏慰故人情。楚山西斷如迎客。汴水南來故遠城。路失玉鉤芳艸合。林亡白鶴古泉清。澹游何以娛庠老。坐聽郊原琢磬聲。

【二】

竹杖芒鞋取次行。下臨官道見人情。天寒菽粟猶棲畝。日暮牛羊自入城。沾酒獨教陶令醉。題詩誰似皎公清。更尋陋巷顏夫子。乞取微言繼此聲。

滕縣時同年西園



人皆種榆柳。坐待十畝陰。我獨種松柏。守此一片心。君看閭里閒。盛衰日駸駸。種木不種德。聚散如飛禽。老時吾不識。用意一何深。知人得數士。重義忘千金。西園手所開。珍木來千岑。養此霜雪根。遲彼鸞鳳吟。池塘得流水。龜魚自浮沈。幽桂日夜長。白花亂青衿。豈獨蕃艸木。子孫已成林。拱把不知數。會當出千尋。樊侯種梓漆。壽張富華簪。我作西園詩。以為里人箴。

次韻王廷老和張十七九日見寄

霜葉投空雀啣籬。上樓筋力强扶持。對花把酒未甘老。膏面染鬚聊自欺。無事亦知君好飲。多才終恐世相縻。請看平日銜杯口。會有金椎為控頤。

鹿鳴宴

連騎忽忽畫鼓喧。喜君新奪錦標還。金盞浮菊催開宴。紅藥將春待入關。他日曾陪探禹穴。白頭重見賦南山。何時共樂昇平事。風月笙簫坐夜閒。

次韻參寥師寄秦太虛三絕句時秦君舉進士不得

秦郎文字固超然。漢武憑虛意欲仙。底事秋來不得解。定中試與問諸天。

【二】

一尾追風抹萬蹄。

崑崙元圃謂朝隋。

回看世上無伯樂。

卻道鹽車勝月題。

【三】

得喪秋毫久已冥。不須聞此氣崢嶸。何妨卻伴參寥子。無數新詩咳唾成。

與參寥師行園中得黃耳蕈

遣化何時取衆香。法筵齋鉢久淒涼。寒蔬病甲誰能採。落葉空畦半已荒。老楮忽生黃耳菌。故人兼致白芽薑。蕭然放箸東南去。又入春山筍蕨鄉。

百步洪二首并敘

王定國訪余於彭城。一日棹小舟與顏長道攜盼英卿三子游泗水北。上聖女山。南下百步洪。吹笛飲酒。乘月而歸。余時以事不得往。夜著羽衣。佇立於黃樓上。相視而笑。以為李太白死。世閒無此樂三百餘年矣。定國既去逾月。復與參寥師放舟洪下。追懷曩游。以為陳迹。喟然而歎。故作二詩。一以遺參寥。一以寄定國。且示顏長道。舒堯文。邀同賦云。

長洪斗落生跳波。輕舟南下如投梭。水師絕叫鳧雁起。亂石一綫爭磋磨。有如兔走鷹隼落。駿馬下注千丈坡。斷絃離柱箭脫手。飛電過隙珠翻荷。四山眩轉風掠耳。但見流沫生千渦。嶮中得樂雖一快。何意水伯夸秋河。我生乘化日夜逝。坐覺一念逾新羅。紛紛爭奪醉夢裏。豈信荆棘埋銅駝。覺來俯仰失千劫。回視此水殊委蛇。君看岸邊蒼石上。古來篙眼如蜂窠。



但應此心無所住。造物雖駛如吾何。回船上馬各歸去。多言讒譏師所呵。

【二】

佳人未肯回秋波。幼輿欲語防飛梭。輕舟弄水買一笑。醉中盪漿肩相磨。  
不學長安閭里俠。貂裘夜走騰脂坡。獨將詩句擬鮑謝。涉江共採秋江荷。  
不知詩中道何語。但覺兩頰生微渦。我時羽服黃樓上。坐見織女初斜河。  
歸來笛聲滿山谷。明月正照金叵羅。奈何舍我入塵土。擾擾毛羣欺臥駝。  
不念空齋老病叟。退食誰與同委蛇。時來洪上看遺跡。忍見履齒青苔窠。  
詩成不覺雙淚下。悲吟相對惟羊何。欲遣佳人寄錦字。夜寒手冷無人呵。

送參寥師

上人學苦空。百念已灰冷。劔頭惟一吷。焦穀無新穎。胡爲逐吾輩。文字爭蔚炳。  
新詩如玉屑。出語便清警。退之論草書。萬事未嘗屏。憂愁不平氣。一寓筆所聘。  
頗怪浮屠人。視身如邱井。頽然寄澹泊。誰與發豪猛。細思乃不然。真巧非幻影。  
欲令詩語妙。無厭空且靜。靜故了羣動。空故納萬境。閱世走人閒。觀身臥雲嶺。  
鹹酸雜衆好。中有至味永。詩法不相妨。此語當更請。

夜過舒堯文戲作

先生堂上霜月苦。弟子讀書喧兩廡。推門入室書縱橫。蠟紙燈籠晃雲母。

先生骨清少眠臥。長夜默坐數更鼓。耐寒石硯欲生冰。得火銅瓶如過雨。

郎君欲出先自贊。坐客斂衽誰敢侮。明朝阮籍過阿戎。應作羲之羨懷祖。

和參寥見寄

黃樓南畔馬臺宮。雲月娟娟正點空。欲共幽人洗筆硯。要傳流水入絲桐。

且隨侍者尋西谷。莫學山僧老祝融。待我西湖借君去。一杯湯餅潑油葱。

十月十五日觀月黃樓席上次韻

中秋天氣未應殊。不用紅紗照座隅。山上白雲橫匹素。水中明月臥浮圖。

未成短棹還三峽。已約輕舟泛五湖。爲問登臨好風景。明年還憶使君無。

答王定民

開緘奕奕滿銀鈎。書尾題詩語更遒。八法舊聞宗長史。五言今復擬蘇州。

筆蹤好在畱臺寺。旂隊遙知到石溝。欲寄鼠鬚并繭紙。請君章草賦黃樓。

次韻王庭老退居見寄二首

浪藥浮花不辨春。歸來方識歲寒人。回頭自笑風波地。閉眼聊觀夢幻身。

北牖已安陶令榻。西風還避庾公塵。更搔短髮東南望。試問今誰裏舊巾。



【一】

接果移花看補籬。腰鎌手斧不妨持。上都新事長先到。老圃閒談未易欺。  
釀酒閉門開社蠶。殺牛留客解耕縻。何時得見織纖玉。右手持杯左棒頤。

次韻顏長道送傅倅

兩見黃花掃落英。南山山寺遍題名。宗成不獨依岑范。魯衛終當似弟兄。  
去歲雲濤浮汗泗。與君泥土滿衣纓。如今別酒休辭醉。試聽雙洪落後聲。

雲龍山觀燒得雲字

丁女真水妃。寒山便火耘。隕霜知已殺。坏戶聽初焚。東緹方熠耀。敲石俄氤氳。  
落點甘泉烽。橫煙楚塞氛。窮蛇上喬木。潛蛟躡浮雲。驚飛墮傷雁。狂走迷癡麇。  
谷蟄起蜩燕。山妖竄夔夔。野竹爆哀聲。幽桂飄冤芬。悲同秋照蟬。快若夏燎蚊。  
火牛入燕壘。燧象奔吳軍。崩騰井陘口。萬馬皆朱幘。搖曳驪山陰。諸姨爛紅裾。  
方隨長風卷。忽值絕澗分。我本山人。習見匪獨聞。偶從二三子。來訪張隱君。  
君家亦何有。物象移朝曛。把酒看飛燼。空庭落繽紛。行觀農事起。畦壟如纈紋。  
細雨發春穎。嚴霜倒秋蕒。始知一炬力。洗盡狐兔羣。

和田國博喜雪

疇昔月如晝。晚來雲暗天。玉花飛半夜。翠浪舞明年。螟螣無遺種。流亡稍占田。  
歲豐君不樂。鐘磬幾時編。

祈雪霧豬泉出城馬上作贈舒堯文

三年走吳越。踏徧千重山。朝隨白雲去。暮與棲鴉還。翩如得木狖。飛步誰能攀。  
一爲符竹累。坐老敲榜閒。此行亦何事。聊散腰脚頑。浩蕩城西南。亂山如玦環。  
山下野人家。桑柘雜榛菅。歲晏風日暖。人牛相對閒。薄雪不蓋土。麥苗稀可刪。  
願君發豪句。嘲詠破天慳。

次韻舒堯文祈雪霧豬泉

長笑蛇醫一寸腹。銜冰吐雹何時足。蒼鵝無罪亦可憐。斬頸橫盤不敢哭。  
豈知泉下有豬龍。臥枕雷車踏陰軸。前年太守爲旱請。雨點隨人如撒菽。  
太守歸國龍歸泉。至今人詠淇園綠。我今又復羅此旱。凜凜疲民在溝瀆。  
卻尋舊跡叩神泉。坐客仍攜王子淵。看草中和樂職頌。新聲妙語慰華顛。  
曉來泉上東風急。須上冰珠老蛟泣。怪詞欲逼龍飛起。險韻不量吾所及。  
行看積雪厚埋牛。誰與春工掀百蟄。此時還復借君詩。餘力汰翰仍貫笠。  
揮毫落紙勿言疲。驚龍再起震失匙。



宋復古畫瀟湘晚景圖三首

西征憶南國。堂上畫瀟湘。照眼雲山出。浮空野水長。舊游心自省。信手筆都忘。會有衡陽客。來看意渺茫。

【二】

落落君懷抱。山川自屈蟠。經營初有適。揮洒不應難。江市人家少。煙村古木攢。知君有幽意。細細爲尋看。

【三】

咫尺殊非少。陰晴自不齊。徑蟠趨後嶮。水會赴前溪。自說非人意。曾經入馬蹄。他年宦游處。應指劔山西。

贈狄崇班季子

狄生臂鷹來。見客不會揖。踞牀咤得雋。借筋數禽入。短後掬豹裘。猶濺猩血濕。指呼索酒嘗。快作長鯨吸。半酣論刀槩。怒髮欲起立。北方老獪子。狂妄尙不繫。要須此慄悍。氣壓邊烽急。夜走追鋒車。生斬活離級。持歸獻天王。封侯穩可拾。何爲走獵師。日使羣毛泣。

石炭并引

彭城舊無石炭。元豐元年十二月始遣人訪獲於州之西南白土鎮之北。冶鐵作兵。犀利

勝常云。

君不見前年雨雪行人斷。城中居民風裂肝。濕薪半束抱衾裯。日暮敲門無處換。豈料山中有遺寶。磊落如礫萬車炭。流膏迸液無人知。陣陣腥風自吹散。根苗一發浩無際。萬人鼓舞千人看。投泥潑水愈光明。爍玉流金見精悍。南山栗林漸可息。北山頑鑛何勞鍛。爲君鑄作百鍊刀。要斬長鯨爲萬段。

蘇東坡詩集卷十八

古今體詩

四十首

人日獵城南會者十人。以身輕一鳥過。槍急萬人呼爲韻。得鳥字。

兒童笑使君。憂慍常悄悄。誰拈白接羅。令跨金駮裏。東風吹濕雪。手冷怯清曉。忽發兩鳴鶻。相趁飛蟲小。放弓一長嘯。目送孤鴻矯。吟詩忘鞭轡。不語頭自掉。歸來仍脫粟。鹽豉煮芹蓼。何似雷將軍。兩眼霜鶻咬。黑頭已爲將。百戰意未了。馬上倒銀餅。得兔不暇燎。少年負奇志。蹭蹬百憂繞。回首英雄人。老死已不少。



青春還一夢。餘年真過鳥。莫上呼鷹臺。平生笑劉表。

將官雷勝得過字代作

胡騎入雲中。急烽連夜過。短刀穿鹵陣。濺血貂裘洩。一來輦轂下。愁悶惟欲臥。

今朝從公獵。稍覺天宇大。一雙鐵絲箭。未發手先唾。射殺雪毛狐。腰閒餘一箇。

臺頭寺步月得人字

風吹河漢掃微雲。步屨中庭月趁人。泥泥爐香初泛夜。離離花影欲搖春。

遙知金闕同清景。想見氈車輾暗塵。回首舊游真是夢。一簪華髮岸綸巾。

臺頭寺送宋希元

相從傾蓋只今年。送別南臺便黯然。入夜更歌金縷曲。他時莫忘角弓篇。

三年不顧東鄰女。二頃方求負郭田。我欲歸休君未可。茂先方議斷龍泉。

種松得徠字

春風吹榆林。亂莢飛作堆。荒園一雨過。戢戢千萬栽。青松種不生。百株望一枚。

一枚已有餘。氣壓千畝槐。野人易斗粟。云自魯徠徠。魯人不知貴。萬竈飛青煤。

東縛同一車。胡爲乎來哉。泫然解其縛。清泉洗浮埃。枝傷葉尙困。生意未肯回。

山僧老無子。養護如嬰孩。坐待走龍蛇。清陰滿南臺。孤根裂山石。直幹排風雷。

我今百日客。養此千歲材。茯苓無消息。雙鬢日夜摧。古今一俯仰。作詩寄餘哀。

作書寄王晉卿。忽憶前年寒食北城之游。走筆爲此詩。

北城寒食煙火微。落花胡蝶作團飛。王孫出游樂忘歸。門前驄馬紫金鞿。

吹笙帳底煙霏霏。行人舉頭誰敢睇。扣門狂客君不麾。更遣傾城出翠帷。

書生老眼省見稍。畫圖但覺周昉肥。別來春物已再菲。西望不見紅日圍。

何時東山歌采薇。把盞一聽金縷衣。

往在東武與人往反作祭字韻詩四首。今黃魯直亦次韻見寄。復和答之。

符堅破荊州。止獲一人半。中郎老不遇。但喜識元嘆。我今獨何幸。文字厭奇玩。

又得天下才。相從百憂散。陰求我輩人。規作林泉伴。寧當待垂老。倉卒收一旦。

不見梁伯鸞。空對孟光案。才難不其然。婦女厠周亂。世豈無作者。於我如既盥。

獨喜誦君詩。咸韶音節緩。夜光一已多。矧獲纍纍貫。相思君欲瘦。不往我真懦。

吾儕眷微祿。寒夜把寸炭。何時定相過。徑就我乎館。飄然東南去。江水清且暖。

相與訪名山。微言師忍粲。

雪齋



君不見峨眉山西雪千里。北望成都如井底。春風百日吹不消。五月行人如凍蟻。紛紛市人爭奪中。誰信言公似贊公。人間熱惱無處洗。故向西齋作雪峰。我夢扁舟入吳越。長廊靜院燈如月。開門不見人與牛。惟見空庭滿山雪。

以雙刀遺子由。子由有詩。次其韻。

寶刀匣不見。但見龍雀環。何曾斬蛟蛇。亦未切琅玕。胡為穿窬輩。見之要領寒。吾刀不汝問。有愧在其肝。念此力自藏。包之虎皮斑。湛然如古井。終歲不復瀾。不憂無所用。憂在用者難。佩之非其人。匣中自長歎。我老衆所易。屢遭非意干。惟有王元通。堦庭秀芝蘭。知子後必大。故擇刀所便。屠狗非不用。一歲六七剗。欲試百鍊剛。要須更泥蟠。作詩銘其背。以待知者看。

遊桓山。會者十人。以春水滿四澤。夏雲多奇峰。爲韻。得澤字。

東郊欲尋春。未見鶯花迹。春風在流水。鳧雁先拍拍。孤帆信溶漾。弄此半篙碧。艤舟桓山下。長嘯理輕策。彈琴石室中。幽響流磔磔。弔彼泉下人。野火失枯腊。悟此人閒世。何者爲真宅。暮回百步洪。散坐洪上石。愧我非王襄。子淵肯見客。臨流吹洞簫。水月照連壁。此歡真不朽。回首歲月隔。想像斜川游。作詩寄彭澤。

戴道士得四字。代作。

少小家江南。寄跡方外士。偶隨白雲出。賣藥彭城市。雪霜侵鬢髮。塵土汗冠袂。賴此三尺桐。中有山水意。自從夷夏亂。七絲久已弃。心知鹿鳴三。不及胡琴四。使君獨慕古。嗜好與衆異。共弔桓離宮。一灑孟嘗淚。歸來鎖塵匣。獨對斷絃喟。挂名石壁閒。寂寞千歲事。

次韻田國博部夫南京見寄二絕。

歲月翩翩下坂輪。歸來杏子已生仁。深紅落盡東風惡。柳絮榆錢不當春。

【一】

火冷錫稀杏粥稠。青裙縞袂餉田頭。大夫行役家人怨。應羨居鄉馬少游。

月夜與客飲杏花下。

杏花飛簾散餘春。明月入戶尋幽人。寒衣步月踏花影。炯如流水涵青蘋。花閒置酒清香發。爭挽長條落香雪。山城酒薄不堪飲。勸君且吸杯中月。洞簫聲斷月明中。惟憂月落酒杯空。明朝捲地春風惡。但見綠葉棲殘紅。

送蜀人張師厚赴殿試二首。



忘歸不覺鬢毛斑。好事郎人尙往還。斷嶺不遮西望眼。送君直過楚王山。

【一】

雲龍山下試春衣。放鶴亭前送落暉。一色杏花三十里。新郎君去馬如飛。

再次韻答田國博部夫還二首

西郊黃土沒車輪。滿面風埃笑路人。已放役夫三萬指。從教積雨洗殘春。

【二】

枝上稀疎地上稠。忍看紅糝落牆頭。風流別乘多才思。歸趁西園秉燭遊。

田國博見示石炭詩有鑄劍斬佞臣之句次韻答之

楚山鐵炭皆奇物。知君欲斫姦邪窟。屬鏤無眼不識人。楚國何曾斬無極。

玉川狂直古遺民。救月裁詩語最真。千里妖墓一寸鐵。地上空愁蟻蝨臣。

答郡中同僚賀雨

水旱行十年。飢疫徧九土。奇窮所向惡。歲歲祈晴雨。雖非爲己求。重請終愧古。

鬼神亦知我。老病入腰膂。何曾拜向人。此意難不許。重雲萎已合。微潤先流礎。

蕭蕭止還作。坐聽及三鼓。天明將吏集。泥土滿鞞屨。登城望穉麥。綠浪風掀舞。

愧我賢友生。雄篇闢新語。君看大熟歲。風雨占十五。天地本無功。祈禳何足數。

渡河不入境。未若無蝗虎。而況刑白鷺。下策君勿取。

留別叔通元弼坦夫

田三昔同僚。向我每傾倒。當年或齟齬。反覆看愈好。寇三我部民。孝弟化鄰保。

有如袁伯業。苦學到衰老。石生吾邑子。勁立風中草。宦游飢生塵。飯水媚翁媪。

我窮交舊絕。計拙集枯槁。三子尤見存。往復紛紜縞。迎我淮水北。送我睢陽道。

願存金石契。凜凜貫華皓。

罷徐州往南京馬上走筆寄子由五首

吏民莫扳援。歌管莫淒咽。吾生如寄耳。寧獨爲此別。別離隨處有。悲惱緣愛結。

而我本無恩。此涕誰爲設。紛紛等兒戲。鞭鞞遭割截。道邊雙石人。幾見太守發。

有知當解笑。撫掌冠纓絕。

【一】

父老何自來。花枝裊長紅。洗盞拜馬前。請壽使君公。前年無使君。魚鼈化兒童。

舉鞭謝父老。正坐使君窮。窮人命分惡。所向招災凶。水來非吾過。去亦非吾功。

【三】

古汴從西來。迎我向南京。東流入淮泗。送我東南行。暫別復還見。依然有餘情。



春雨漲微波。一夜到彭城。過我黃樓下。朱闌照飛甍。可憐洪上石。誰聽月中聲。

【四】

前年過南京。麥老櫻桃熟。今來舊遊處。櫻麥半黃綠。歲月如宿昔。人事幾反覆。青衫老從事。坐穩生髀肉。聯翩閱三守。迎送如轉轂。歸耕何時決。田舍我已卜。

【五】

卜田向何許。石佛山南路。下有爾家川。千畦種秔稔。山泉宅龍窟。平地走膏乳。異時畝一金。近欲爲逃戶。逝將解簪紱。賣劍買牛具。故山豈不懷。廢宅生蒿穉。便恐桐鄉人。長祠中卿墓。

泗州僧伽塔

我昔南行舟繫汴。逆風三日沙吹面。舟人共勸禱靈塔。香火未收旂脚轉。回頭頃刻失長橋。卻到龜山未朝飯。至人無心何厚薄。我自懷私欣所便。耕田欲雨刈欲晴。去得順風來者怨。若使人人禱輒遂。造物應須日千變。今我身世兩悠悠。去無所逐來無戀。得行固願留不惡。每到有求神亦倦。退之舊云三百尺。澄觀所營今已換。不嫌俗士汗丹梯。一看雲山繞淮甸。

龜山

我生飄蕩去何求。再過龜山歲五周。身行萬里半天下。僧臥一菴初白頭。地隔中原勞北望。潮連滄海欲東游。元嘉舊事無人記。故壘摧頽今在不。

書泗州孫景山西軒

落日明孤塔。青山繞病身。知君向西望。不媿塔中人。

泗州過倉中劉景文老兄戲贈一絕

既聚伏波米。還數魏舒籌。應笑蘇夫子。僥倖得湖州。

過淮三首贈景山兼寄子由

好在長淮水。十年三往來。功名真已矣。歸計亦悠哉。今日風憐客。平時浪作堆。晚來洪澤口。捍索響如雷。

【一】

過淮山漸好。松檜亦蒼然。靄靄藏孤寺。泠泠出細泉。故人真吏隱。小檻帶巖偏。卻望臨淮市。東風語笑傳。

【二】

回首濰陽暮。簿書高沒人。何時桐柏水。一洗庾公塵。此去漸佳境。獨游長愴神。待君詩百首。來寫浙西春。



舟中夜起

微風蕭蕭吹菰蒲。開門看雨月滿湖。舟人水鳥兩同夢。大魚驚竄如奔狐。  
夜深人物不相管。我獨形影相嬉娛。晴潮生渚弔寒蚓。落月挂柳看懸蛛。  
此生忽忽憂患裏。清境過眼能須臾。雞鳴鐘動百鳥散。船頭擊鼓還相呼。

余去金山五年而復至。次舊詩韻贈寶覺長老。

誰能斗酒博西涼。但愛齋廚法豉香。舊事真成一夢過。高談爲洗五年忙。  
清風偶與山阿曲。明月聊隨屋角方。稽首願師憐久客。直將歸路指茫茫。

大風留金山兩日

塔上一鈴獨自語。明日顛風當斷渡。朝來白浪打蒼崖。倒射軒窗作飛雨。  
龍驤萬斛不敢過。漁舟一葉從掀舞。細思城市有底忙。卻笑蛟龍爲誰怒。  
無事久留童僕怪。此風聊得妻孥許。瀛山道人獨何事。夜半不眠聽粥鼓。

遊惠山并敘

余昔爲錢塘倅。往來無錫未嘗不至惠山。既去五年。復爲湖州。與高郵秦太虛杭僧參寥同至。覽唐處士王武陵寶羣朱宿所賦詩。愛其語清簡蕭然。有出塵之姿。追用其韻。各賦三首。

夢裏五年過。覺來雙鬢蒼。還將塵土足。一步漪瀾堂。俯窺松桂影。仰見鴻鶴翔。  
炯然肝肺閒。已作冰玉光。虛明中有色。清淨自生香。還從世俗去。永與世俗忘。

【二】

薄雲不遮山。疎雨不濕人。蕭蕭松徑滑。策策芒鞋新。嘉我二三子。皎然無溜磷。  
勝游豈殊昔。清句仍絕塵。弔古泣舊史。疾譏歌小旻。哀哉扶風子。難與巢許鄰。

【三】

敲火發山泉。烹茶避林樾。明窗傾紫盞。色味兩奇絕。吾生眠食耳。一飽萬想滅。  
頗笑玉川子。飢弄三百月。豈如山中人。睡起山花發。一甌誰與共。門外無來轍。

贈惠山僧惠表

行徧天涯意未闌。將心到處遣人安。山中老宿依然在。案上楞嚴已不看。  
敲枕落花餘幾片。閉門新竹自千竿。客來茶罷空無有。盧橘楊梅尙帶酸。

贈錢道人

書生苦信書。世事仍臆度。不量力所負。輕出千鈞諾。當時一快意。事過有餘怍。  
不知幾州鐵。鑄此一大錯。我生涉憂患。常恐長罪惡。靜觀殊可喜。脚淺猶容卻。  
而況錢夫子。萬事初不作。相逢更何言。無病亦無藥。



與秦太虛參寥會於松江而關長徐安中適至分韻得風字二首

吳越溪山興未窮。又扶衰病過垂虹。浮天自古東南水。送客今朝西北風。  
絕境自忘千里遠。勝游難復五人同。舟師不會留連意。擬看斜陽萬頃紅。

【二】

二子緣詩老更窮。人閒無處吐長虹。平生睡足連江雨。盡日舟橫擊岸風。  
人笑年來三黜慣。天教我輩一尊同。知君欲寫長相憶。更送銀盤尾鬣紅。

次韻關令送魚

舉網驚呼得巨魚。饑涎不易忍流酥。更煩赤脚長鬚老。來趁西風十幅蒲。

次韻秦太虛見戲耳聾

君不見詩人借車無可載。畱得一錢何足賴。晚年更似杜陵翁。右臂雖存耳先聾。  
人將蟻動作牛鬪。我覺風雷真一噫。聞塵掃盡根性空。不須更枕清流派。  
大朴初散失混沌。六鑿相攘更勝敗。眼花亂墜酒生風。口業不停詩有債。  
君知五蘊皆是賊。人生一病今先差。但恐此心終未了。不見不聞還是礙。  
今君疑我特佯聾。故作嘲詩窮嶮怪。須防額癢出三耳。莫放筆端風雨快。

端午徧遊諸寺得禪字

肩輿任所適。遇勝輒流連。焚香引幽步。酌茗開淨筵。微雨止還作。小窗幽更妍。  
盆山不見日。草木自蒼然。忽登最高塔。眼界窮大千。卞峰照城郭。震澤浮雲天。  
深沈既可喜。曠蕩亦所便。幽尋未云畢。墟落生晚煙。歸來記所歷。耿耿清不眠。  
道人亦未寢。孤燈同夜禪。

送劉寺丞赴餘姚

中和堂後石楠樹。與君對牀聽夜雨。玉筍哀怨不逢人。但見香煙橫碧縷。  
謳吟思歸出無計。坐想蟋蟀空房語。明朝開鑰放觀潮。豪氣正與潮爭怒。  
銀山動地君不看。獨愛清香生雲霧。別來聚散如宿昔。城郭空存鶴飛去。  
我老人閒萬事休。君亦洗心從佛祖。手香新寫法界觀。眼淨不覩登伽女。  
餘姚古縣亦何有。龍井白泉甘勝乳。千金買斷顧渚春。似與越人降日注。



蘇東坡詩集卷十九

古今體詩 五十首

書上訪道人<sub>二</sub>不遇

花光紅滿欄。草色綠無岸。不逢青眼人。長歌白石爛。

李公擇過高郵。見施大夫與孫莘老賞花詩。憶與僕去歲會於彭門。折花餽

筍故事。作詩二十四韻見戲。依韻奉答。亦以戲公擇云

汝陽真天人。絹帽著紅襜。纏頭三百萬。不買一微哂。共誇青山峰。曲盡花不隕。當時謫仙人。逸韻謝封畛。詩成天一笑。萬象解寒窘。驚開小桃杏。不待雷發軫。餘波尚涓滴。乞與居易稂。爾來誰復見。前輩風流盡。寂寞兩詩人。殘紅對櫻筍。飢腸得一醉。妙語傳不泯。君來恨不與。更復相牽引。我老心已灰。空煩扇餘燼。天游照六鑿。虛室掃充牣。懸知色竟空。那復嗜烏吻。蕭然一方丈。居士老龐蘊。散花從滿袂。不答天女問。故人猶故目。怨句寫餘恨。疑我此心在。遮防費欄楯。應虞已斃蛇。折尾時一蠢。仄聞孟光賢。未學處仲忍。寄招應已足。左右侍雲鬢。

何時花月夜。羊酒謝不敏。此生如幻耳。戲語君勿愠。應同亡是公。一對子虛听。

王鞏清虛堂

清虛堂裏王居士。閉眼觀心如止水。水中照見萬象空。敢問堂中誰隱几。吳興太守老且病。堆案滿前長渴睡。願君勿笑反自觀。夢幻去來殊未已。長疑安石恐不免。未信犀首終無事。勿將一念住清虛。居士與我蓋同耳。

次韻答王鞏

我有方外客。顏如瓊之英。十年塵土窟。一寸冰雪清。竭來從我遊。坦率見真情。顧我無足戀。戀此山水清。新詩如彈丸。脫手不暫停。昨日放魚回。衣巾滿浮萍。今日扁舟去。白酒載烏程。山頭見月出。江路聞鼃鳴。莫作孺子歌。滄浪濯吾纓。吾詩自堪唱。相子棹歌聲。

和孫同年卞山龍洞禱晴

吳興連月雨。釜甑生魚蛙。往問卞山龍。曷不安厥家。梯空尚巉絕。俯視驚谿訝。神井湧雲蓋。陰崖垂蘚花。交流百道泉。赴谷走羣蛇。不知落何處。隱隱如繅車。我來叩石戶。飛鼠翻白鴉。寄語洞中龍。睡味豈不嘉。雨師少弭節。雷師亦停撻。



積水得反壑。稻苗出泥沙。農夫免菜色。龍亦飽豚豕。看君擁黃紬。高臥放晚衙。  
乘舟過賈收水閣。收不在見其子。三首  
愛酒陶元亮。能詩張志和。青山來水檻。白雨滿漁簑。淚垢添丁面。貧低舉案蛾。  
不知何所樂。竟夕獨酣歌。

【二】

嫋嫋風蒲亂。猗猗水荇長。小舟浮鴨綠。大杓瀉鶯黃。得意酒詩社。終身魚稻鄉。  
樂哉無一事。何處不清涼。

【三】

曳杖青苔岸。繫船枯柳根。德公方上冢。季路獨畱言。已占蒲魚港。更開松菊園。  
從茲來往數。兒女自嚮門。

次韻孫祕丞見贈

感慨清哀似變風。老於詩句耳偏聰。迂疎自笑成何事。冷澹誰能用許功。  
不怕飛蚊如立豹。肯隨白鳥過垂虹。吟哦相對忘三伏。擬泛冰溪入雪宮。

與客游道場何山得鳥字

清溪到山盡。飛路盤空小。紅亭與白塔。隱見喬木杪。中休得小菴。孤絕寄雲表。

洞庭在北戶。雲水天渺渺。菴僧俗緣盡。淨業洗未了。十年畫鶴竹。益以詩自繞。  
高堂儼像設。禪室各深窈。奔泉何處來。華屋過溪沼。何山隔幽谷。去路清且悄。  
長松度翠蔓。絕壁挂啼鳥。我友自杭來。尙歎所歷少。歸途風雨作。一洗紅日燎。  
俄驚萬竅號。黑霧卷蓬蓼。舟人紛變色。坐羨輕鷗矯。我獨喚酒杯。醉死勝流殍。  
書生例強狠。造物空煩擾。更將掀舞勢。把燭畫風篠。美人爲破顏。正似腰支嫋。  
明朝更陳迹。清景墮空杳。作詩記餘歡。萬古一昏曉。

僕去杭五年。吳中仍歲大飢疫。故人往往逝去。聞湖上僧舍。不復往日繁

麗。獨淨慈本長老。學者益盛。作詩寄之

來往三吳一夢閒。故人半作冢纍然。獨依舊社傳真法。要與遺民度厄年。  
趙叟近聞還印綬。竺翁先已反林泉。何時策杖相隨去。任性逍遙不學禪。

船趨風并引

吳中梅雨既過。颯然清風彌旬。歲歲如此。湖人謂之船趨風。是時海舶初回云。此風自海  
上與船俱至云爾。

三旬已過黃梅雨。萬里初來船趨風。幾處縈回度山曲。一時清駛滿江東。  
驚飄蕪蕪先秋葉。喚醒昏昏嗜睡翁。欲作蘭臺快哉賦。卻嫌分別問雌雄。



丁公默送蝻蚌

溪邊石蟹小于錢。喜見輪困赤玉盤。半殼含黃宜點酒。兩螯斫雪勸加餐。  
蠻珍海錯聞名久。怪雨腥風入座寒。堪笑吳興饒太守。一詩換得兩尖團。

送孫著作赴考城兼寄錢醇老李邦直二君於孫處有書見及

使君閒如雲。欲出誰肯伴。清風獨無事。一嘯亦可喚。來從白蘋洲。吹我明月觀。  
門前遠行客。青衫流白汗。問子何恩恩。王事不可緩。故人錢與李。清廟兩圭瓚。  
蔚爲萬乘器。尚記溝中斷。子亦東南珍。價重不可算。別情何以慰。酒盡對空案。  
惟持一榻涼。勸子巾少岸。北風那復有。塵土飛灰炭。欲寄二大夫。發發不可絆。

泛舟城南會者五人分韻賦詩得人皆苦炎字四首

城中樓閣似魚鱗。不見清風起白蘋。試選茗溪最深處。仍呼我輩不羈人。  
窺船野鶴何曾下。見燭飛蟲空自馴。遠郭荷花一千頃。誰知六月下塘春。

【二】

苦熱誠知處處皆。何當危坐學心齋。海螯要共詩人把。溪月行遭霧雨霾。  
鄉國飄零斷書信。弟兄流落隔江淮。便應築室茗溪上。荷葉遮門水浸階。

【三】

紫蟹鱸魚賤如土。得錢相付何曾數。碧筍時作象鼻彎。白酒微帶荷心苦。  
運肘風生看斫鱸。隨刀雪落驚飛縷。不將醉語作新詩。飽食應慙腹如鼓。

【四】

橋上游人夜未厭。共依水檻立風簷。樓中煮酒初嘗芡。月下新妝半出簾。  
南郭清游繼顏謝。北窗歸臥等羲炎。人間寒熱無窮事。自笑疎頑不受店。

與王郎夜飲井水

吳興六月水泉溫。千頃菰蒲聚鬪蚊。此井獨能深一丈。源龍如我亦如君。

次韻李公擇梅花

詩人固長貧。日午飢未動。偶然得一飽。萬象因嘲弄。尋花不論命。愛雪長忍凍。  
天公非不憐。聽飽即喧闐。君爲三郡守。所至滿賓從。江湖常在眼。詩酒事豪縱。  
奉使今折磨。清此於陵仲。永懷茶山下。攜妓修春貢。更憶檻泉亭。插花雲髻重。  
蕭然臥瀟麓。愁聽春禽呀。忽見早梅花。不飲但孤諷。詩成獨寄我。字字愈頭痛。  
嗟君本侍臣。筆橐從上雍。脫鞵吟芍藥。給札賦雲夢。何人慰流落。嘉薦天爲種。  
杯傾笛中吟。帽拂果下鞵。感時念羈旅。此意吾儕共。故山今何有。桐花集玄鳳。  
君亦憶匡廬。歸掃藏書洞。何當種此花。各抱漢隆璽。



送淵師歸徑山

我昔嘗爲徑山客。至今詩筆餘山色。  
 谿城六月水雲蒸。飛蚊猛捷如花鷹。  
 山中故人知我至。爭來問訊今何似。  
 爲言百事不如人。兩眼猶能書細字。

送表忠觀錢道士歸杭并引

熙寧十年。詔以龍山廢佛祠爲表忠觀。元豐二年。通教自杭來。見予於吳興。問觀亦卒工乎。曰未也。杭人比歲不登。莫有助我者。余曰。異哉。杭人重施輕財。是不獨爲福田也。將自託於不朽。今歲成矣。子其行乎。及還作詩送之。

先王舊德在民心。著令稱忠上意深。  
 墮淚行看會祠下。挂名爭欲刻碑陰。  
 淒涼破屋塵凝坐。憔悴雲孫雪滿簪。  
 未信諸豪容郭解。卻從他縣施千金。

次周開祖長官見寄

俯仰東西閱數州。老於歧路豈伶優。  
 政拙年年祈水旱。民勞處處避嘲謳。  
 仕道固應慚孔孟。扶顛未可責由求。  
 惘惘可憐真喪狗。時時相觸似虛舟。  
 初聞父老推謝令。旋見兒童迎細侯。  
 河吞巨野那容塞。盜入蒙山不易搜。  
 漸謀田舍猶懷祿。未脫風濤且傍洲。  
 榻來震澤都如夢。只有蒼溪可倚樓。

齋釀酸甜如蜜水。樂工零落似風甌。  
 風定軒窗飛豹脚。雨餘欄檻上蝸牛。  
 憶昔湖山共尋勝。相逢杯酒兩忘憂。  
 百首共成山下集。三人同作月中遊。  
 已許春風歸過我。預憂詩筆老難酬。  
 犀首正緣無事飲。馮驩應爲有魚酉。  
 遠思顏柳并諸謝。近憶張陳與老劉。  
 舊遊到處皆蒼蘚。同甲惟君尙黑頭。  
 醉看梅雪清香過。夜棹風船駭汗流。  
 海南未起垂天翼。澗底仍依徑寸床。  
 此生歲月行飄忽。晚節功名亦謬悠。  
 從今更踏青州麴。薄酒知君笑督郵。

林子中以詩寄文與可及余。與可既歿。追和其韻。

斯人所甚厭。投畀每不受。欲其少須臾。奪去唯恐後。  
 賦才有巨細。無異斛與斗。胡不安其分。但聽物所誘。  
 坐令雞棲車。長載朱伯厚。平生無一旅。既死咤萬口。  
 懸知臨絕意。要我一執手。相望五百里。安得自其牖。  
 伶俜嵇紹孤。老病孟光偶。世人賤目見。爭笑千金帚。  
 但知愛墨竹。此歎吾已久。故人多厚祿。能復哀君否。  
 無乃亦假守。云誰尸此職。意合無妍醜。胸臆生堆阜。  
 後事待諸友。識者當有取。飢寒自奔走。

與王郎昆仲及兒子邁遠城觀荷花登峴山亭晚入飛英寺分韻得月明



星稀四首

昨夜雨鳴渠。曉來風襲月。蕭然欲秋意。谿水清可啜。環城三十里。處處皆佳絕。蒲蓮浩如海。時見舟一葉。此閒見避世。青蕩低白髮。相逢欲相問。已逐鷺鷥沒。

【一】

清風定何物。可愛不可名。所至如君子。草木有嘉聲。我行本無事。孤舟任斜橫。中流自偃仰。適與風相迎。舉杯屬浩渺。樂此兩無情。歸來兩溪閒。雲水夜自明。

【三】

茗水如漢水。鱗鱗鴨頭青。吳興勝襄陽。萬瓦浮青冥。我非羊叔子。媿此峴山亭。悲傷意則同。歲月如流星。從我兩王子。高鴻插修翎。湛輩何足道。當以德自銘。

【四】

吏民憐我嬾。鬪訟日已稀。能為無事飲。可作不夜歸。復尋飛英游。盡此一寸暉。撞鐘履聲集。顛倒雲山衣。我來無時節。杖屨自推扉。莫作使君看。外似中已非。

次韻章子厚飛英畱題

款段曾陪馬少游。而今人在鳳麟洲。黃公酒肆如重過。杳杳白蘋天盡頭。

城南縣尉水亭得長字

兩尉鬱相望。東西百步場。揮旂蒲柳市。伐鼓水雲鄉。已作觀魚檻。仍開射鴨堂。全家依畫舫。極目亂紅妝。激激波頭細。疎疎雨脚長。我來閒濯足。溪漲欲浮牀。澤國山圍裏。孤城水影旁。欲知歸路處。葦外記風檣。

與胡祠部游法華山

陂湖欲盡山為界。始見寒泉落高派。道人未放泉出山。曲折虛堂瀉清快。使君年老尙兒戲。綠棹紅船舞澎湃。一笑翻杯水濺裙。餘歡濯足波生隘。長松攬天龍起立。蒼藤倒谷雲崩壞。仰穿蒙密得清曠。一覽震澤吁可怪。誰云四萬八千頃。渺渺東盡日所曬。歸途十里盡風荷。清唱一聲聞露薤。嗟予少小慕真隱。白髮青衫天所械。忽逢佳士與名山。何異枯楊便馬疥。君猶鸞鶴偶飄墮。六翮如雲豈長鍛。不將新句紀茲游。恐負山中清淨債。

又次前韻贈賈耘老

具區吞滅三州界。浩浩湯湯納千派。從來不著萬斛船。一葉漁舟恣奔快。仙壇古洞不可到。空聽餘瀾鳴澎湃。今朝偶上法華嶺。縱觀始覺人寰隘。山頭臥碣弔孤冢。下有至人僵不壞。空餘白棘網秋蟲。無復青蓮出幽怪。



我來徒倚長松下。詩人空腹待黃精。白花半落紫穉香。

欲掘茯苓親洗曬。生事只看長柄械。攘臂欲助磨鎌鍛。

聞道山中富奇藥。今年大熟期一飽。安得山泉變春酒。

往往靈芝雜葵蕪。食葉微蟲直癩疥。與子一洗尋常債。

趙閱道高齋

見公奔走謂公勞。不知高齋竟何義。功名富貴皆逆旅。坐看猿猴落置罔。長松百尺不自覺。

聞公隱退云公高。此名之設緣吾曹。黃金知繫何人袍。兩手未肯置所操。企而羨者蓬與蒿。

公心底處有高下。公年四十已得道。超然已了一大事。乃知賢達與愚陋。我欲贏糧往問道。

夢幻去來隨所遭。俗緣未盡餘伊臯。挂冠而去真秋毫。豈直相去九牛毛。未應舉臂辭盧敖。

送俞節推

吳興有君子。澹如朱絲琴。猶喜見諸郎。窈然清且深。

一唱三太息。異時多良士。

至今有遺音。末路喪初心。

嗟余與夫子。相避如辰參。我生不有命。其肯枉尺尋。

次韻答孫倅

十年身不到朝廷。

欲伴騷人賦落英。

但得低頭拜東野。

不辭中路候淵明。

艤舟蒼雪人安在。

卜築江淮計已成。

千里論交一言足。

與君蓋亦不須傾。

重寄

凜然高節照時人。好詩衝口誰能擇。

不信微官解浼君。俗子疑人未遣聞。

蔣濟謂能來阮籍。乞取千篇看俊逸。

薛宣真欲吏朱雲。不將輕比鮑參軍。

次韻和劉貢父登黃樓見寄並寄子由二首

清派連淮上。坐令乘傳遽。會合難前定。至今清夜夢。

黃樓冠海遇。奔走爲儲須。歸休試後圖。飛轡策天吳。

此詩尤偉麗。邂逅我已失。腴田未可買。窮鬼卻須呼。

夫子計魁梧。世俗輕瑚璉。巾箱襲武夫。登臨誰與俱。貧食倉氏粟。身聽治家樞。二水何年到。雙洪不受虬。

【一】

與子皆去國。不矜持漢節。自寫千言賦。

十年天一隅。猶喜攬桓須。新裁六幅圖。

數奇逢惡歲。清句金絲合。傳看一座聳。

計拙集枯梧。好士餘劉表。勸著尺書呼。窮交憶灌夫。吟哦出新意。指畫想前樞。莫使騷人怨。東游不到吳。

此詩寄子由。

吳江岸



曉色兼秋色。蟬聲雜鳥聲。壯懷消鑠盡。回首尚心驚。

榆

我行汗提上。厭見榆陰綠。千株不盈畝。斬伐同一束。及居幽囚中。亦復見此木。蠹皮溜秋雨。病葉埋牆曲。誰言霜雪苦。生意殊未足。坐待春風至。飛英覆空屋。

槐

憶我初來時。草木向衰歇。高槐雖經秋。晚蟬猶抱葉。淹留未云幾。離離見疎莢。棲鴉寒不去。哀叫飢啄雪。破巢帶空枝。疎影挂殘月。豈無兩翅羽。伴我此愁絕。

竹

今日南風來。吹亂庭前竹。低昂中音會。甲刃紛相觸。蕭然風雪意。可折不可辱。風霽竹已回。猗猗散青玉。故山今何有。秋雨荒籬菊。此君知健否。歸掃南軒綠。

柏

故園多珍木。翠柏如蒲葦。幽囚無與樂。百日看不已。時來拾流膠。未忍踐落子。當年誰所種。少長與我齒。仰視蒼蒼幹。所閱固多矣。應見李將軍。膽落溫御史。己未十月十五日。獄中恭聞太皇太后不豫有赦作詩。

庭柏陰陰晝掩門。

烏知有赦開黃昏。

漢宮自種三生福。

楚客還招九死魂。

縱有鋤犁及田畝。

已無面目見邱園。

只應聖主如堯舜。

猶許先生作正言。

十月二十日恭聞太皇太后升遐。以軾罪人不許成服。欲哭則不敢。欲泣則不可。故作挽詞二章。

巍然開濟兩朝勳。

信矣才難十亂臣。

原廟固應祠百世。

先王何止活千人。

和熹未聖猶貪位。

明德雖賢不及民。

月落風悲天雨泣。

誰將椽筆寫光塵。

未報山陵國士知。

遶林松柏已猗猗。

一聲慟哭猶無所。

萬死酬恩更有時。

夢裏天衢隘雲仗。

人閒雨淚變彤帷。

關雎卷耳平生事。

白首曩臣正坐詩。

予以事繫御史臺獄。獄吏稍見侵。自度不能堪。死獄中。不得一別子由。故作二詩。授獄卒梁成。以遺子由。

聖主如天萬物春。

小臣愚暗自亡身。

百年未滿先償債。

十口無歸更累人。

是處青山可埋骨。

他年夜雨獨傷神。

與君世世爲兄弟。

又結來生未了因。

【二】

柏臺霜氣夜淒淒。

風動琅璫月向低。

夢繞雲山心似鹿。

魂驚湯火命如雞。



眼中犀角真吾子。

身後牛衣愧老妻。

百歲神游定何處。

桐鄉知葬浙江西。

十二月二十八日蒙恩責授檢校水部員外郎黃州團練副使復用前韻

二首

百日歸期恰及春。

餘年樂事最關身。

出門便旋風吹面。

走馬聯翩鵲啣人。

卻對酒杯渾似夢。

試拈詩筆已如神。

此災何心深追咎。

竊祿從來豈有因。

【一】

平生文字爲吾累。

此法聲名不厭低。

塞上縱歸他日馬。

城東不鬪少年雞。

休官彭澤貧無酒。

隱几維摩病有妻。

堪笑睢陽老從事。

爲余投檄向江西。

### 蘇東坡詩集卷二十

#### 古今體詩

六十首

陳州與文郎逸民飲別攜手河堤上作此詩

白酒無聲滑瀉油。

醉行堤上散吾愁。

春風料峭羊角轉。

河水渺緜瓜蔓流。

君已思歸夢巴峽。

我能未到說黃州。

此身聚散何窮已。

未忍悲歌學楚囚。

子由自南都來陳三日而別

夫子自逐客。

尙能哀楚囚。

奔馳三百里。

徑來寬我憂。

相逢知有得。

別來未一年。

落盡驕氣浮。

嗟我晚聞道。

款啓如孫休。

至言難久服。

悟彼善知識。

妙藥應所投。

納之憂惠場。

磨以百日愁。

冥頑雖難化。

平時種種心。

次第去莫留。

但餘無所還。

永與夫子游。

此別何足道。

畏蛇不下榻。

睡足吾無求。

便爲齊安民。

何必歸故邱。

正月十八日蔡州道上遇雪次子由韻二首

蘭菊有生意。

微陽回寸根。

方憂集暮雪。

復喜迎朝暾。

憶我故居室。

松竹半傾瀉。

未數葵與萱。

三徑瑤草合。

一瓶井花溫。

至今行吟處。

一朝出從仕。

永愧李仲元。

晚歲益可羞。

犯雪方南奔。

山城買廢圃。

長使齊安人。

指說故侯園。

【二】

鉛膏染髭須。

旋露霜雪根。

不如閉目坐。

丹府夜自嗽。

誰知憂患中。



大雪從壓屋。我非兒女輩。平生學踵息。坐覺兩鞮溫。下馬作雪詩。滿地鞭箠痕。佇立望原野。悲歌爲黎元。道逢射獵子。遙指狐兔奔。蹤跡尙可原。窟穴何足掀。寄謝李丞相。吾將反邱園。

過新息畱示鄉人任師中

昔年嘗羨任夫子。卜居新息臨淮水。怪君便爾忘故鄉。稻熟魚肥信清美。竹陂雁起天爲黑。桐柏煙橫山半紫。知君坐受兒女困。悔不先歸弄清泚。塵埃我亦失收身。此行蹭蹬尤可鄙。寄食方將依白足。附書未免煩黃耳。往雖不及來有年。詔恩尙許歸田里。卻下關山入蔡州。爲買烏犍三百尾。

過淮

朝離新息縣。初亂一水碧。暮宿淮南邨。已度千山赤。驪號古戍。霧雨暗破驛。回頭梁楚郊。永與中原隔。黃州在何許。想像雲夢澤。吾生如寄耳。初不擇所適。但有魚與稻。生理已自畢。獨喜小兒子。少小事安佚。相從艱難中。肝肺如鐵石。便應與語話。何止寄衰疾。

書馨公詩後并引

過加祿鎮南二十五里大許店。休馬於逆旅。祁宗祥家。見壁上有幅紙。題詩云。滿院秋光濃欲滴。老僧倚杖青松側。只怪高聲問不謦。嗔余踏破蒼苔色。其後題云。溘水僧寶馨。宗祥謂余。此光黃閒狂僧也。年百三十。死於熙寧十年。既死。人有見之者。宗祥言其異事甚多。作是詩以識之。馨公本名清戒。俗謂之戒和尚云。

馨公昔未化。來往淮山曲。壽逾兩甲子。氣壓諸尊宿。但嗟濁惡世。不受龍象蹴。我來不及見。悵望空遺躅。霜顛隱白毫。鎖骨埋青玉。皆云似達磨。隻履還西竺。壁閒餘清詩。字勢頗拔俗。爲吟五字偈。一洗凡眼肉。

游淨居寺并敘

淨居寺在光山縣南四十里。大蘇山之南。小蘇山之北。寺僧居仁爲余言。齊天保中。僧惠思過此。見父老。問其姓。曰蘇氏。又得二山名。乃嘆曰。吾師告我。遇三蘇則住。遂畱結菴。而父老竟無有。蓋山神也。其後僧智凱見思於此山。而得法焉。則世所謂思大和尚。智者大師是也。唐神龍中。道岸禪師。始建寺於其地。廣明庚子之亂。寺廢於兵火。至乾興中。乃復而賜名曰梵天云。

十載遊名山。自製山中衣。願言畢婚嫁。攜手老翠微。不悟俗緣在。失身陷危機。刑名非宿學。陷穽損積威。遂恐生死隔。永與雲山違。今日復何日。芒屨自輕飛。



稽首兩足尊。舉頭雙涕揮。靈山會未散。八部猶光輝。願從二聖往。一洗千劫非。徘徊竹溪月。空翠搖煙霏。鐘聲自送客。出谷猶依依。回首吾家山。歲晚將焉歸。

梅花二首

春來幽谷水潺潺。的皪梅花草棘閒。一夜東風吹石裂。半隨飛雪度關山。

【二】

何人把酒慰深幽。開自無聊落更愁。幸有青溪三百曲。不辭相送到黃州。

戲作種松

我昔少年日。種松滿東岡。初移一寸根。瑣細如插秧。二年黃茅下。一一攢麥芒。三年出蓬艾。滿山散牛羊。不見十餘年。想作龍蛇長。夜風波浪碎。朝露珠璣香。我欲食其膏。已伐百本桑。人事多乖迕。神藥竟渺茫。竭來齊安野。夾路須鬻蒼。會開龜蛇窟。不惜斤斧瘡。縱未得茯苓。且當拾流肪。釜盎百出入。皎然散飛霜。槁死三彭仇。深換五穀腸。青骨凝綠髓。丹田發幽光。白髮何足道。要使雙瞳方。卻後五百年。騎鶴還故鄉。

萬松亭并敘

麻城縣令張毅植萬松於道周。以芘行者。且以名其亭。去未十年。而松之存者十不及三。

四傷來者之不嗣其意也。故作是詩。

十年栽種百年規。好德無人助我儀。縣令若同倉庾氏。亭松應長子孫枝。

天公不救斧斤厄。野火解憐冰雪姿。為問幾株能合抱。殷勤記取角弓詩。

張先生并敘

先生不知其名。黃州故縣人。本姓盧。為張氏所養。陽狂垢污。寒暑不能侵。常獨行市中。夜或不知其所止。往來者欲見之。多不能致。余試使人召之。欣然而來。既至。立而不言。與之言不應。使之座不可。但俯仰熟視。傳舍堂中。久之而去。夫孰非傳舍者。是中竟何有乎。然余以有思。維心追躡其意。蓋未得也。

熟視空堂竟不言。故應知我未天全。肯來傳舍人皆說。能致先生子亦賢。

脫屣不妨眠糞屋。流澌爭見浴冰川。士廉豈識桃椎妙。妄意稱量未必然。

初到黃州

自笑平生為口忙。老來事業轉荒唐。長江繞郭知魚美。好竹連山覺筍香。

逐室不妨員外置。詩人例作水曹郎。只慙無補絲毫事。尚費官家壓酒囊。

陳季常所畜朱陳村嫁娶圖二首



何年願陸丹青手。

畫作朱陳嫁娶圖。

聞道一村惟兩姓。

不將門戶買崔盧。

【二】

我是朱陳舊使君。

勸農曾入杏花村。

而今風物那堪畫。

縣吏催錢夜打門。

少年時嘗過一村院。見壁上有詩云。夜涼疑有雨。院靜似無僧。不知何人

詩也。宿黃州禪智寺。寺僧皆不在。夜半雨作。偶記此詩。故作一絕。

佛燈漸暗飢鼠出。

山雨忽來修竹鳴。

知是何人舊詩句。

已應知我此時情。

定惠院寓居。月夜偶出。

幽人無事不出門。

偶逐東風轉良夜。

參差玉宇飛木末。

繚繞香煙來月下。

江雲有態清自媚。

竹露無聲浩如瀉。

已驚弱柳萬絲垂。

尚有殘梅一枝亞。

清詩獨吟還自和。

白酒已盡誰能借。

不惜青春忽忽過。

但恐歡意年年謝。

自知醉耳愛松風。

會揀霜林結茅舍。

浮浮大甑長炊玉。

漚漚小槽如壓蔗。

飲中真味老更濃。

醉裏狂言醒可怕。

閉門謝客對妻子。

倒冠落佩從嘲罵。

次韻前篇

去年花落在徐州。

對月酣歌美清夜。

今年黃州見花發。

小院閉門風露下。

萬事如花不可期。

餘年似酒那禁瀉。

憶昔扁舟泝巴峽。

落帆樊口高桅亞。

長江袞袞空自流。

白髮紛紛寧少借。

竟無五畝繼沮溺。

空有千篇凌鮑謝。

至今歸計負雲山。

未免孤衾眠客舍。

少年辛苦真食蓼。

老境安閒如啖蔗。

飢寒未至且安居。

憂患已空猶夢怕。

穿花踏月飲村酒。

免醉歸遭官長罵。

安國寺浴

老來百事懶。

身垢猶念浴。

尚煩月一沐。

山城足薪炭。

塵垢能幾何。

儻然脫羈梏。

披衣坐小閣。

散髮臨修竹。

豈惟忘淨穢。

兼以洗榮辱。

默歸母多談。

此理觀要熟。

安國寺尋春

臥聞百舌呼春風。

起尋花柳村村同。

城南古寺修竹合。

小房曲檻敲深紅。

看花歎老憶年少。

對酒思家愁老翁。

病眼不羞雲母亂。

鬢絲強理茶煙中。

遙知二月王城外。

玉仙洪福花如海。

薄羅勻霧蓋新妝。

快馬爭風鳴雜珮。

玉川先生真可憐。

一生耽酒終無錢。

病過春風九十日。

獨抱添丁看花發。

寓居定惠院之東。雜花滿山。有海棠一株。士人不知貴也。

江城地瘴蕃草木。

只有名花苦幽獨。

嫣然一笑竹籬間。

桃李漫山細麤俗。



也知造物有深意。故遣佳人在空谷。自然富貴出天姿。不待金盤薦華屋。  
 朱唇得酒暈生臉。翠袖卷紗紅映肉。林深霧暗曉光遲。日暖風輕春睡足。  
 雨中有淚亦悽愴。月下無人更清淑。先生食飽無一事。散步逍遙自捫腹。  
 不問人家與僧舍。拄杖敲門看修竹。忽逢絕豔照衰朽。歎息無言揩病目。  
 陋邦何處得此花。無乃好事移西蜀。寸根千里不易致。銜子飛來定鴻鴻。  
 天涯流落俱可念。為飲一樽歌此曲。明朝酒還醒獨來。雪落紛紛那忍觸。

次韻樂著作野步

老來幾不辨西東。秋後霜林且強紅。眼暈見花真是病。耳虛聞蟻定非聰。  
 酒醒不覺春強半。睡起常驚日過中。植杖偶逢為黍客。披衣閒咏舞雩風。  
 仰看落葉收松粉。俯見新芽摘杞叢。楚雨還昏雲夢澤。吳潮不到武昌宮。  
 廢興古郡詩無數。寂寞閒窗易粗通。解組歸來成二老。風流他日與君同。

二月二十六日雨中熟睡。至晚強起出門。還作此詩。意思殊昏昏也。

卯酒困三杯。午餐便一肉。雨聲來不斷。睡味清且熟。昏昏覺還臥。展轉無由足。  
 強起出門行。孤夢猶可續。泥深竹雞語。村暗鳩婦哭。明朝看此詩。睡語應難讀。  
 雨晴後步至四望亭下魚池上。遂自乾明寺前東岡上歸二首。

雨過浮萍合。蛙聲滿四鄰。海棠真一夢。梅子欲嘗新。拄杖閒挑菜。鞦韆不見人。  
 殷勤木芍藥。獨自殿餘春。

【二】

高亭廢已久。下有種魚塘。暮色千山入。春風百草香。市橋人寂寂。古寺竹蒼蒼。  
 鶴鶴來何處。號鳴滿夕陽。

雨中看牡丹三首

霧雨不成點。映空疑有無。時於花上見。的皪走明珠。秀色洗紅粉。暗香生雪膚。  
 黃昏更蕭瑟。頭重欲相扶。

【一】

明日雨當止。晨光在松枝。清寒入花骨。肅肅初自持。午景發濃豔。一笑當及時。  
 依然暮還斂。亦自惜幽姿。

【三】

幽姿不可惜。後日東風起。酒醒何所見。金粉抱青子。千花與百草。共盡無妍鄙。  
 未忍汚泥沙。牛酥煎落葉。

次韻樂著作送酒



少年多病怯杯觴。老去方知此味長。萬斛羈愁都似雪。一壺春酒若爲湯。

次韻樂著作天慶觀醮

濁世紛紛肯下臨。夢尋飛步五雲深。無因上到通明殿。只許微聞玉佩音。

王齊萬秀才寓居武昌縣劉郎洑。正與伍洲相對。伍子胥奔吳。所從渡江也。

君家稻田冠西蜀。搗玉揚珠三萬斛。塞江流枿起書樓。碧瓦朱欄照山谷。

傾家取樂不論命。散盡黃金如轉燭。唯餘舊書一百車。方舟載入荆江曲。

江上青山亦何有。伍洲遙望劉郎藪。明朝寒食當過君。請殺耕牛壓私酒。

與君飲酒細論文。酒酣訪古江之濱。仲謀公瑾不須弔。一醉波神英烈君。

杜沂游武昌。以醪醕花菩薩泉見餉二首

醪醕不爭春。寂寞開最晚。青蛟走玉骨。羽蓋蒙珠幘。不妝豔已絕。無風香自遠。

淒涼吳宮闕。紅粉埋故苑。至今微月夜。笙簫來翠巘。餘妍入此花。千載尙清婉。

怪君呼不歸。定爲花所挽。昨宵雷雨惡。花盡君應返。

【一】

君言西山頂。自古流白泉。上爲千牛乳。下有萬石鉛。不愧惠山味。但無陸子賢。

願君揚其名。庶託文字傳。寒泉比吉士。清濁在其源。不食我心惻。於泉非所患。

嗟我本何用。虛名空自纏。不見子柳子。餘愚污谿山。

陳季常自岐亭見訪。郡中及舊州諸豪爭欲邀致之。戲作陳孟公詩一首

孟公好飲寧論斗。醉後關門防客走。不妨閒過左阿君。百謫終爲賢太守。

老居閭里自浮沈。笑問伯松何苦心。忽然載酒從陋巷。爲愛揚雄作酒箴。

長安富兒求一過。千金壽君君笑唾。汝家安得客孟公。從來只識陳驚坐。

遊武昌寒溪西山寺

連山蟠武昌。翠木蔚樊口。我來已百日。欲濟空搔首。坐看鷗鳥沒。夢逐麝麝走。

今朝橫江來。一葦寄衰朽。高談破巨浪。飛屨輕重阜。去人曾幾何。絕壁寒溪吼。

風泉兩部樂。松竹三益友。徐行欣有得。芝朮在蓬莠。西上九曲亭。衆山皆培塿。

卻看江北路。雲水渺何有。離離見吳宮。莽莽眞楚藪。空傳孫郎石。無復陶公柳。

爾來風流人。唯有漫浪叟。買田吾已決。乳水況宜酒。所須修竹林。深處安井臼。

相將踏勝絕。更裹三日糗。

西山戲題武昌王居士并引

子往在武昌西山九曲亭上。有題一句云。元鴻橫號黃檨峴。九曲亭卽吳王峴山。一山皆檨葉。其旁卽元結陂湖也。荷花極盛。因爲對云。皓鶴下浴紅荷湖。座客皆笑同請賦。此詩。



江干高居堅關局。 鍵耕躬稼角挂經。 篙竿繫舸菰茨隔。 笳鼓過軍雞狗驚。  
解襟顧景各箕踞。 擊劍賡歌幾舉觥。 荆筭供膽愧攪聒。 乾鍋更戛甘瓜羹。

武昌銅劍歌 并引

供奉官鄭文嘗官於武昌江岸裂出古銅劍文得之以遺余冶鑄精巧非鍛冶所成者

雨餘江清風卷沙。 雷公躡雲捕黃蛇。 蛇行空中如枉矢。 電光煜煜燒蛇尾。  
或投以塊鏗有聲。 雷飛上天蛇入水。 水上青山如削鐵。 神物欲出山自裂。  
細看兩脅生碧花。 猶是西江老蛟血。 蘇子得之何所爲。 翻緘彈鋏咏新詩。  
君不見凌煙功臣長九尺。 腰閒玉具高挂頤。

定惠院暕師爲余竹下開嘯軒

啼鳩催天明。 喧喧相詆譭。 暗蛩泣夜永。 唧唧自相弔。 飲風蟬至潔。 長吟不改調。  
食土蚓無腸。 亦自終夕叫。 鳶貪聲最鄙。 鵲喜意可料。 皆緣不平鳴。 慟哭等嬉笑。  
阮生已蠹率。 孫子亦未妙。 道人開此軒。 清坐默自照。 衝風振河海。 不能號無竅。  
累盡吾何言。 風來竹自嘯。

石芝 并引

元豐三年五月十一日癸酉夜夢遊何人家開堂西門有小園古井井上皆蒼石石上生紫藤如龍蛇枝葉如赤箭主人言此石芝也余率爾折食一枝衆皆驚笑其味如雞蘇而

甘明日作此詩

空堂明月清且新。 幽人睡息來初勻。 了然非夢亦非覺。 有人夜呼祁孔賓。  
披衣相從到何許。 朱欄碧井開瓊戶。 忽驚石上堆龍蛇。 玉芝紫筍生無數。  
鏘然敲折青珊瑚。 味如蜜藕和雞蘇。 主人相顧一撫掌。 滿堂坐客皆盧胡。  
亦知洞府嘲輕脫。 終勝嵇康羨王烈。 神山一合五百年。 風吹石髓堅如鐵。  
今年正月十四日與子由別於陳州五月子由復至齊安以詩迎之  
驚塵急雪滿貂裘。 淚灑東風別苑邱。 又向邯鄲枕中見。 卻來雲夢澤南州。  
睽離動作三年計。 牽挽當爲十日留。 早晚青山映黃髮。 相看萬事一時休。

遷居臨阜亭

我生天地閒。 一蟻寄大磨。 區區欲右行。 不挾風輪左。 雖云走仁義。 未免違寒餓。  
劍米有危炊。 鍼氈無穩坐。 豈無佳山水。 借眼風雨過。 歸田不待老。 勇決凡幾箇。



幸茲廢棄餘。疲馬解鞍馱。全家占江驛。絕境天為破。飢貧相乘除。未見可弔賀。澹然無憂樂。苦語不成些。

曉至巴河口迎子由

去年御史府。舉動觸四壁。幽幽百尺井。仰天無一席。隔牆聞歌呼。自恨計之失。留詩不忍寫。苦淚漬紙筆。餘生復何幸。樂事有今日。江流鏡面淨。煙雨輕霧。孤舟如鳧鷖。點破千頃碧。聞君在磁湖。欲見隔咫尺。朝來好風色。旗脚西北擲。行當中流見。笑眼清光溢。此邦疑可老。修竹帶泉石。欲買柯氏林。茲謀待君必。

與子由同游寒溪西山

散人出入無町畦。朝游湖北暮淮西。高安酒官雖未上。兩脚垂欲穿塵泥。與君聚散若雲雨。共惜此日相提攜。千搖萬兀到樊口。一箭放溜先鳧鷖。層層草木暗西嶺。瀏瀏霜雪鳴寒溪。空山古寺亦何有。歸路萬頃青玻瓈。我今漂泊等鴻雁。江南江北無常棲。幅巾不擬過城市。欲踏徑路開新蹊。卻憂別後不忍到。見子行迹空餘悽。吾儕流落豈天意。自坐迂闊非人擠。行逢山水輒羞歎。此去未免勤鹽齏。何當一遇李八百。相哀白髮分刀圭。

次韻答子由

平生弱羽寄衝風。此去歸飛識所從。好語似珠穿一一。妄心如膜退重重。山僧有味寧知子。瀧吏無言只笑儂。尚有讀書清淨業。未容春睡敵千鍾。

武昌酌菩薩泉送王子立

送行無酒亦無錢。勸爾一杯菩薩泉。何處低頭不見我。四方同此水中天。

和何長官六言次韻五首

作邑君真伯厚。去官我豈晏容。一塵願託仁政。六字難磨變風。

【一】

五噫已出東洛。三復願比南容。學道未逢潘盎。草書猶似楊風。

【三】

石渠何須反顧。水驛幸足相容。長江大欲見底。探支八月涼風。

【四】

清風初號地籟。明月自寫天容。貧家何以娛客。但知抹月批風。

【五】

青山自是絕色。無人誰與爲容。說向市朝公子。何殊馬耳東風。



觀張師正所蓄辰砂

將軍結髮戰蠻溪。篋有殊珍勝象犀。漫說玉牀收箭鏃。何曾金鼎識刀圭。  
近聞猛士收丹穴。欲助君王鑄裏蹠。多少空巖人不見。自隨初日吐虹蜺。

五禽言五首并敘

梅聖俞嘗作四禽言。余謫黃州。寓居定惠院。遠舍皆茂林修竹。荒池蒲葦。春夏之交。鳴鳥百族。土人多以其聲之似者名之。遂用聖俞體作五禽言。

使君向蘄州。更唱蘄州鬼。我不識使君。寧知使君死。人生作鬼會不免。使君已老知何晚。

【二】

昨夜南山雨。西溪不可渡。溪邊布穀兒。勸我脫破袴。不辭脫袴溪水寒。水中照見催租瘢。

【三】

去年麥不熟。挾彈規我肉。今年麥上場。處處有殘粟。豐年無象何處尋。聽取林間快活吟。

【四】

力作力作。蠶絲一百箔。壠上麥頭昂。林間桑子落。願儂一箔千兩絲。繅絲得蠅飼爾雛。

【五】

姑惡姑惡。姑不惡。妾命薄。君不見東海孝婦死作三年乾。不如廣漢龐姑去卻還。

次韻子由病酒肺疾發

憶子少年時。肺病疲坐臥。噉呀或終日。勢若風雨過。虛陽作浮漲。客冷仍下墮。  
妻孥恐悵望。膾炙不登坐。終年禁晚食。半夜發清餓。胃強鬲苦滿。肺斂腹輒破。  
三彭恣啖嚼。二豎肯連播。寸田可治生。誰勸耕黃稷。探懷得真藥。不待君臣佐。  
初如雪花積。漸作櫻珠大。隔牆聞三嘍。隱隱如轉磨。自茲失故疾。陽唱陰輒和。  
神仙多歷試。中路或坎坷。平生不盡器。痛飲知無那。舊人眼看盡。老伴餘幾箇。  
殘年一斗粟。待子同春籩。云何不自珍。醉病又一挫。真源結梨棗。世味等糠莖。  
耕耘當待穫。願子勤自課。相將賦遠游。仙語不用些。

鐵拄杖并敘

柳真齡字安期。閩人也。家寶一鐵拄杖。如柳栗木。牙節宛轉天成。中空有簧。行輒微響。柳



云得之浙中相傳王審知以遺錢鏐以賜一僧柳偶得之以遺余作此詩謝之。

二七〇二

柳公手中黑蛇滑。千年老根生乳節。忽聞鏗然爪甲聲。四坐驚顧知是鐵。  
 含簧腹中細泉語。迸火石上飛星裂。公言此物老有神。自昔閩王餉吳越。  
 不知流落幾人手。坐看變滅如春雪。忽然贈我意安在。兩脚未許甘衰歇。  
 便尋轍迹訪崆峒。徑渡洞庭探禹穴。披榛覓藥採芝菌。刺虎鏃蛟攔蛇蝎。  
 會教化作兩錢錐。歸來見公未華髮。問我鐵君無恙否。取出摩挲向公說。  
 與潘三失解後飲酒  
 千金敝帚人誰買。半額蛾眉世所妍。顧我自爲都眊曠。憐君欲鬪小嬋娟。  
 青雲豈易量他日。黃菊猶應似去年。醉裏未知誰得喪。滿江風月不論錢。

蘇東坡詩集卷二十一

古今體詩

九十首

正月二十日往岐亭。郡人潘古郭三人送余於女王城東禪莊院。  
 十日春寒不出門。不知江柳已搖村。稍聞泱泱流冰谷。盡放青青沒燒痕。

數畝荒園畱我住。

半瓶濁酒待君溫。

去年今日關山路。

細雨梅花正斷魂。

東坡八首并敘

余在黃州二年。日以困匱。故人馬正卿哀余乏食。爲於郡中請故營地數十畝。使得躬耕。其中地既久荒。爲茨棘瓦礫之場。而歲又大旱。墾闢之勞。筋力殆盡。釋耒而嘆。乃作是詩。自愍其勤。庶幾來歲之入。以忘其勞焉。

廢壘無人顧。頽垣滿蓬蒿。誰能捐筋力。歲晚不償勞。獨有孤旅人。天窮無所逃。  
 端來拾瓦礫。歲旱土不膏。崎嶇草棘中。欲刮一寸毛。喟然釋耒嘆。我廩何時高。

荒田雖浪莽。高庫各有適。下隰種秔稌。東原蒔棗栗。江南有蜀士。桑果已許乞。  
 好竹不難栽。但恐鞭橫逸。仍須卜佳處。規以安我室。家童燒枯草。走報暗井出。  
 一飽未敢期。瓢飲已可必。

【三】

自昔有微泉。來從遠嶺背。穿城過聚落。流惡壯蓬艾。去爲柯氏陂。十畝魚蝦會。  
 歲旱泉亦竭。枯萍黏破塊。昨夜南山雲。雨到一犁外。泫然尋故瀆。知我理荒蒼。  
 泥芹有宿根。一寸嗟猶在。雪芽何時動。春鳩行可膾。



【四】

種稻清明前。樂事我能數。毛空暗春澤。鹹水聞好語。分秧及初夏。漸喜風葉舉。月明看露上。一一珠垂縷。秋來霜穗重。顛倒相撐拄。但聞畦隴閒。蚱蜢如風雨。新春便入甑。玉粒照筐筥。我久食官倉。紅腐等泥土。行當知此味。口腹吾已許。

【五】

良農惜地力。幸此十年荒。桑柘未及成。一麥庶可望。投種未逾月。覆塊已蒼蒼。農父告我言。勿使苗葉昌。若欲富餅餌。要須縱牛羊。再拜謝苦言。得飽不敢忘。

【六】

種棗期可剝。種松期可斲。事在十年外。吾計亦已愨。十年何足道。千載如風雹。舊聞李衡奴。此策疑可學。我有同舍郎。官居在瀾岳。遺我三寸甘。照座光卓犖。百栽倘可致。當及春冰渥。想見竹籬閒。青黃垂屋角。

【七】

潘子久不調。沽酒江南村。郭生本將種。賣藥西市垣。古生亦好事。恐是押牙孫。家有十畝竹。無時客叩門。我窮交舊絕。三子獨見存。從我於東坡。勞餉同一飧。

可憐杜拾遺。事與朱阮論。吾師卜子夏。四海皆弟昆。

【八】

馬生本窮士。從我二十年。日夜望我貴。求分買山錢。我今反累君。借耕輟茲田。刮毛龜背上。何時得成氈。可憐馬生癡。至今夸我賢。衆笑終不悔。施一當獲千。

次韻回文三首

春機滿織回文錦。紛淚揮殘露井桐。人遠寄情書字小。柳絲低日晚庭空。

【一】

紅牋短寫空深恨。錦句新翻欲斷腸。風葉落殘驚夢蝶。戍邊回雁寄情郎。

【二】

羞雲斂慘傷春暮。細縷詩成織意深。頭畔枕屏山掩恨。日昏塵暗玉窗琴。

附江南本織錦圖上回文原作三首

春晚落花餘碧草。夜涼低月半枯桐。人隨遠雁邊城暮。雨映疎簾繡閣空。

【一】

紅手素絲千字錦。故人新曲九迴腸。風吹絮雪愁縈骨。淚灑縑書恨見郎。

【二】



羞看一首回文錦。錦似文君別恨深。頭白自吟悲賦客。斷腸愁是斷絃琴。  
數日前夢一僧出二鏡求詩。僧以鏡置日中。其影甚異。其一如芭蕉。其一  
如蓮花。夢中作此詩。

君家有二鏡。光景如湛盧。或長如芭蕉。或圓如芙蕖。飛電著子壁。明月入我廬。  
月下合三璧。日月跳明珠。問子是非我。我是非文殊。

岐亭道上見梅花。戲贈季常。

蕙死蘭枯菊亦摧。返魂香入嶺頭梅。數枝殘綠風吹盡。一點芳心雀啣開。

野店初嘗竹葉酒。江雲欲落豆稽灰。行當更向釵頭見。病起烏雲正作堆。

樂泉先生生日。以鐵拄杖爲壽二首。

先生真是地行仙。住世因循五百年。每向銅人話疇昔。故教鐵杖闢清堅。

入懷冰雪生秋思。倚壁蛟龍護晝眠。遙想人天會方丈。衆中驚倒野狐禪。

【二】

二年相伴影隨身。踏徧江湖草木春。擿石舊痕猶在眼。閉門高節欲生鱗。

畏塗自衛真無敵。捷徑爭先卻累人。遠寄知公不嫌重。筆端猶自幹千鈞。

杭州故人信至齊安。

昨夜風月清。夢到西湖上。朝來聞好語。扣戶得吳餉。輕圓白曬荔。脆嫩紅螺醬。  
更將西菴茶。勸我洗江瘴。故人情義重。說我必西向。一年兩僕夫。千里問無恙。  
相期結書社。未怕供詩帳。還將夢魂去。一夜到江漲。

送牛尾狸與徐使君時大雪中

風捲飛花自入帷。一尊遙想破秋眉。泥深厭聽雞頭鶻。酒淺欣嘗牛尾狸。

通印子魚猶帶骨。披緜黃雀漫多脂。殷勤送去煩纖手。爲我磨刀削玉肌。

四時詞四首

春雲陰陰雪欲落。東風和冷驚簾幙。漸看遠水綠生漪。未放小桃紅入萼。  
佳人瘦盡雪膚肌。眉斂春愁知爲誰。深院無人剪刀響。應將白紵作春衣。

【二】

垂柳陰陰日初永。蔗漿酪粉金盤冷。簾額低垂紫燕忙。蜜脾已滿黃蜂靜。  
高樓睡起翠眉嚬。枕畔斜紅未肯勻。玉腕半揜雲碧袖。樓前知有斷腸人。

【三】

新愁舊恨眉生綠。粉汗餘香在斲竹。象牀素手熨寒衣。爍爍風燈動華屋。



夜香燒罷掩重扇。

香霧空濛月滿庭。

抱琴轉軸無人見。

門外空聞裂帛聲。

【四】

霜葉蕭蕭鳴屋角。

黃昏陡覺羅衾薄。

夜風搖動鎮帷犀。

酒醒夢回聞雪落。

起來呵手畫雙鴉。

醉臉輕勻襯眼霞。

真態生香誰畫得。

玉如纖手嗅梅花。

太守徐君猷通守孟亨之皆不飲酒以詩戲之

孟嘉嗜酒桓溫笑。

徐邈狂言孟德疑。

公獨未知其趣爾。

臣今時復一中之。

風流自有高人識。

通介寧隨薄俗移。

二子有靈應撫掌。

吾孫還有獨醒時。

姪安節遠來夜坐三首

南來不覺歲崢嶸。

夜撥寒灰聽雨聲。

遮眼文書原不讀。

伴人燈火亦多情。

嗟予潦倒無歸日。

令汝蹉跎已半生。

免使韓公悲世事。

白頭還對短燈檠。

【二】

心衰面改瘦崢嶸。

相見惟應識舊聲。

永夜思家在何處。

殘年知汝遠來情。

畏人默坐成癡鈍。

問舊驚呼半死生。

夢斷酒醒山雨絕。

笑看飢鼠上燈檠。

【三】

落第汝爲中酒味。

吟詩我作忍飢聲。

便思絕粒真無策。

苦說歸田似不情。

腰下牛閒方解佩。

洲中奴長足爲生。

大弔一弛何緣設。

已覺翻翻不受檠。

冬至日贈安節

我生幾冬至。少小如昨日。當時事父兄。

上壽拜脫膝。十年閱彫謝。白髮催衰疾。

瞻前惟兄三。顧後子由一。近者隔濤江。

遠者天一壁。今朝復何幸。見此萬里姪。

憶汝總角時。啼哭爲梨栗。今來能慷慨。

志氣堅鐵石。諸孫行復爾。世事何時畢。

詩成卻超然。老淚不成滴。

雪後到乾明寺遂宿

門外山光馬亦驚。階前屐齒我先行。

風花誤入長春苑。雲月長臨不夜城。

未許牛羊傷至潔。且看鴉鵲弄新晴。

更須攜被畱僧榻。待聽摧簷瀉竹聲。

伯父送先人下第歸蜀詩云。人稀野店休安枕。路入靈關穩跨驢。安節將去。

爲誦此句。因以爲韻。作小詩十四首送之。

索漠齊安郡。從來著放臣。如何風雪裏。更送獨歸人。

【二】

瘦骨寒將斷。衰髯摘更稀。未甘爲死別。猶恐得生歸。

【三】



日上氣噉江。雪晴光眩野。記取到家時。鋤耒吾正把。

【四】

月明穿破裘。霜氣澀孤劍。歸來閉戶坐。默數來時店。

【五】

諸兄無可寄。一語會須酬。晚歲俱黃髮。相看萬事休。

【六】

故人如念我。爲說瘦癯癯。尙有身爲患。已無心可安。

【七】

吾兄喜酒人。今汝亦能飲。一杯歸誦此。萬事邯鄲枕。

【八】

東阡在何許。寒食江頭路。哀哉魏城君。宿草荒新墓。

【九】

臨分亦泫然。不爲窮途泣。東阡時一到。莫遣牛羊入。

【十】

我夢隨汝去。東阡松柏青。卻入西州門。永媿北山靈。

【十一】

乞墦何足羨。負米可忘艱。莫爲無車馬。含羞入劍關。

【十二】

我坐名過實。謹譁自招損。汝幸無人知。莫厭家山穩。

【十三】

竹筍與練裙。隨時畢婚嫁。無事若相思。征鞍還一跨。

【十四】

萬里卻來日。一卷仍獨居。應笑謀生拙。團團如磨驢。

次韻和王鞏六首

君談陽朔山。不作一錢直。巖藏兩頭蛇。瘴落千仞翼。雅宜驩兜放。頗訝虞舜陟。

暫來已可畏。覽鏡憂面黑。況子三年囚。苦霧變飲食。吉人終不死。仰荷天地德。

我來黃岡下。敲枕江流碧。江南武昌山。向我如咫尺。春蔬黃土軟。凍筍蒼崖坼。

茲行我累君。乃反得安宅。遙知丹穴近。爲斷勾漏石。他年分刀圭。名字挂仙籍。

【二】



少年帶刀劍。但識從軍樂。老大服犁鋤。解佩付鎔鑠。雖無獻捷功。會賜力田爵。敲冰春搗紙。刈葦秋織箔。櫟林斬冬炭。竹塢收夏籜。四時俯有取。一飽天所酢。君生執綺閒。欲學非其脚。左右玉織織。束薪誰爲縛。勿令聞此語。翠黛願將惡。笑我一閒茅。婦姑紛六鑿。

【三】

欲結千年實。先摧二月花。故教窮到骨。要使壽無涯。久已逃天網。何須服日華。賓州在何處。爲子上栖霞。

【四】

鄰里有異趣。何妨傾蓋新。殊方君莫厭。數面自成親。默坐無餘事。回光照此身。他年赤墀下。玉立看垂紳。

【五】

平生我亦輕餘子。晚歲人誰念此翁。巧語屢曾遭惹惹。瘦詞聊復託芻蕘。子還可責同元亮。妻卻差賢勝敬通。僕文章雖不逮馮衍。而慷慨大節。乃不愧此翁。衍逢世祖英睿好士。而獨不遇。流離擯逐。與僕相似。而街妻妒悍甚。僕少此一事。故有勝敬通之句。若問我貧天所賦。不因遷謫始囊空。

【六】

君家玉臂貫銅青。下客何時見自成。勤把鉛黃記空樣。莫教弦管作蠻聲。熏衣漸嘆衙香少。擁髻遙憐夜語清。記取北歸攜過我。南江風浪雪山傾。

元豐四年十月二十二日。謁王文父齊萬于江南。坐上得陳季常書。報是月四日。种諤領兵深入破殺西夏六萬餘人。獲馬五千匹。衆喜忭唱樂。各飲一巨觥。

聞說官軍取乞聞。將軍旗鼓捷如神。故知無定河邊柳。得共中原雪絮春。

聞洮西捷報

漢家將軍一丈佛。詔賜天池八尺龍。露布朝馳玉關塞。捷書夜到甘泉宮。似聞指揮築上郡。已覺談笑無西戎。放臣不見天顏喜。但驚草木回春容。

記夢回文二首并敘

十二月二十五日。大雪始晴。夢人以雪水烹小團茶。使美人歌以飲。余夢中爲作回文詩。覺而記其一句云。亂點餘花睡碧衫。意用飛燕故事也。乃續之爲二絕句云。醜顏玉盃捧織織。亂點餘花睡碧衫。歌咽水雲凝靜院。夢驚松雪落空巖。

【一】

空花落盡酒傾缸。日上山融雪漲江。紅焙淺甌新火活。龍團小碾鬪晴窗。



三朵花 并敘

房州通判許安世以書遺予言吾州有異人常戴三朵花莫知其姓名郡人因以三朵花名之能作詩皆神仙意又能自寫真人有得之者許欲以一本見惠乃為作此詩

學道無成鬢已華 不勞千劫漫烝砂 歸來且看一宿覺 未暇遠尋三朵花  
兩手欲遮瓶裏雀 四條深怕井中蛇 畫圖要識先生面 試問房陵好事家

次韻陳四雪中賞梅

臘酒詩催熟 寒梅雪鬪新 杜陵休嘆老 韋曲已先春 獨秀驚凡目 遺英臥逸民  
高歌對三白 遲暮慰安仁

正月二十日與潘郭二生出郊尋春忽記去年是日同至女王城作詩乃

和前韻

東風未肯入東門 走馬還尋去歲村 人似秋鴻來有信 事如春夢了無痕  
江城白酒三杯釀 野老蒼顏一笑溫 已約年年為此會 故人不用賦招魂

是日偶至野人汪氏之居有神降于其室自稱天人李全字德通善篆字

用筆奇妙而字不可識云天篆也與予言有所會者復作一篇仍用前韻

酒渴思茶漫扣門 那知竹裏是仙村 已聞龜策通神語 更看龍蛇落筆痕

色瘁形枯應笑屈 道存目擊豈非溫 歸來獨掃空齋臥 猶恐微言入夢魂

凌井

古井沒荒萊 不食誰為惻 瓶罌下兩綆 蛙蚓飛百尺 腥風被泥滓 空響聞點滴  
上除青青芹 下洗鑿鑿石 沾濡愧童僕 杯酒暖寒栗 白水漸泓渟 青天落寒碧  
云何失舊穢 底處來新潔 井在有無中 無來亦無失

紅梅三首

怕愁貪睡獨開遲 自恐冰容不入時 故作小紅桃杏色 尙餘孤瘦雪霜姿  
寒心未肯隨春態 酒暈無端上玉肌 詩老不知梅格在 更看綠葉與青枝

【二】

雪裏開花卻是遲 何如獨占上春時 也知造物含深意 故與施朱發妙姿  
細雨裊殘千顆淚 輕寒瘦損一分肌 不應便作天桃杏 數點微酸已著枝

【三】

幽人自恨探春遲 不見檀心未吐時 丹鼎奪胎那是寶 玉人頰頰更多姿  
抱叢暗藥初含子 落盞穠香已透肌 乞與徐熙畫新樣 竹間璀璨出斜枝

次韻子由寄題孔平仲草菴



逢人欲覓安心法。到處先爲問道菴。盧子不須從若士。蓋公當自過曹參。羨君美玉經三火。笑我枯桑困八蠶。猶喜大江同一味。故應千里共清甘。

二 蟲

君不見水馬兒。步步逆流水。大江東流日千里。此蟲趨趨長在此。君不見鷓鴣堆。決起隨衝風。隨風一去宿何許。逆風還落蓬蒿中。二蟲愚智俱莫測。江邊一笑無人識。

陳季常見過三首

仕宦常畏人。退居還喜客。君來輒館我。未覺雞黍窄。東坡有奇事。已種十畝麥。但得君眼青。不辭奴飯白。

【一】

送君四十里。只使一帆風。江邊千樹柳。落我酒杯中。此行非遠別。此樂固無窮。但願長如此。來往一生同。

【三】

聞君開龜軒。東檻俯喬木。人言君畏事。欲作龜頭縮。我知君不然。朝飯仰陽谷。餘光幸分我。不死安可獨。

謝人惠雲巾方寫二首

燕尾稱呼理未便。剪裁雲葉卻天然。無心只是青山物。覆頂宜歸紫府仙。轉覺周家新樣俗。未容陶令舊名傳。鹿門佳士勤相贈。黑霧元霜合比肩。

【二】

胡韉短勒格靈疎。古雅無如此樣殊。妙手不勞盤作鳳。輕身只欲化爲鳧。魏風褊儉堪羞葛。楚客豪華可笑珠。擬學梁家名解脫。便於禪坐作跏趺。

寒食雨二首

自我來黃州。已過三寒食。年年欲惜春。春去不容惜。今年又苦雨。兩月秋蕭瑟。臥聞海棠花。泥汙燕脂雪。暗中偷負去。夜半真有力。何殊病少年。病起頭已白。

【二】

春江欲入戶。雨勢來不已。小屋如漁舟。濛濛水雲裏。空庖煮寒菜。破竈燒溼葦。那知是寒食。但感烏銜紙。君門深九重。墳墓在萬里。也擬哭途窮。死灰吹不起。

徐使君分新火

臨臯亭中一危坐。三見清明改新火。溝中枯木應笑人。鑽斫不然誰似我。黃州使君憐久病。分我五更紅一朵。從來破釜躍江魚。只有清詩嘲飯顆。



起攜蠟炬透空室。

欲事烹煎無一可。

為公分作無盡燈。

照破十方昏暗鎖。

次韻答元素并引

余舊有贈元素詞云。天涯同是傷流落。元素以為今日之先兆。且悲當時六客之存亡。客蓋張子野。劉孝叔。陳令舉。李公擇。及元素與余也。

不愁春盡絮隨風。但喜丹砂入頰紅。流落天涯先有識。摩挲金狄會當同。蓬蓬未必都非夢。了了方知不落空。莫把存亡悲六客。已將地獄等天宮。

蜜酒歌并敘

西蜀道士楊世昌善作蜜酒。絕醇醞。余既得其方。作此歌以遺之。

眞珠爲漿玉爲醴。六月田夫汗流泚。不如春甕自生香。蜂爲耕耘花作米。一日小沸魚吐沫。二日眩轉清光活。三日開甕香滿城。快瀉銀瓶不須撥。百錢一斗濃無聲。甘露微濁醞醞清。君不見南園采花蜂似雨。天教釀酒醉先生。先生年來窮到骨。問人乞米何曾得。世閒萬事眞悠悠。蜜蜂大勝監河侯。

又一首答二猶子與王郎見和

脯青苔。炙青蒲。爛蒸鵝鴨乃瓠壺。煮豆作乳脂爲酥。高燒油燭斟蜜酒。貧家百物初何有。古來百巧出窮人。搜羅假合亂天眞。詩書與我爲麴蘗。

醞釀老夫成摺紳。質非文是終難久。脫冠還作扶犁叟。不如蜜酒無煖寒。冬不加甜夏不酸。老夫作詩殊少味。愛此三篇如酒美。封胡羯末已可憐。不知更有王郎子。

謝陳季常惠一摺巾

夫子曾中萬斛寬。此巾何事小團圓。半升僅漉淵明酒。二寸纔容子夏冠。好戴黃金雙得勝。休教白苧一生酸。臂弓腰箭何時去。直上陰山取可汗。

贈黃山人

面頰照人元自赤。眉毛覆眼見來烏。倦游不擬談元牝。示病何訪出白鬚。絕學已生眞定慧。說禪長笑老浮屠。東坡若肯三年住。親與先生看藥爐。

贈人

別後休論信息疎。仙凡自古亦殊途。蓬山路遠人難到。霜柏威高道轉孤。舊賞未應忘楚國。新詩聞已滿皇都。誰憐澤畔行吟者。目斷長安貌欲枯。

問大冶長老乞桃花茶栽東坡

周詩記茶苦。茗飲出近世。初緣厭梁肉。假此雪昏滯。嗟我五畝園。桑麥苦蒙翳。不令寸地閒。更乞茶子甄。飢寒未知免。已作太飽計。庶將通有無。農末不相戾。



春來凍地裂。紫筍森已銳。牛羊煩呵叱。筐筥未敢睨。江南老道人。齒髮日夜逝。他年雪堂品。空記桃花裔。

寄子由

厭暑多應一向慵。銀鈎秀句益疎通。城頭高柳漫搖風。也知堆案文書滿。未暇開軒硯墨中。誰把前言語化工。

次韻孔毅父久旱已而甚雨三首

飢人忽夢飯甌溢。夢中一飽百憂失。爾來硯枯磨不出。只知夢飽本來空。未悟真飢定何物。旁舍壺漿不容乞。今年早勢復如此。歲晚何以黔吾突。陰陽有時雨有數。形容雖是喪家狗。民是天民天自卹。未肯聃耳爭投骨。我雖窮苦不如人。獨與蛟雷共圭華。君視我門誰肯屈。且爲疲人洗蒸鬱。可憐明月如潑水。夜半清光翻我室。未暇飢寒念明日。風從南來非雨候。

【二】

去年東坡拾瓦礫。

自種黃桑三百尺。

今年刈草蓋雪堂。

日炙風吹面如墨。

平生懶惰今始悔。老大勸農天所直。沛然例賜三尺雨。造物無心悅難測。四方上下同一雲。甘靈不爲龍所隔。蓬蒿下濕迎曉未。燈火新涼催夜織。老夫作罷得甘寢。臥聽牆東人響屐。奔流未已坑谷平。折葦枯荷恣漂溺。腐儒蠹糲支百年。力耕不受衆目憐。破陂漏水不耐旱。人力未至求天全。會當作塘徑千步。橫斷西北遮山泉。四鄰相率助舉杵。人人知我囊無錢。明年共看決渠雨。飢飽在我寧關天。誰能伴我田閒飲。醉倒惟有支頭甌。

【三】

天公號令不再出。十日愁霖併爲一。君家有田水冒田。我家無田憂入室。不如西州楊道士。萬里隨身惟兩膝。沿流不惡泝亦佳。一葉扁舟任飄突。山芎麥麩都不用。泥行露宿終無疾。夜來飢腸如轉雷。旅愁非酒不可開。楊生自言識音律。洞簫入手清且哀。不須更待秋井場。見人白骨方銜杯。

魚蠻子

江淮水爲田。舟楫爲室居。魚蝦以爲糧。不耕自有餘。異哉魚蠻子。本非左衽徒。連排入江住。竹瓦三尺廬。於焉長子孫。戚施且侏儒。擘水取魴鯉。易如拾諸塗。破釜不著鹽。雪鱗芼青蔬。一飽便甘寢。何異獮與狙。人間行路難。踏地出賦租。



不如魚蠻子。駕浪浮空虛。空虛未可知。會當算舟車。蠻子叩頭泣。勿語桑大夫。

夜坐與邁聯句

清風來無邊。明月翳復吐。自松聲滿虛空。竹影侵半戶。自暗枝有驚鵲。壞壁鳴飢鼠。

露葉耿高梧。風螢落空廡。自微涼感團扇。古意歌白紵。自樂哉今夕游。獲此陪杖屨。

傳家詩律細。已自過宗武。短詩膝上成。聊以感懷祖。

弔李臺卿并敘

李臺卿字明仲。廬州人。貌陋甚。性介不羣。而博學強記。罕見其比。好左氏。有史學考正。同異多所發明。知天文律歷。千歲之日。可坐敷也。軾謫居黃州。臺卿為麻城主簿。始識之。既罷居於廬。而曹光州演甫。以書報其亡。臺卿光州之妻黨也。

我初未識君。人以君為笑。垂頭老鶴雀。煙雨羸七竅。敝衣來過我。危坐若持釣。楮哀半面新。酸蔑一語妙。徐徐涉其瀾。極望不可徼。卻觀元嫵媚。士固難輕料。看書眼如月。罅隙靡不照。我老多遺忘。得君如再少。從橫通雜藝。甚博且知要。所恨言無文。至老幽不耀。其生世莫識。已死誰復弔。作詩遺故人。庶解俗子譙。

曹既見和復次韻

造物本兒嬉。風噫雷電笑。誰令妄驚怪。失匕號萬竅。人人走江湖。一一操網釣。

偶然連六鰲。便謂此手妙。空令任公子。三歲蹲海徼。長貧固不辭。一死實未料。難將著草算。除用佛眼照。何人嗣家學。恨子兒尚少。嗟我與曹君。衰老世不要。

空言今無救。奇志後必耀。吟君五字詩。義重千金弔。收藏慎勿出。免使羣兒譙。

弔徐德占并引

余初不識德占。但聞其初為呂惠卿所薦。以處士用。元豐五年三月。偶以事至蘄水。德占聞余在傳舍。惠然見訪。與之語。有過人者。是歲十月。聞其遇禍。作詩弔之。

美人種松柏。欲使低映門。栽培雖易長。流惡病其根。哀哉歲寒姿。飢餓誰與論。竟為明所誤。不免刀斧痕。一遭兒女污。始覺山林尊。從來覓棟梁。未省傍籬藩。南山隔秦嶺。千樹龍蛇奔。大厦若畏傾。萬牛何足言。不然老巖壑。含抱枝生孫。死者不可悔。吾將遺後昆。

武昌主簿吳亮君采。攜其友人沈君十二琴之說。與高齋先生。空同子之文。太平之頌。以示予。予不識沈君。而讀其書。如見其人。如聞十二琴之聲。予昔從高齋先生游。嘗見其實。一琴無銘。無識。不知其何代物也。請以告二子。使從先生求觀之。此十二琴者。待其琴而後和。元豐五年閏六月。若言琴上有琴聲。放在匣中何不鳴。若言聲在指頭上。何不於君指上聽。



李委吹笛并引

元豐五年十二月十九日。東坡生日。置酒赤壁磯下。踞高峰。俯鵲巢。酒酣。笛聲起於江上。客有郭古二生。頗知音。謂坡曰。笛聲有新意。非俗工也。使人問之。則進士李委。聞坡生日。作新曲。曰鶴南飛。以獻。呼之使前。則青巾紫裘。腰笛而已。既奏新曲。又快作數弄。嘹然有穿雲裂石之聲。坐客皆引滿醉倒。委袖出嘉紙一幅。曰。吾無求於公。得一絕句足矣。坡笑而從之。

山頭孤鶴向南飛。

載我南游到九疑。

下界何人也吹笛。

可憐時復犯龜茲。

蜀僧明操思歸書龍邱子壁

久厭勞生能幾日。

莫將歸思擾衰年。

片雲會得無心否。

南北東西只一天。

### 蘇東坡詩集卷二十一

#### 古今體詩四十首

次韻孔毅父集古人句見贈五首

羨君戲集他人詩。

指呼市人如使兒。

天邊鴻鵠不易得。

便令作對隨家雞。

退之驚笑子美泣。

問君久假何時歸。

世閒好句世人共。

明月自滿千家墀。

#### 【二】

紫駝之峰人莫識。

雜以雞豚真可惜。

今君坐致五侯鯖。

盡是猩脣與熊白。

路旁拾得半段槍。

何必開爐鑄矛戟。

用之如何在我耳。

入手當令君喪魄。

#### 【三】

天下幾人學杜甫。

誰得其皮與其骨。

劃如太華當我前。

跛牂欲上驚巒岬。

名章俊語紛交衡。

無人巧會當時情。

前生子美只君是。

信手拈得俱天成。

#### 【四】

詩人雕刻閒草木。

搜抉肝腎神應哭。

不如默誦千萬首。

左抽右取談笑足。

夜吟石鼎聲悲秋。

可憐好事劉與侯。

何當一醉百不問。

我欲眠矣君歸休。

#### 【五】

膏明蘭臭俱自焚。

象牙翠羽戕其身。

多言自古為數窮。

微中有時堪解紛。

癡人但數羊羔兒。

不知何者是左慈。

千章萬句卒非我。

急走捉君應已遲。

六年正月二十日。復出東門。仍用前韻。

亂山環合水侵門。

身在淮南盡處村。

五畝漸成終老計。

九重新墜舊巢痕。



豈惟見慣沙鷗熟。

已覺來多釣石溫。

長與東風約今日。

暗香先返玉梅魂。

食甘

一雙羅帕未分珍。

林下先嘗愧逐臣。

露葉霜枝翦寒碧。

金槃玉指破芳辛。

清泉漱漱先流齒。

香霧霏霏欲喫人。

坐客殷勤爲收子。

千奴一掬奈吾貧。

大寒步至東坡贈巢三

春雨如暗塵。

春風吹倒人。

東坡數閉屋。

巢子誰與鄰。

空牀斂敗絮。

破竈鬱生薪。

相對不言寒。

哀哉知我貧。

我有一瓢酒。

獨飲良不仁。

未能賴我頰。

聊復濡子脣。

故人千鍾祿。

馭吏醉吐茵。

那知我與子。

坐作寒蠶呻。

努力莫怨天。

我爾皆天民。

行看花柳動。

共享無邊春。

元修菜并敘

菜之美者有吾鄉之巢。故人巢元修嗜之。余亦嗜之。元修云。使孔北海見。當復云。吾家菜耶。因謂之元修菜。余去鄉十有五年。思而不可得。元修適自蜀來。見余於黃。乃作是詩。使歸致其子。而種之東坡之下云。

彼美君家菜。

鋪田綠茸茸。

豆莢圓且小。

槐芽細而豐。

種之秋雨餘。

擢秀繁霜中。

欲花而未蓊。

一一如青蟲。

是時青裙女。

探擷何怱怱。

烝之復湘之。

香色蔚其饌。

點酒下鹽豉。

縷橙芼薑蔥。

那知雞與豚。

但恐放箸空。

春盡苗葉老。

耕翻煙雨叢。

潤隨甘澤化。

暖作青泥融。

始終不我負。

力與糞壤同。

我老忘家舍。

楚音變兒童。

此物獨嫵媚。

終年繫余胸。

君歸致其子。

囊盛勿函封。

張騫移苜蓿。

適用如葵菘。

馬援載薏苡。

羅生等蒿蓬。

懸知東坡下。

培鹵化千鍾。

長使齊安民。

指此說兩翁。

三月三日點燈會客

江上東風浪接天。

苦寒無賴破春妍。

試開雲夢羔兒酒。

快瀉錢塘藥玉船。

蠶市光陰非故國。

馬行燈水記當年。

冷煙濕雪梅花在。

畱得新春作上元。

日出東門

日日出東門。

步尋東城游。

城門抱關卒。

笑我此何求。

我亦無所求。

駕言寫我憂。

意適忽忘返。

路窮乃歸休。

懸知百歲後。

父老說故侯。

古來賢達人。

此路誰不由。

百年寓華屋。

千載歸山邱。

何事羊公子。

不肯過西州。

南堂五首

江上西山半隱堤。

此邦臺館一時西。

南堂獨有西南向。

臥看千帆落淺溪。

【一】

暮年眼力嗟猶在。

多病顛毛卻未華。

故作明窗書小字。

更開幽室養丹砂。



【三】

他時夜雨困移床。坐厭愁聲點客腸。一聽南堂新瓦響。似聞東塢小荷香。

【四】

山家爲割千房蜜。稚子新畦五畝蔬。更有南堂堪著客。不憂門外故人車。

【五】

掃地焚香閉閣眠。簾紋如水帳如煙。客來夢覺知何處。挂起西窗浪接天。

次韻子由種杉竹

吏散庭空雀噪簷。閉門獨宿夜厭厭。似聞梨棗同時種。應與杉篁刻日添。糟麴有神熏不醉。雪霜誇健巧相沾。先生坐待清陰滿。空使人人嘆滯淹。

孔毅父妻挽詞

結襁記初歡。同穴期晚歲。擇夫得溫嶠。生子勝王濟。高風相賓友。古義仍兄弟。從君吏隱中。窮達初不計。云何抱沈疾。俯仰便一世。幽陰凄房櫺。芳澤在巾袂。百年縱得滿。此路行亦逝。那將有限身。長瀉無益涕。君文照今古。不比山石脆。當觀千字誄。寧用百金瘞。

初秋寄子由

百川日夜逝。物我相隨去。惟有宿昔心。依然守故處。憶在懷遠驛。閉門秋暑中。藜羹對書史。揮汗與子同。西風忽淒厲。落葉穿戶牖。子起尋袂衣。感歎執我手。朱顏不可恃。此語君莫疑。別離恐不免。功名定難期。當時已悽斷。況此兩衰老。失途既難追。學道恨不早。買田秋已議。築室春當成。雪堂風雨夜。已作對牀聲。

和黃魯直食筍次韻

飽食有殘肉。飢食無餘菜。紛然生喜怒。似被狙公賣。爾來誰獨覺。凜凜白下宰。一飯在家僧。至樂甘不壞。多生味蠹簡。食筍乃餘債。蕭然映樽俎。未肯雜菘芥。君看霜雪姿。童稚已耿介。胡爲遭暴橫。三嗅不忍噉。朝來忽解籜。勢迫風雷噫。尙可餉三閭。飯筒纏五采。

聞子由爲郡僚所摶恐當去官

少學不爲身。宿志固有在。雖然敢自必。用舍置度外。天初若相我。發跡造宏大。豈敢負所付。捐軀欲投會。寧知事大繆。舉步得狼狽。我已無可言。墮甑難追悔。子雖僅自免。雞肋安足賴。低回畏罪罟。黽勉敢言退。若人疑或使。爲子得微罪。時哉歸去來。共抱東坡耒。

次韻王鞏南遷初歸二首



問君謫南賓。野葛食幾尺。逢人瘴髮黃。入市胡眼碧。三年不易過。坐睨倚天壁。歸來貌如故。妙語仍破鑄。那能廢詩酒。亦未妨禪寂。願爲尙書郎。還賜上方鳥。

【一】

江家舊池臺。修竹圍一尺。歸來萬事非。惟見秦淮碧。平生痛飲處。遺墨鴉棲壁。西來故父客。金印雜鳴鏑。三槐老更茂。花絮春寂寂。中微未可料。家廟藏赤舄。孔毅父以詩戒飲酒。問買田且乞墨竹。次其韻。

酒中真復有何好。孟生雖賢未聞道。醉時萬慮一掃空。醒後紛紛如宿草。十年揩洗見真妄。石女無兒焦穀槁。此身何異貯酒瓶。滿輒予人空自倒。武昌痛飲豈吾意。性不違人遭客惱。君家長松十畝陰。借我一菴聊洗心。我田方寸耕不盡。何用百頃糜千金。枕書睡熟呼不起。好學憐君工雜擬。且將墨竹換新詩。潤色何須待東里。

任師中挽詞

大任剛烈世無有。疾惡如風朱伯厚。小任溫毅老更文。聰明慈愛小馮君。兩任才行不須說。疇昔竝友吾先人。相看半作晨星沒。可憐太白配殘月。大任先去冢未乾。小任相繼呼不還。強寄一樽生死別。樽中有淚酒應酸。

貴賤賢愚同盡耳。

君今不盡緣賢子。

人閒得喪了無憑。

只有天公終可倚。

子由作二頌頌石臺長老問公手寫蓮經字如黑蟻且誦萬遍脇不至席二十餘年予亦作二首

眼前擾擾黑虬虬。

口角霏霏白唾珠。

要識吾師無礙處。

試將燒卻看瞋無。

【二】

眼睛心地兩虛圓。

脇不沾牀二十年。

誰信吾師非不睡。

睡蛇已死得安眠。

鄧忠臣母周氏挽詞

微生真草木。無處謝天力。慈顏如春風。不見桃李實。古今抱此恨。有志俯仰失。公子豈先知。戰戰常惜日。吾君日月照。委曲到肝鬲。哀哉人子心。吾何愛一邑。家庭拜前後。粲然發笑色。豈比黃壤下。焚瘞千金璧。若人道德人。視此亦戲劇。聊償曾閔意。遽與仙佛寂。孤纍臥江渚。永望墳墓隔。作詩相楚挽。感動淚再滴。

徐君猷挽詞

一舸南游遂不歸。清江赤壁照人悲。請看行路無從涕。盡是當年不忍欺。雪後獨來栽柳處。竹閒行復采茶時。山城散盡尊前客。舊恨新愁只自知。

洗兒戲作



人皆養子望聰明。我被聰明誤一生。

惟願孩兒愚且魯。

無災無難到公卿。

和蔡景繁海州石室

芙蓉仙人舊游處。蒼藤翠壁初無路。  
 坐令空山作錦繡。倚天照海花無數。  
 何年霹靂起神物。玉棺飛出王喬墓。  
 仙人一去五十年。花老室空誰作主。  
 我來取酒醉先生。後車仍載胡琴女。  
 爾來心賞復何人。持節中郎醉無伍。  
 徑尋我語覓餘聲。拄杖彭鏗叩銅鼓。  
 江風海雨入牙頰。似聽石室胡琴語。  
 門外桃花自開落。牀頭酒甕生塵土。  
 夢中舊事時一笑。坐覺俯仰成今古。

戲將桃核裹黃泥。花閒石室可容車。  
 當時醉臥動千日。手植數松今偃蓋。  
 一聲冰鐵散巖谷。獨臨斷岸呼日出。  
 長篇小字遠相寄。我今老病不出門。  
 前年開閣放柳枝。願君不用刻此詩。

石閒散擲如風雨。流蘇寶蓋窺靈宇。  
 至今石縫餘糟醋。蒼髯白甲低瓊戶。  
 海為瀾翻松為舞。紅波碧巘相吞吐。  
 一唱三歎神悽楚。海山巖洞知何許。  
 今年洗心歸佛祖。東海桑田真且暮。

橄欖

紛紛青子落紅鹽。正味森森苦且嚴。

待得微甘回齒頰。

已輸崖蜜十分甜。

東坡

雨洗東坡月色清。

市人行盡野人行。

莫嫌犖确坡頭路。

自愛鏗然曳杖聲。

生日王郎以詩見慶次其韻并寄茶二十一片

折楊新曲萬人趨。獨和先生于菟子。  
 竭從冰叟來游宦。肯伴臞仙亦號儒。  
 不嫌霧谷靈松柏。終恐虹梁荷棟楸。  
 感君生日遙稱壽。祝我餘年老不枯。

但信積藏終自售。棠棣竝為天下士。  
 高論無窮如鋸屑。未辦報君青玉案。

豈知盤脫本無樨。芙蓉曾到海邊郭。  
 小詩有味似連珠。建溪新餅截雲腴。

柏石圖詩 并敘

陳公弼家藏柏石圖。其子慥季常傳寶之。東坡居士作詩以爲之銘。

柏生兩石閒。天命本如此。雖云生之艱。與石相終始。  
 土膏雜糞壤。成壞幾何耳。君看此槎牙。豈有可移理。  
 畫師亦可人。使我毛髮起。當年落筆意。正欲譏韓子。

和秦太虛梅花

西湖處士骨應槁。多情立馬待黃昏。  
 孤山山下醉眠處。

只有此詩君壓倒。殘雪消遲月出早。  
 點綴裙腰紛不掃。

東坡先生心已灰。江頭千樹春欲闌。  
 萬里春隨逐客來。

爲愛君詩被花惱。竹外一枝斜更好。  
 十年花送佳人老。



去年花開我已病。今年對花還草草。不知風雨捲春歸。收拾餘香還畀昊。

再和潛師

化工未議蘇羣槁。先向寒梅一傾倒。江南無雪春瘴生。為散冰花除熱惱。  
風清月落無人見。洗妝自趁霜鐘早。惟有飛來雙白鷺。玉羽瓊枝鬪清好。  
吳山道人心似水。眼淨塵空無可掃。故將妙語寄多情。橫機欲試東坡老。  
東坡習氣除未盡。時復長篇書小草。且撼長條餐落英。忍飢未擬窮呼昊。

海棠

東風渺渺泛崇光。香霧空濛月轉廊。只恐夜深花睡去。故燒高燭照紅妝。

次韻曹九章見贈

遽瑗知非我所師。流年已似手中蓍。正平獨肯從文學。中散何曾靳孝尼。  
賣劍買牛真欲老。得錢沽酒更無疑。雞豚異日為同社。應有千篇唱和詩。

上巳日與二三子攜酒出遊隨所見輒作數句明日集之為詩故辭無倫次

薄雲霏霏不成雨。杖藜曉入千花塢。柯邱海棠吾有詩。獨笑深林誰敢侮。  
三杯卯酒人徑醉。一枕春眠日亭午。竹閒老人不讀書。畱我閉門誰教汝。  
出簷藜枳十圍大。寫真素壁千蛟舞。東坡作塘今幾尺。攜酒一勞農工苦。

卻尋流水出東門。壞垣古塹花無主。臥開桃李為誰妍。對立鷓鴣相媚嫵。

開尊藉草勸行路。不惜春衫污泥土。褰裳共過春草亭。扣門卻入韓家圃。

轆轤繩斷井深碧。秋千挂索人何所。映簾空復小桃枝。乞漿不見甕門女。

南上古臺臨斷岸。雪陣翻空迷仰俯。故人餽我玉葉羹。火冷煙消誰為煮。

崎嶇束縵下荒徑。姪姪隔花聞好語。更隨落影盡餘尊。卻傍孤城得僧宇。

主人勸我洗足眠。倒牀不必聞鐘鼓。明朝門外泥一尺。始悟三更雨如許。

平生所向無一遂。茲游何事天不阻。固知我友不終窮。豈弟君子神所予。

劉監倉家煎米粉作餅子。余云為甚酥。潘邠老家造逡巡酒。余飲之云莫作。

醋錯著水來否。後數日攜家飲郊外。因作小詩戲劉公求之。

野飲花開百物無。杖頭惟挂一葫蘆。已傾潘子錯著水。更覓君家為甚酥。

和參寥

芥舟只合在坳堂。紙帳心期老孟光。不道山人今忽去。曉猿啼處月茫茫。



蘇東坡詩集卷二十三

古今體詩四十首

別黃州

病瘡老馬不任轡。猶向君王得敝幃。桑下豈無三宿戀。尊前聊與一身歸。  
長腰尙載撐腸米。關領先裁蓋瘵衣。投老江湖終不失。來時莫遣故人非。

過江夜行武昌山聞黃州鼓角

清風弄水月銜山。幽人夜度吳王峴。黃州鼓角亦多情。送我南來不辭遠。

江南又聞出塞曲。半雜江聲作悲健。誰言萬方聲一槩。

我記江邊枯柳樹。未死相逢真識面。他年一葉泝江來。還吹此曲相迎餞。

岐亭五首并敘

元豐三年正月。余始謫黃州。至岐亭北二十五里。山上有白馬青蓋來迎者。則余故人陳慥季常也。爲留五日。賦詩一篇而去。明年正月。復往見之。季常使人勞余於中途。余久不殺。恐季常之爲余殺也。則以前韻作詩爲殺戒。以遺季常。自爾不復殺。而岐亭之人多化

之。有不食肉者。其後數往見之。往必作詩。詩必以前韻。凡余在黃四年。三往見季常。季常七來見余。蓋相從百餘日也。七年四月。余量移汝州。自江淮徂洛。送者皆止慈湖。而季常獨至九江。乃復用前韻。通爲五首以贈之。

昨日雲陰重。東風融雪汁。遠林草木暗。近舍煙火溼。下有隱君子。嘯歌方自得。  
知我犯寒來。呼酒意頗急。撫掌動鄰里。遠村捉鷺鴨。房櫓鏘器聲。蔬果照巾罽。  
久聞萋蒿美。初見新芽赤。洗盞酌鷺黃。磨刀削熊白。須臾我徑醉。坐睡落巾幘。  
醒時夜向闌。唧唧銅餅泣。黃州豈云遠。但恐朋友缺。我當守所主。君亦無此客。  
朝來靜菴中。惟見峰巒集。

【二】

我哀籃中蛤。閉口護殘汁。又哀網中魚。開口吐微濕。剗腸彼交病。過分我何得。  
相逢未寒溫。相勸此最急。不見盧懷慎。烝壺似蒸鴨。坐客皆忍笑。髡然發其鬣。  
不見王武子。每食刀几赤。琉璃載烝狔。中有人乳白。盧公信寒陋。衰髮得滿幘。  
武子雖豪華。未死神已泣。先生萬金璧。護此一蟻缺。一年如一夢。百歲真過客。  
君無廢此篇。嚴詩編杜集。

【三】



君家蜂作窠。歲歲添漆汁。我身牛穿鼻。卷舌聊自濕。二年三過君。此行真得得。愛君似劇孟。扣門知緩急。家有紅頰兒。能唱綠頭鴨。行當隔簾見。花霧輕霏霽。爲我取黃封。親拆官泥赤。仍須煩素手。自點葉家白。樂哉無一事。十年不蓄幘。閉門弄添丁。哇笑雜呱泣。西方正苦戰。誰補將帥缺。披圖見八陣。合散更主客。不須親戎行。坐論教君集。

【四】

酸酒如蠶湯。甜酒如蜜汁。三年黃州城。飲酒但飲濕。我如更揀擇。一醉豈易得。幾思壓茆柴。禁網日夜急。西鄰椎甕盎。醉倒猪與鴨。君家大如掌。破屋無遮罽。何從得此酒。冷面妬君赤。定應好事人。千石供李白。爲君三日醉。蓬髮不暇幘。夜深欲踰垣。臥想春甕泣。君奴亦笑我。鬢齒行禿缺。三年已四至。歲歲遭惡客。人生幾兩屐。莫厭頻來集。

【五】

枯松強鑽膏。稿竹欲瀝汁。兩窮相值遇。相哀莫相濕。不知我與君。交游竟何得。心法幸相語。頭然未爲急。願爲穿雲鶻。莫作將雛鴨。我行及初夏。煮酒映疏罽。故鄉在何許。西望千山赤。茲游定安歸。東泛萬頃白。一歡寧復再。起舞花墮幘。

將行出苦語。不用兒女泣。吾非固多矣。君豈無一缺。各念別時言。閉戶謝衆客。空堂淨掃地。虛白道所集。

初入廬山三首

青山若無素。偃蹇不相親。要識廬山面。他年是故人。

【一】

自昔懷清賞。神遊杳靄閒。如今不是夢。真個是廬山。

【二】

芒屨青竹杖。自挂百錢游。可怪深山裏。人人識故侯。

贈東林總長老

溪聲便是廣長舌。山色豈非清淨身。夜來八萬四千偈。他日如何舉似人。

題西林壁

橫看成嶺側成峯。遠近高低各不同。不識廬山真面目。只緣身在此山中。

圓通禪院先君舊游也。四月二十四日晚至宿焉。明日先君忌日也。乃手寫寶積獻蓋頌佛一偈。以贈長老僊公。僊公撫掌笑曰。昨夜夢寶蓋飛下。著處輒出火。豈此祥乎。乃作是詩。院有蜀僧宣遠。事訥長老。識先君云。



石耳峯頭路接天。

梵音堂上月臨泉。

此生初飲廬山水。

他日徒參雪竇禪。

袖裏寶書猶未出。

夢中飛蓋已先傳。

何人更識嵇中散。

野鶴昂藏未是僊。

子由在筠作東軒記。或戲之爲東軒長老。其婿曹煥往筠。余作一絕句送曹。以戲子由。曹過廬山。以示圓通。慎長老。慎欣然亦作一絕。送客出門。歸入室。跌坐化去。子由聞之。仍作二絕。一以答余。一以答慎。明年余過圓通。始得其詳。乃追次慎韻。

君到高安幾日回。

一時斗擻舊塵埃。

贈君一籠牢收取。

盛取東軒長老來。

【二】

大士何曾有生死。

小儒底處覓窮通。

偶留一映千山上。

散作人間萬竅風。

余過溫泉壁上有詩云。直待衆生總無垢。我方清冷混常流。問人云。長老可遵作。遵已退居圓通。亦作一絕。

石龍有口口無根。

自在流泉誰吐吞。

若信衆生本無垢。

此泉何處覓寒溫。

世傳徐凝瀑布詩云。一條界破青山色。至爲塵陋。又僞作樂天詩。稱羨此句。有賽不得之語。樂天雖涉淺易。然豈至是哉。乃戲作一絕。

帝遣銀河一派垂。

古來惟有謫仙詞。

飛流濺沫知多少。

不與徐凝洗惡詩。

書李公擇白石山房。

偶尋流水上崔嵬。

五老蒼顏一笑開。

若見謫仙煩寄語。

康山頭白早歸來。

廬山二勝并敘

余游廬山。南北得十五六奇勝。殆不可勝紀。而懶不作詩。獨擇其尤佳者作二首。

開先漱玉亭

高巖下赤日。深谷來悲風。擘開青玉峽。飛出兩白龍。亂沫散霜雪。古潭搖清空。餘流滑無聲。快瀉雙石硯。我來不忍去。月出飛橋東。蕩蕩白銀闕。沈沈水精宮。願隨琴高生。脚踏赤鯁公。手持白芙蓉。跳下清冷中。

棲賢三峽橋

吾聞太山石。積日穿綫瀑。況此百雷霆。萬世與石鬪。深行九地底。險出三峽右。長輕不盡溪。欲滿無底竇。跳波翻潛魚。震響落飛狹。清寒入山骨。草木盡堅瘦。空濛煙靄閒。瀕洞金石奏。彎彎飛橋出。激激半月殼。玉淵神龍近。雨雹亂晴晝。垂餅得清甘。可噉不可漱。

自興國往筠宿石田驛南廿五里野人舍

谿上青山三百疊。快馬輕衫來一抹。倚山修竹有人家。橫道清泉知我渴。芒屨竹杖自輕軟。蒲薦松牀亦香滑。夜深風露滿中庭。唯有孤螢自開闔。



過建昌李野夫公擇故居

彭蠡東北源。廬阜西南麓。何人修水上。種此一雙玉。思之不可見。破宅餘修竹。  
 四鄰戒莫犯。十畝森似束。我來仲夏初。解籜呈新綠。幽鳥向我鳴。野人畱我宿。  
 徘徊不忍去。微月挂喬木。遙想他年歸。解組巾一幅。對牀老兄弟。夜雨鳴竹屋。  
 臥聽鄰寺鐘。書窗有殘燭。

將至筠先寄遲适遠三猶子

露宿風餐六百里。明朝飲馬南江水。未見豐盈犀角兒。先逢玉雪王郎子。  
 對牀欲作連夜語。念汝還須載星起。夜來夢見小於菟。猶是髭髥垂兩耳。  
 憶過濟南春未動。三子出迎殘雪裏。我時移守古河東。酒肉淋漓渾舍喜。  
 而今憔悴一羸馬。逆旅擔夫相汝爾。出城見我定驚嗟。身健窮愁不須恥。  
 我爲乃翁畱十日。掣電一歡何足恃。惟當火急作新詩。一醉兩翁勝酒美。

端午游真如遲适遠從子由在酒局

一與子由別。卻數七端午。身隨綵絲繫。心與昌歎苦。今年匹馬來。佳節日夜數。  
 兒童喜我至。典衣具雞黍。水餅既懷鄉。飯筒仍感楚。謂言必一醉。快作西川語。  
 寧知是官身。糟麴困熏煮。獨攜三子出。古剎訪禪祖。高談付梁羅。詩律到阿虎。

歸來一調笑。慰此長齟齬。

別子由三首兼別遲

知君念我欲別難。我今此別非他日。風裏楊花雖未定。雨中荷葉終不濕。  
 三年磨我費百書。一見何止得雙璧。願君亦莫嗟畱滯。六十小劫風雨疾。

【二】

先君昔愛洛陽居。我今亦過嵩山麓。水南卜築吾豈敢。試向伊川買修竹。  
 又聞緱山好泉眼。傍市穿林瀉冰玉。遙想茅軒照水開。兩翁相對清如鵠。

【三】

兩翁歸隱非難事。惟要傳家好兒子。憶昔汝翁如汝長。筆頭一落三千字。  
 世人聞此皆大笑。慎勿生兒兩翁似。不知樗櫟薦明堂。何似鹽車壓千里。

初別子由至奉新作

雙鵲先我來。飛上東軒背。書隨好夢到。人與佳節會。一歡難把玩。回首了無在。  
 卻渡來時溪。斷橋號淺瀨。茫茫暑天濶。靄靄孤城背。青山眊矂中。落日淒涼外。  
 盛衰豈我意。離合非所礙。何以解我憂。粗了一事大。

白塔鋪歇馬



甘山廬阜鬱相望。林隙熹微漏日光。吳國晚蠶初斷葉。占城蚤稻欲移秧。迢迢澗水隨人急。冉冉巖花撲馬香。望眼儘從飛鳥遠。白雲深處是吾鄉。

同年程筠德林求先墳二詩

思成堂

宰樹連山谷。祠堂照路隅。養松無觸鹿。助祭有馴烏。歸夢先寒食。兒啼到白須。遙知鄰里化。醉叟道爭扶。

歸真亭

舊笑桓司馬。今師鄭大夫。不知徂歲月。空覺老楸梧。祭禮傳家法。阡名載版圖。會看千字誄。木杪見龜趺。

陶驥子駿佚老堂二首

文學與元禮。尙得稱世舊。淵明吾所師。夫子乃其後。挂冠不待年。亦豈爲五斗。我歌歸來引。千載信尙友。相逢黃卷中。何似一杯酒。君醉我且歸。明朝許來否。

【一】

我從廬山來。目送孤飛雲。路逢陸道士。知是千載人。試問當時友。虎溪已埃塵。似聞佚老堂。知是幾世孫。能爲五字詩。仍戴漉酒巾。人呼小靖節。自號葛天民。

和李太白 并敘

李太白有潯陽紫極宮感秋詩。紫極宮今天慶觀也。道士胡洞微以石本示余。蓋其師卓玘所刻。玘有道術。節義過人。今亡矣。太白詩云。四十九年非。一往不可復。予亦四十九。感之次其韻。王芝一名瓊田草。洞微種之七八年矣。云。更數年可食。許以遺余。故并記之。

寄臥虛寂堂。月明浸疏竹。泠然洗我心。欲飲不可掬。流光發永歎。自昔非余獨。行年四十九。還此北窗宿。緬懷卓道人。白首寓醫卜。謫仙固遠矣。此士亦難復。世道如奕棋。變化不容覆。惟應玉芝老。待得蟠桃熟。

次韻道潛畱別

爲聞廬岳多真隱。故就高人斷宿攀。已喜禪心無別語。尙嫌剃髮有詩斑。

異同更莫疑三語。物我終當付八還。到後與君開北戶。舉頭三十六青山。

贈江州景德長老

白足高僧解達觀。安排春事滿幽欄。不須天女來相試。總把空花眼裏看。

郭祥正家醉畫竹石壁上。郭作詩爲謝。且遺二古銅劍。

空腸得酒芒角出。肝肺槎牙生竹石。森然欲作不可回。吐向君家雪色壁。平生好詩仍好畫。書牆瀉壁長遭罵。不瞋不罵喜有餘。世閒誰復如君者。



一雙銅劍秋水光。

兩首新詩爭劍鏗。

劍在牀頭詩在手。

不知誰作蛟龍吼。

龍尾硯歌并引

余舊作鳳唼石硯銘其略云蘇子一見名鳳唼坐令龍尾羞牛後已而求硯於歛歛人云子自有鳳唼何以此爲蓋不能平也奉議郎方君彥德有龍尾大硯奇甚謂余若能作詩少解前語者當奉餉乃作此詩

黃琮白琥天不惜

顧恐貪夫死懷璧

君看龍尾豈石材

玉德金聲寓於石

與天作石來幾時

與人作硯初不辭

詩成鮑謝石何與

筆落鍾王硯不知

錦茵玉匣俱塵垢

擣練支牀亦何有

況瞋蘇子鳳唼銘

戲語相嘲作牛後

碧天照水風吹雲

明窗大几清無塵

我生天地一閒物

蘇子亦是支離人

麤言細語都不擇

春蚓秋蛇隨意畫

願從蘇子老東坡

仁者不用生分別

張近幾仲有龍尾子石硯以銅劍易之

我家銅劍如赤蛇

君家石硯蒼壁橢而窪

君持我劍向何許

大明宮裏玉佩鳴衝牙

我得君硯亦安用

雪堂窗下爾雅箋蟲蝦

二物與人初不異

飄落高下隨風花

緞玉具皆外物

視草草玄無等差

君不見秦趙城易璧

指圖睨柱相矜誇

二生妾換馬

驕鳴啜泣思其家

不如無情兩相與

永以爲好譬之桃李與瓊華

張作詩送硯反劍乃和其詩卒以劍歸之

贈君長缺君當歌

每食無魚歎委蛇

一朝得見暴公子

欄具欲與冠爭峩

豈比杜陵貧病叟

終日長饑隨短簑

斬蛟刺虎老無力

帶牛佩犢吏所訶

故將換硯豈無意

恐君雕琢傷天和

作詩反劍亦何謂

知君故以詩相磨

報章苦恨無好語

試向君硯求餘波

詩成劍往硯應恨

那將屋漏供懸河

去歲九月二十七日在黃州生子遜小名幹兒頎然穎異至今年七月二十八日病亡於金陵作二詩哭之

吾年四十九

羈旅失幼子

幼子真吾兒

眉角生已似

搖頭卻梨栗

似識非分恥

吾老常鮮歡

賴此一笑喜

衣薪那免俗

變滅須臾耳

歸來懷抱空

老淚如瀉水

【二】

我淚猶可拭

日遠當日忘

母哭不可聞

欲與汝俱亡

感此欲忘生

一臥終日僵

中年忝問道

夢幻講已詳

仍將恩愛刃

割此衰老腸

知迷欲自反

一慟送餘傷

葉濤致遠見和二詩復次其韻



平生無一女。誰復歎耳耳。滯留生此兒。足慰周南史。那知非真實。造化聊戲爾。煩惱初無根。恩愛為種子。煩公為假說。反覆相指似。欲除苦海浪。先乾愛河水。棄置一寸鱗。悠然笑侯喜。為公寫餘習。餅壘一時恥。

【二】

聞公少已悟。拄杖久倚牀。笑我老而癡。負鼓欲求亡。庶幾東門子。柱史安敢望。嗜毒戲猛獸。慮患先不詳。囊破蛇已走。尚未省齧傷。妙哉兩篇詩。洗我千結腸。黠蠶不作繭。未老輒自僵。永謝湯火厄。冷然迢無方。

蘇東坡詩集卷二十四

古今體詩

五十首

次荆公韻四絕

青李扶疏禽自來。

清真逸少手親栽。

深紅淺紫從爭發。

雪白鶯黃也鬪開。

【一】

斫竹穿花破綠苔。

小詩端為覓橙栽。

細看造物初無物。

春到江南花自開。

【三】

騎驢渺渺入荒陂。

想見先生未病時。

勸我試求三畝宅。

從公已覺十年遲。

【四】

甲第非真有。閒花亦偶栽。

聊為清淨供。

卻對道人開。

半山亭

登嶺勢巍巍。蓮峰太華齊。

凭欄紅日蚤。

回首白雲低。

松柏月中老。

猿猴物外啼。

禪師吟絕後。千古指人迷。

張庖民挽詞

東晉巾車令。西京執戟郎。

甘心向山水。

結髮事文章。

故自輕千戶。

何曾羨一囊。

天高鬼神惡。骨朽姓名芳。

庾嶺銘旌暗。

秦淮舊宅荒。

吾詩不用刻。

妙語有黃香。

次韻葉致遠見贈

欲求五畝寄樵蘇。

所至遲留似賈胡。

信命不須歌去汝。

逢人未免歎猶吾。

人皆勸我杯中物。

我獨憐君屋上烏。

一伎文章何足道。

要知摩詰是文殊。

次韻致遠

長笑右軍稱草聖。

不如東野以詩鳴。

樂天自愛吟淮月。

懷祖無勞聽角聲。